

**SEVENTH LEGISLATIVE ASSEMBLY OF MIZORAM
(SEVENTH SESSION)**

LIST OF BUSINESS

FOR EIGHTH SITTING ON THURSDAY, THE 15th OCTOBER, 2015
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

PRESENTATION OF REPORTS

2. **Pu K. SANGTHUAMA** to present to the House the following Reports of Public Accounts Committee:
 - i) Thirteenth Report on the Report of CAG of India for the year 2010-2011 relating to Public Health Engineering Department.
 - ii) Fourteenth Report on Action Taken by the Government on the recommendations contained in the Sixth Report of the Public Accounts Committee on the Report of C&AG on India for the year 2010-2011 relating to School Education Department.

FINANCIAL BUSINESS

DISCUSSION AND VOTING ON DEMANDS

3. **Pu R. LALZIRLIANA**, Minister to submit to the Vote of the House various Demands under his charge.
4. **Pu JOHN ROTLUANGLIANA**, Minister to submit to the Vote of the House various Demands under his charge.

NGURTHANZUALA
Secretary

SPEAKER : Lalpa chuan heti hian a ti : “Mi fing chuan a finna chhuang suh sela, mi chak chuan a chakna chhuang hek suh sela, mi hausain a sum leh pai chhuang hek suh se”.

(Jeremia 9:23)

Starred Question No. 111-naah kan kal ang a, zawhna neitu member zahawm tak Er. Lalrinawma zawt turin i sawm ang.

Er. LALRINAWMA : Pu Speaker, ka lawm e, School Education Department changtu Minister zahawm tak hnena ka zawhna Starred Question No. 111 na –

(a) Tun dinhmunah Mizoram pumpuiah Swachh Bharat Swachh Vidyalaya programme hnuaiah school engzatnge toilet sak sak an nih ?

(b) District wise-in engzat nge ?

SPEAKER : Awle, department changtu Minister zahawm tak chhang turin i sawm ang.

Pu H. ROHLUNA, MINISTER : Pu Speaker, member zahawm tak Er. Lalrinawma Starred Question No. 111-na chhanna chu -

(a) Tun dinhmunah Mizoram pumpuiah Swachh Bharat Swachh Vidyalaya Programme hnuaiah school 1052 ah toilet sak sak an ni.

(b) District wise-a toilet sak zat chu :-

Lawngtlai	-	505
Lunglei	-	177
Saiha	-	257
Serchhip	-	113
Total	-	1052 a ni.

SPEAKER : Zawhbelhna, a neitu Pu Rinawma, aw a dang pahnihin in zawhbelh thei.

Er. LALRINAWMA : Pu Speaker, ka lawm e. Ka zawhbelhna - Aizawl District lam hi a tel ve lova, khi kan bial chhung khi Serchhip leh Aizawl District-in kan insem a, Serchhip a tel khi kan lawm khawp mai. Aizawl chan Darlawngah khian Primary School-ah naupang kan ngah si a, an nei mumal lova, MLA fund te an ti a, an School verandah te khandih kan tum a, kuminah hian a chhung (PCC te.)? Chulaiah chuan Aizawlah hian engtik hunah nge tih ve theih a nih ang tih kha ka'n zawh belhna ni ta se. ka lawm e.

SPEAKER : Midang, zawhbelhna dang, a awm loh chuan Minister zahawm tak chhang turin ilo sawm ang.

Pu H. ROHLUNA, MINISTER : Pu Speaker, zawhna neitu member zahawm tak zawhbelhna chhanna chu - Hemi Swachh Bharat Swachh Bidyalaya, hei hi Ministry lam leh

Central lamin an rawn teh danah hian UDISE 2013-14 report zul zui hian an rawn ti a. Serchhip District atanga chhim lam pang zawng hi an rawn huam a, helam pang Aizawl District Champhai, Kolasib te, Mamit lam hi UDISE tehkhawngah an rawn hmang ang tih ngaihtuahna khatih hun lai khan a awm lova. Toilet kan han tih hian, rangva a kan han siam ang chi te leh pucca lem lo te pawh kha nei angah kan lo in report vek a, 2013-14 ah khan. Chuvang chuan, tuna Swachh Bharat programme a lo awm chhoh khan khalam kha an rawn telh ta lova, khatia nei anga lo in-report tawh te kha. Chuvang chuan a nei lo anga lo in-report te an vannei ta a ni. Chuvang chuan helam pang hi hemi programme hian in min huam tel ta lova. Tuna kan han sawi tak District ho zawng sanction an rawn pe a, chu chu a kaldan phung a ni e.

SPEAKER : Awle, zawhna No. 112-naah kal ila, zawhna neitu Dr. K. Beichhua, member zahawm takin zawt sela.

Dr. K. BEICHHUA : Pu Speaker, ka lawm e. Minister zahawm tak School Education Department changtu hnena ka zawhna chu –

- (a) Kum 2015 to 2016 atan PAB (Project Approval Board) in SSA pawisa hman tur cheng engzatnge a approved ?
- (b) Central-in cheng engzatnge a rawn released?
- (c) State-in Department-ah cheng engzatnge a released?
- (d) SSA hnuaia thawkte thla hlawh pek loh an awm em ?

SPEAKER : Awle, Minister zahawm tak chhang turin i lo sawm ang.

Pu H. ROHLUNA, MINISTER : Pu Speaker, member zahawm tak, Dr. K. Beichhua zawhna Starred Question No. 112-na chhanna chu -

- (a) Kum 2015 to 2016 atan PAB (Project Approval Board) in SSA pawisa hman tur cheng 20723.49 lakh a approved.
- (b) Central-in cheng 932.65 lakh a rawn released tawh.
- (c) State-in Department-ah cheng 959.60 lakh a released tawh.
- (d) SSA hnuaia thawkte thla hlawh July, August leh September, 2015 thla hlawh pek a la ni lo.

SPEAKER : Zawhbelhna a awm em ?

Dr. K. BEICHHUA : Pu Speaker, State-in Department-ah a released vek tawh si a, engvanga kan SSA hnuaia hnathawkte hi thla thum lai hlawh pe lo nge kan nih? Chhungkaw chawmtu an ni ve si a, thla thum pek loh kha chu a va mangan thlak dawn ve tih kha ka zawhbelh a ni e.

SPEAKER : Zawhbelhna dang a awm loh chuan kan Minister zahawm takin chhang se.

Pu H. ROHLUNA, MINISTER : Pu Speaker, SSA hnuaiah hian kan thawktute hlawh hi thlakhata kan senso tlangpuiin crore 8 leh nuai 30 bawr vel a ni a. Chuvang chuan, tuna an rawn release adhoc grants hian a daih lo. State-in SMS a released chung pawh hian a daih thei lova, June thla thleng kan inpe hram a. Tunah hian 1st installment hi min release thuai turin kan beisei a, kan nawr reng bawk a, reiloteah chuan min rawn release theih kan beisei a. Chu chu min rawn release hunah a theih chin chin chu kan inpe leh ang tih kan beisei.

SPEAKER : Awle, zawhna no. 113-na neitu MLA zahawm tak Pu Lalruatkima'n han zawt sela.

Pu LALRUATKIMA : Pu Speaker, ka lawm e. Ka Starred Question No. 113-na - School Education Department changtu Minister zahawm tak chhan atan -

- (a) SSA hnuaia thawktute Superintendent atanga State Project Director te hi Recruitment Rules hmanga lak an nei em ? An nih loh chuan engnge a chhan ?
- (b) State Project Office ah hian post engzatnge ruak ? Eng post te nge ruak ?
- (c) State Project office ah hian post pahnih chelh kawp mi engzatnge awm ? Post chelh kawp an awm chuan an hming leh eng post te nge an chelh kawp tih ka zawt e.

* Speech not corrected

SPEAKER : A changtu Minister zahawm tak chhang turin i lo sawm ang.

Pu H. ROHLUNA, MINISTER : Pu Speaker, member zahawm tak Pu Lalruatkima zawhna Starred Question No. 113-na chhanna chu -

- (a) SSA hnuaia thawktute Superintendent atanga State Project Director thleng hian Recruitment Rules hmangin lak an ni lo. A chhan chu Recruitment Rules hman tur a awm lo a ni.
- (b) State Project Office-ah hian post ruak tun dinhmunah a awm lo.
- (c) State Project Office-ah hian post pahnih chelh kawp mi pali (4) an awm a -
 1. Pu Lalmachhuana, SDP (SSA) leh Addl. SPD (RMSA) a chelh kawp a.
 2. Lalthuama, Finance Controller (SSA) & RMSA)
 3. Lalliansanga, FAO (SSA&RMSA)
 4. Lalzarzova, i/c Superintendent & MIS Coord. (SSA)

SPEAKER : Zawhbelhna aw, Pu Ruatkima

Pu LALRUATKIMA : Pu Speaker, ka lawm e. Hei School Education Department hi a pawimawh a world class education neih kan tum si kha chuan SSA Project Office a RR awm lo ringawt mai kha siam tumna a awm em tih kha ka zawhna ni sela. Tin tun dinhmunah hian post ruak awm lo ni khan kan ngaihla a, State Project Co-ordinator leh Internal Auditor Co-ordinator te hi a ruak lo em ni tih kha ka zawhbelhna a ni e.

*Speech not corrected

SPEAKER : Zawhbelhna dang a awm em ? A awm loh chuan Minister changtu i lo sawm ang.

Pu H. ROHLUNA, MINISTER : Pu Speaker, Mmember zahawm tak zawhna neitu zawhbelhna RR awm lo tih chungchangah hian hei hi regular post a ni lo va, SSA post a ni a churang chuan RR hi siam a ni lova. Ama'rawhchu, anmahni deployment emaw, attachment a engaged dan tur erawh hi chu kan nei a. Chu chu Procedure for Selection of Officers and Staff under SSA and RMSA Mission for deployment attachment appointment of Officer's under SSA and RMSA Mission tiin nikumah khan kan buatsaih a. Ama'rawhchu, tuna thawktu hi an vai deuthaw a ni mai e, a hma atanga SSA lo din tirh chhoh atanga lo awm tawh leh lo thawk tawh an ni a, thlak danglam kan nei hran lova. Chutiang chu a nih avangin a RR zawng khan regular post, hna nghet a nih hran loh avangin RR hi siam hran a ni lo a ni. Society an ni a RR siam hran sak hi a awm lo a ni.

Tichuan, State Project Co-ordinator hna a ruak tih kha chu ka hriatpui lo Pu Speaker.

SPEAKER : Zawhna neitu Pu Lalruatkima lo sawm ila.

Pu LALRUATKIMA : Pu Speaker, ka lawm e. Ka starred question no.114-na Agriculture Department changtu Minister zahawm tak chhan a tan :-

- a) NLUP Trade hrang hrang atangin tharchhuah (production) engzatnge awm tawh ? NLUP Trade hrang hrangte tharchhuah sum hlutna hi engzatnge ? A Trade-wise ve vein ?
- b) Heng tharchhuah (production) te hralhna tur (Marketing) eng ang nge ruahman a nih ?

*Speech not corrected

SPEAKER : Chhang turin Minister Pu R.Lalzirliana i lo sawm ang.

Pu R. LALZIRLINANA, MINISTER : Pu Speaker, member zahawm tak Pu Lalruatkima zawhna chhanna te chu :-

- a) NLUP Line Department hnuai trade hrang hrang Land based leh Industries and allied sector thar chhuah te hi a pumpuia Impact Assessment neih a la nih loh avangin tun dinhmunah chuan sawi mai theih a ni lo. Kan han sawi theih chhun chu Agriculture WRC 1 & 2 hian Metric ton 5803.31 NLUP kan tih hnuah hian an thar a, hei hi a Kg a ₹ 25.75 a chhutin cheng vbc 14 leh 94 lakhs, 2,300/- man ang a

ni a, Sugarcane hi metric ton 17500 a ni a, tichuan Kg 1 ah ₹ 80 a an hralh hian 294,000 lakhs a lo ni a.

Horticulture-ah hian a vaia an la tih theih loh avangin heng hi a rang thei ang berin an tharchhuah hi a hlutna chhut chhuah tur a ni a.

AH & Vety ah hian Dairy Milk hi tone 1665 a ni a, chu chu litre khatah ₹ 40/- in vbc 6 nuai 66 a ni a.

Piggery Meat hi ton 33 a ni a, Kg ah ₹ 250/- a chhut chuan ₹ 82.5 lakhs a ni.

Mithun leh Hill Cattle sa hi ton 43 a ni a, Kg-ah ₹ 200 a chhutin cheng vbc 1.29 lakhs man a ni a. Poultry Meat hi ton 33 Kg-ah ₹ 200 chhutin 66 lakhs man a ni a. Vety-ah hian a vaia a belhkhawm chu vbc 943.5 lakhs a ni.

Soil & Water Conservation-ah hian Coffee leh rubber hi la hnai hman lo te leh la rah hman lo te a ni a. Hmunphiahah hian quintal 85968.21 a ni a, hei hi quintal khatah ₹ 3000/- a chhutin crore 25 and 9 lakhs and 4630 thousand a ni.

Sericulture ah hian Cocoon production hi 33022 lakhs a ni a, hei hi 66 lakhs man a ni.

Fisheries ah hian Sangha quintal 10312 a ni a chu chu ₹ 200 a Kg a chhutin vbc 2062 lakhs and 40 thousand.

Tin, Industry-ah hian trade hrang hrang kan nei hlawm a, Auto Rickshaw-ah hian thlakhata an income chu ₹ 5912. Auto Mobile Works-ah hian ₹ 14266, Beauty Parlor-ah 23839, Black Smith-ah ₹ 27275 lakhs. Cane and Bamboo Works-ah hian ₹ 9000/-, Carpentry 1-ah ₹ 9096, Carpentry 2-ah ₹ 7160/- Desktop Publishing- ah ₹ 5693/- Electronic Repairing-ah ₹ 9867/- Hair Cutting-ah ₹ 6000/- Handloom-ah ₹ 12830/- Petty Trade – 1-ah hian ₹ 13950/- 2-ah 5750/- 3-ah hian ₹ 6583/-. Photography-ah hian ₹ 31004/-. Rice Selling-ah hian ₹ 2257/- Tailoring -ah hian ₹ 13036/- a ni a.

UD & PA lamah hi chuan Industry lam atangin 2012 khan an han ti ve tan a, hei pawh hi la chhui chhuah hman loh a ni a. Forest Department-ah hian Mau chin hi a puitlinna hun tur ala nih loh deuh avangin kum 5 chung hian a chhut chhuah theih hrih lo a ni. Chu chu a chhanna chu a ni a.

- b) NLUP trade hrang hrang zinga market support mamawh te hi long gestation crop an nih hlawm avangin tun dinhmunah chuan a hlawm lian a buaipui tham lutuk a la awm lo a. Trade hrang hrang beneficiaries ten an thar chhuah ang hi man man takin an la ti ral zel niin hriat a ni. UN nen thawh hona hnuaiah tunah hian Market zirchhianna mumal takin hma lak mek a ni a. Marketing Task Force din a niin training te pe mek a ni a. Market survey pawh neih tan a ni.

SPEAKER : Zawhbelhna. Hetiang zawhna chhanna sei tak ang chi hi Unstarred-ah lo dah ila tha tur a ni a. Mahse, zawt tho rawh le.

Pu LALRUATKIMA : Pu Speaker, chhanna kha a sei ang tih kan hre bik si lova. Ni e, a har baw k a ni.

Pu Speaker, hei, khati zozai mai kha production a lo awm tawh a. Amaherawhchu, Mizoram Economic Survey 2014-2015 kan GSDP Cell Agriculture, Animal & Crop Husbandry a Allied Sector atang hianin 12.01% chauh a ni mai a. Khati zat thawkchhuak tawh si kha chu Data kha zirchian tham a awm chu ka ring a, chu chu ka sawi belh lawk a.

Chuan Pu Speaker, ka zawh belhna chu, NLUP marketing Cell kha engvanga ti tawp nge a nih, tih leh The Mizoram State Agriculture produce Marketing Development and Regulation Act, 2008 kha MAMCO hovin an kalpui thin a, MAMCO kalpui thiah a nih takah chuanin hei hi engtin nge a marketing kalpui zel turah khan engtin nge ruahmanna, hmathlir kha aia chiang deuh zawk kha kan nei thei angem, tih kha kan zawt duh a.

Tin, ka zawhna dang lehah chuanin Tunlaiin Mizoram chhungah Saza a thi nasa a, Amaherawhchu Saza thi hi, mithiam te leh a chhui bing ten an han chhuina ah chuan NLUP 12% atanga kan lakluh Kel, quarantine ni loin a a rawn ken a ni thei ang em tih hi chhui a lo ni ta tlat mai a ni. Chu chu quarantine a kha an lo ti lo reng em ni, Kel ah khan, tih kha ka zawh belh a ni e

SPEAKER : Zawhbelhna dang, an awm loh chuan Minister zahawm tak Department neituin chhang se.

Pu R. LALZIRLIANA, MINISTER : Pu Speaker, Marketing Cell thiahna chhan hi ka hre chiah lova. Amaherawhchu, heta kan chhanna ah hian tuna tan hi chuan, a market a hranpa a chhan a la ngai lovin kan la hria a, kan tharchhuah te hi helaia hmun leh hmunah a la hralh zel theih avangin. A Marketing Cell lo tih kha sum leh pai te engemaw zat a lo ngai ve a, khalaia hnathawktute tan khan. Chuvangin pawisa inrenchemna atana hei hi chu thiah lailaw k a nih ka ring a.

Tin. Saza thi hi chu, ka hre lo khawp mai a. Forest lampang hian an en deuh a. Tin, Kel pawh hi phai lam atanga Kel chi dang hi eng ang chiah nge an lakluh tih te pawh ka hre chiah lova. Lakluh an lo nei tawh em, kan ram Kel te hi a tha a, no an neih hma vei nen, engatinge hetiang a dang an lo tih le? Chu chu ka hriat dan a ni.

SPEAKER : Aw, Zawhna No.115-naah kal ila, a neitu Dr. K. Beichhua, MLA zahawm takin zawt se.

Dr. K. BEICHHUA : Pu Speaker, ka lawm e. Law & Judicial Department changtu Minister zahawm tak chhan atan ka zawhnate chu:-

- a) Lok Ayukta Selection Committee, Chief Minister kaihhruai a member-te hi tute nge ?
- b) Search Committee din a ni tawh em ? Tute nge memberte?
- c) Office tur ruahman a ni tawh em tih ka zawt e.

SPEAKER : Awle, Department neitu, Pu Lalsawta, Minister zahawm tak chhang turin lo sawm ang.

Pu LALSAWTA, MINISTER : Pu Speaker, member zahawm tak Dr. K. Beichhua zawhna Lok Ayukta Selection Committee, Chief Minister kaihhruai a member-te hi tute nge tih chhanna chu hetiang hi a ni :-

- a) Member te :- 1. Pu Hiphei, Speaker of the Legislative Assembly of Mizoram.
2. Pu Vanlalzawma, Opposition Group Leader
3. Mr. Justice T.Vaiphei, Judge, Guwahati High Court (Nominated by the Chief Justice of Guwahati High Court).
- b) Din tura hmalak mek a ni.
- c) Office tur hi ngaihtuah mek a ni tih a ni e.

SPEAKER : Zawhbelhna, Dr. K.Beichhua.

Dr. K. BEICHHUA : Pu Speaker, member te kan han en khan Chief Justice nilo, Guwahati High Court Judge a ni in ka hria a. Kha kha kan Danah Chief Justice tih kha a ni a. Chief Justice-in a aia a ruat kha thil theih a ni em tih leh, 'Ngaihtuah mek' tih hian ngaihtuah dan rang leh rang lo hi a awm a. Khalai kha chu rang deuha ngaihtuah theih ni se tih kha, chu chu zawhna ni lovin, ngenna a ni e. Ka lawm e. Pakhatna kha chu zawhna a ni.

SPEAKER : Zawhbelhna a awm em ? A awmlh chuan a changtu Minister zahawm tak chhang turin i lo sawm ang.

Pu LALSAWTA, MINISTER : Zawhbelhna. Mr. Justice T Vaiphei, Chief Justice ni silo, Chief Justice-in a a rawn ruat hi, chutiang dan chu a awm em ni, tih kha chu, kan danah hetiang hi a awm leh awm loh chu ka hre mai lo va. Amaherawhchu, Chief Justice in, "Hei hi ka aiawh tur a ka mi ruat a ni", a tih khan chuan, keini chuan kan lo pawm mai a ni.

Pu LALRUATKIMA : Pu Speaker, nimina Demand kan han sawi khanin, ka Starred Question No.48-naah khan, Lok Ayukta din tum a ni em ? Engtikah nge din tum a nih, tih ka zawhna kha, "Enchian a ngai a ni", Minister zahawm tak khan a ti a. Kha kha a en chiang tawh em ? Budget Allocation-ah khan engzat mah dah a ni si lova, khalai nen khan a inkaihhnawih a, dah a ni silo a.

Kha lai karah khan dah a nih thu khan ka zawhna min rawn chhang bawk si a. Dah tura ruahmanna hi 432 a ni bawk si a. 'Ka lo enfiah ang e', a tih kha a enfiah tawh em tih kha ka zawt duh a ni. A relevant em avangin ka sawi tel nghal a nih chu.

*Speech not corrected.

SPEAKER : Minister zahawm takin a chhang thei em ?

Pu LALSAWTA, MINISTER : Pu Speaker, kan la enfiah hman miah lova, a la rei lo deuh hlek bawk a. Tin, Lok Ayukta siam chungchanga kan inngahna hi kan sawi tawh fo angin 14th Finance Commission-ah State a specific-in kan dil a. Hei lo pawh hi dil tam tak kan nei a, Infrastructure chungchangah te. Mahselangin, 14th Finance Commission hian State specific ho te hi an rawn paih ta vek a, a engmah hi India ram pumpuia State zawng zawngin an ngaih pawimawh ho kha a paih vek a, "Pawisa kan pek che u atang hian lo ruahman rawh u", min ti a. Chuvang chuan, tunhma deuh a kan beisei ang ai kha chuan sum lamah kan tum ang hi chu a ni lo tih kha he House zahawm tak hi ka han hrilh duh a. Mahse, chuti chung chungin kan neih ang anga a bul te pawh han tan a han tih hram hram hi chu kan tum a. Nichina kan zawhna chhanna ah pawh khan a lang a. Office tur te pawh kan thiam ang angin kan ngaihtuah a, in luah tur te pawh a awm ang em tih te. Chu chu hma kan lak dan a ni e.

SPEAKER : Awle, Zawhna No.116-na neitu Pu Lalruatkima, member zahawm takin zawt sela, i lo sawm ang.

Pu LALRUATKIMA : Pu Speaker, ka lawm e. Ka Starred Question No. 116-na School Education Department changtu Minister zahawm tak chhan atan : -

- a) CSS Hindi Teacher engzatnge awm? Engtik atanga thawk tan nge an nih ?
- b) Thla engzatnge hlawh an lak theih tawh loh ?
- c) Engvanga hlawh hi hun reitak chhung la thei lo nge an nih tih ka zawt e.

*Speech not corrected.

SPEAKER : Nichina chhan tawh nen khan, awle, engpawhnise, a zawh si chuan Minister zahawm tak a chhang turin i sawm ang, a changtu.

Pu H. ROHLUNA, MINISTER : Pu Speaker, member zahawm tak Pu Lalruatkima Starred Question No.116-na chhanna chu –

- (a) CSS Hindi Teacher hi mi 1305 an awm. February, 2011 atanga thawk tan an ni.
- (b) Thla sarh hlawh an la thei tawh lo, March, 2015 atangin.
- (c) An hlawh hi Centrally Sponsored Scheme hnuai atanga la an ni a. Central-in fund a la rawn release loh avangin rei tak hlawh la lovin an awm a ni tih a ni.

SPEAKER : Zawhbelhna a awm em ? Pu Ruatkima.

Pu LALRUATKIMA : Pu Speaker, hei Hindi Teacher CSS hnuai a mite hi an khawngaih thlak khawp mai a. Thenawmte dawr te a an batna pawh kan hel zar zar tawh mai an ti a. Thla sarih zet mai hlawh an lak tawh loh takah chuan a awm khawp mai a, an khawngaih thlak a, chhungkaw enkawltu te an ni a. Hemi an hlawh lak theih loh chungchangah hian Hindi tawng zir kan duh a, zirtir pawh kan tum a. Kan thalaite hian ka hlauhthawn chu, zir kan duh ngawih ngawih leh min zirtirtute hlawh pawh an lak theih loh hi chuan khawchhak lam kan unaute tawng zir te hi kan chak mai palh ang tih te pawh hi a hlauhawm hle in ka hria a. Heti zawng te pawh hi chhuanlamah te pawh hman theih ni pawhin ka hria a. Ka zawhna chu kan nawr chak taw lo em ni ? Theih tawp chhuahin kan Minister zahawm tak te khan in an harsatna te leh kan ram harsatna te hre reng chung khan an nawr zel thei lawm ni, chak leh zualin tih kha kan zawt tel a ni.

*Speech not corrected.

SPEAKER : Awle, Pu Pianmawia te, Pu Chalrosanga ten zawt ve leh se.

Pu R.L.PIANMAWIA : Pu Speaker, ka lawm e. Hei Hindi Teacher heti zat lak an nih theihnaah hian a mawhphurtu kha ka ni ve tlat mai a. 1989 kum kha niin ka hria, India hmarchhak Block President kohkhawmnaah Pi Sonia hovin Conference kan nei a. Tahchuan, Central-ah kan sorkar lo va. Central a kan sorkar veleh Hindi Teacher hi hnam inpumkhatna hmanraw tha ber India ramah chuan a ni si a, Mizoramah min rawn tihsak ve rawh u, ka ti a. Sorkarna helaiah a lo inthlak veleh Pu Thangtea kha a Minister ta kha a ni a, a hunah an la ta a. Hetah hian ka'n zawhbelh duh chu, hetiangah hlawh la thei lo a an awm tak reng maiah hian, a tichhuaktute Central a kan sorkar tak loh vang kha a ni mai em tih ka zawhna ni se. Tin, engtik hun atangin nge an hlawh tur hi an rawn pek tawh loh tih ka zawt baw a. Tin, heng zirtirtu (Hindi Teacher) te hi hnadang hmuin emaw an lo bang thei a. Chutiang an banna hmun angah chuan keini ang bial, bial ralti deuh a Hindi teacher neih lohnaah hian a khaw mite appointment min pek sak mai thei ang em tih ka zawhna a ni e.

SPEAKER : Aw, Pu Chalrosanga'n zawt ve leh rawh se.

Pu CHALROSANGA RALTE : Pu Speaker, ka lawm e. Ka zawhbelhna Education Minister zahawm tak chhanna tur chu - Tun hnaiah Hindi Teacher lak thar an awm em ? Tin, lak tum an ni em tih ka zawhna a ni e.

SPEAKER : Awle, a tawk tawh e. A zavai khan Minister zahawm tak in chhang se, i sawm ang.

Pu H.ROHLUNA, MINISTER : Pu Speaker, member zahawm tak a zawhna neitu Pu Lalruatkima han zawhbelhna, tun aia nasa zawkin a nawrpui theih lawm ni, a ti a. Ni e, department lam atang hi chuan theih tawp kan chhuah a. A theih ang angin kan tang a, amaherawhchu, tun

thlengin Central lamah an larawn release lo rih chu a ni phawt mai a. CSS Hindi teacher te hlawh atana sum kan dilna hi Government of India a thehluh dawn hian, nikuma minrawn pek tawh, an hlawh tur minrawn pek tawh, a pawisa hmanna kha Accountant General, Mizoram audit report nena dil thlap a ngai a. Chumi tur chuan anmahni routine pangngaiiah chuan AG lam hi an tlai thin a. Amaherawhchu, kuminah pawh hian Financial year tawp veleh AG lam pawh min tihhma sak turin kan ngen a. A chhan chu anni hi CSS hnuaiia innghat liau liau an nih avangin an tlai palh kan hlau a. Chuvang chuan, AG lam pawhin min hriatthiampuiin hmanhmawh takin minrawn tihsak a. Audit report pawh April thla chhung khan Central-ah kan theh thla nghe nghe a, kum thar sanction dilna nen.

Tichuan, proposal hi Education Department a Official ten Audit Certificate leh Utilization Certificate nen thlap MHRD, Government of India-ah ni 24.4.2015-ah theh lutin an nawr zui zel a. MHRD-ah hian Languages Hindi Teaching Scheme khawihtu Officer te Ministry dangah transfer an ni a. Officer thar, mi thar a hmalam thu hre lo ten an khawih avangin file a kal chak mawh hle a. Theih tawpin bawhzui zel a ni a. Rei tak proposal an enfiah hnuah kum danga an la phut ngai loh High School leh Middle School, Hindi Teacher list leh an contact details, an phone number te nen lam MHRD hian anrawn phut thar a. Chu pawh chu OSD, Mizoram House, New Delhi kaltlangin ni 23.7.2015-ah thawn a ni a. MHRD chuan an ngaihtuah zel a, State sorkar lam pawhin bawhzui reng a ni a.

Ni 7.9.2015-ah Ministry atangin lehkhahmuh a ni a. Heng thil pahnih hi anrawn dil a, an record atanga anni pawhin zawn hmuh ve mai awm kha, an zawng hmu zo lo ni tur a ni. Pakhat anrawn dil chu CSS Hindi Teacher 1305 tana Government of India in Approval a pekna minrawn dil a ni, keimahni lamah zawk hian. Tin, a pahnihnaah chuan, heng mi 1305 kan chhawr avanga State-in kan hlawkpuiina Progress Report leh Physical Achievement te min dil bawka. Hengte hi kum dangah an la dil ngai lo reng reng a. Kuminah hi chuan an kherhkhia angreng hle a ni. Heng an thil phut te hi ni 10.9.2015-ah a chhanna hi keimah ngeiin Delhi-ah ka keng thla nghe nghe a, khu lamah kan zuk bawhzui a. Tin, a hma June thlaah pawh khan khutah Additional Secretary te, Minister taka kha a lo awm remchan loh avangin a official te hnenah pawh hemi chungchangah hian keimah ngeiin June thlaah pawh khan ka zuk nawr tawh a. Tin, kan Parliamentary Secretary zahawm tak pawhin Delhi-ah a zuk nawr tawh bawka. Kan official te tih bakah theih tawp kan chhuahpui a, kan nawrpui takzet zet a ni tih kha waviinah hian ka'n sawi duh a.

Tin, sorkar kalphung leh thawktu inthlak danglam nasa tak kan tawng a, Ministry-ah phei chuan hei hi MHRD Ministry-ah, helam khawihtu, thawktu Section Officer, Under Secretary, Deputy Secretary, Economic Adviser, Director, Joint Secretary, Additional Secretary, Secretary thlengin mi thar an ni tawh a ni. Kumin maiah hian an inthlak vek mai a. Chuvang chuanin, a hma thu kha an hre lo nge ni an tan thil thar a nih zel avang hian a har em em mai a. Chuvang chuan, eng level-ah pawh hian query a tam em em mai a. Chu

chu a theih ang angin he lam atang pawh hian kan ti zel a. A chang leh kan Officer te pawh an chhuk thla a. Delhi-ah kan R.C. te, kan OSD te pawhin theih tawp min chhuahpui chungin tun hi kan la thleng rih a, min la release thei rih lo a ni. Chuvang chuan, an hlawh hi a rang thei ang bera Central-in min pek chhuah theihna turin a department ang pawhin theih tawp kan chhuah a kan nawr a ni tih hi ka member pui te hian vawiinah hian min hriatpui ka duh a, ka'n sawi a ni.

SPEAKER : A bangte an aiawh a lak theih em tih kha. Bang an awm khan a bang ta te aiawh lak theih a ni em? a ti.

Pu H. ROHLUNA, MINISTER : Pu Speaker, Pu R.L. Pianmawia zawhna a ni a, ka la chhang thleng lo deuh a ni. Central-ah hian sorkar a inthlak vang a ni mai lo maw he harsatna hi tia Member zahawm tak Pu R.L.Pianmawia'n a zawhna kha. Tuna ka sawi tak pawh khan a chhang thovin ka hria a. A nihna takah chuan ministry thar a lo piang a, NDA sorkar a lo piang a. A Ministry-ah khuan mi thar an awm ta deuh vek mai a ni, Secretary atanga Section Officer thleng khuanin mi thar an ni a. Chuvang chuan, Under Secretary te tal kha chu la awm se la a hma thu kha a hre em em a, Sanjay Singh-a a ni a, keini pawhin mimal tak pawhin kan hria a. Heng thilah hian nikum lamah te pawh kan innawr tawh a. Chuvangin, a ni pawh hi awm tawh lovin midang an lo awm leh ta daih si a, a harsa em em a ni.

Chuvangin, Hindi Teacher te hi kan duh sak a, a tira sanction-naah khan an hlawh pawh a sang lamin revised theih a ni ang tih a ni a. Chumi provision chu a awm avangin Middle School ami ten tunah hian thlakhatah ₹ 15,000/- an hlawh a, tin, High School ami ten ₹ 20,000/- an hlawh a, ₹ 25,000 ah hian hetia provision a awm tho chuan tih pun dil sak ila kan ti a. Proposal-ah kan telh bawk a. Chungte chu harsatna min siamtu a ni thei ang em kan han ti leh hnu hnawh a. Mahse, a ni chuang turah kan ngai lo. Kan sawi tawh angin a hma thu hre lo thawktu an tam em avang hian harsatna kan tawk niin kan hria a.

Tin, casual vacancy hetiang han awm hi chu advertisement han tih a, hna nghet tak te pawh a ni lem lo bawk a a thenah hi chuan mamawhna avangin hmun kilkhawr zawkah te hi chuan han hnawhkhah nawk nawk kan nei a ni.

Tin, Member zahawm tak Pu Chalrosanga han zawhna kha tun hnaiah lak thar an ni em tih lai taka hi chu tun hnaiah tak hi chuan lak thar awm chiah chu ka hre lova. A hma deuh khan tlem a zawng casual vacant han awm leh vanduaaina lo tawka thite chhungte compassionate anga han dah chu an awm a ni tih kha ka chhanna a ni e Pu Speaker.

SPEAKER : A dawt leh Starred Question No. 119-naah kan kal ang a, a zawhna neitu Er. Lalrinawma, MLA zahawm takin zawt se la.

Er. LALRINAWMA : Pu Speaker, ka lawm e. Agriculture Minister zahawm tak hnena ka Starred Question No. 117-na :-

- a) Tun kum kal mek 2015-16 chhungin NLUP beneficiaries te engzat nge paih a nih?
- b) District wise-in engzat nge?

SPEAKER : Awle, chhang turin a department enkawltu Minister zahawm tak Pu R. Lalzirliana sawm ila.

Pu R. LALZIRLIANA, MINISTER : Pu Speaker, MLA zahawm tak Er. Lalrinawma zawhna a-na chhanna chu – Tun kum kal mek 2015-16 chhung hian NLUP Beneficiaries 109 paih an ni tawh. District wise-in engzat nge tih hi Aizawl District-ah 23, Champhai-ah 5, Lunglei-ah 61, Mamit-ah 8, Serchhip-ah 10, Kolasib-ah 2 a ni e.

SPEAKER : Zawhbelhna, a neitu Er. Lalrinawma.

Er. LALRINAWMA : Zawhbelhna Pu Speaker, ka lawm e. Hengte hi engvanga paih nge an nih tih kha kan zawt a. A pahnihnaah chuan, Aizawl East-II-a Armed veng South-ah hian beneficiaries hi 3rd Phase atangin mi 20 paih an ni a, 4th Phase atangin mi 4 paih (delete) an ni bawk a. Hengte hi tu thu leh hla a, recommend-a paih nge an nih? tih ka zawt e.

SPEAKER : Zawhna dang, Pu Beichhua

Dr. K. BEICHHUA : Pu Speaker, NLUP hi kan sawi fo mai a, party bik kan ti lo tih a ni fo mai a. Chulaiah chuan ka zawhna chu Congress Unit te hianin NLUP-ah hianin delete theihna leh dah belh theihna power an nei em? tih kha ka zawhbelhna a ni a. Tin, Village Implementing Committee hi din an ni em? Din ni ta se, tunge Chairman a, tunge Secretary tih kha ka zawhbelhna a ni e.

SPEAKER : Awle, Pu R.L.Pianmawia, hei hi a tawpna a ni ta e.

Pu R.L. PIANMAWIA : Pu Speaker, ka zawhbelhna chu paih zat kha 109 a ti a, paih loh zat ka zawt ve a. Tin, Industries Department Trade bikah hian instalment pek turah hian an muang bik em em mai a. Anni hi muang changa ti tur bika tih an ni em tih ka zawt bawk e.

SPEAKER : Awle, chhang turin Minister zahawm tak Pu R. Lalzirliana i sawm ang.

Pu R. LALZIRLIANA, MINISTER : Pu Speaker, hemi a paihna chhan hi han sawi ila, a Chiang deuh duak awm mange aw ka ti a. Pem an awm avangin NLUP pawh hi an khua atang khan paih an ngai a. Tichuan, paih thin an ni a. Tin, dawng ve si hma la miahlo hi an awm a, chungte chu paih an ni bawk a. Tin, sorkar hnathawk, a tira sorkar hnathawk ni chiah lo, eng emaw vanneih avang leh khatianga sorkar hna lo thawk ta chhungkua te atangin an fate pawh a ni thei e, chutiang chu paih an ni a. Tin, anmahni hi in withdraw ve hrim hrim an awm avangin a dawn full hma hian hna nget kan tih ang chite khawilaiah emaw an lo hmuh kha chuan anmahnia in withdraw an awm a.

Tin, thihna avangin NLUP beneficiaries te hi paih te an awm a, a chhan chu an lo thi ta bawk si a, NLUP a tanga han paih bawk chu tia khawngaihthlak tak te pawh a awm theih a. Amaherawhchu, thawk zawm thei miah lo chhungkua te pawh kha an lo nih ve avangin, khangte pawh kha paih an ni a. Chief Minister Special Scheme zawk atanga chhawm chhuah zawk tum te an ni a. Tin, hming double a lo awm hian chungte pawh chu paih an lo ni bawk thin a.

Tichuan, Aizawl East-II lama mi kha engvanga paih nge, tu recommend nge tih kha chu Line Department ten an verify a, chutiang anga ti thalo te an hmuh chuan D.C. te hnenah an sawi a. Tin, NLUP Implementing Board phalnaa paih an ni thin a ni tih kha Pu Rinawma zawhbelhna kha ni ta se. Tin, a paih theitu chu NLUP Implementing Board a kha a ni a.

Tin, Pu R.L. Pianmawia, Member zahawm tak zawhna kha paih zat kha 109 an ni a, paih loh zat kha chu nuai khat leh singhni h bawr vel a ni ang a, a vai chiah kha chuan ka hre Chiang chiah lova. An tam viau a ni paih loh zat hi.

Tin, Industry Department kha, muang tura tih bik an ni lova, an lo muang deuh a nih chuan engnge ni a chhan te ka lo umzui dawn nia.

Dr. K. BEICHHUA : Pu Speaker, ka zawhna kha kan Minister zahawm takin min la chhang tlat lo. Congress Unit kutah thuneihna pek a ni em tih leh Village Implementing Committee din a ni em? tunge Chairman tur? tunge Secretary tur tih ka zawhna kha.

SPEAKER : Awle, chhang turin Minister zahawm tak i lo sawm ang.

Pu R. LALZIRLIANA, MINISTER : Pu Speaker, Congress Unit kutah dah a ni lova, hei hi khua a Village Committee te, an thlan chhuah te kuta dah a ni a. Chuvangin, Congress khan mawhphurhna an nei bik chuang lo a ni.

Dr. K. BEICHHUA : Pu Speaker, he lehkha ah hianin ni 6.9.15 ah Congress Unit ten Armed Veng 'S' NLUP 3rd leh 4th phase-a delete tur Finance Minister hnenah an rawn thlen a, chu chu Finance Minister in Chairman hnenah a thawn pheih leh ta a. Chutianga Unit President leh Secretary hming sign leh seal nen thlap a rawn tih a ni. Engvanga thuneihna pek si loh heng hi lo entertain nge kan nih tih kha ka zawhna a ni e.

Er. LALRINAWMA : Pu Speaker, khawngaihin. (SPEAKER : Ngawi rawh, zawh belhna a tam tawh em mai, Dan in bawhchhe dawn tlat) Pu Speaker, he thil hi a sensitive a ni. A chhan chu he Dan hian Village Level Monitor Committee te thu a pe a, hetah hian Congress Unit te thu leh hla hi NLUP Implementing Board ah registration no. 95-na ah a kal tlang a ni. Chuvang chuan hei hi Dan lo a ni. Village Level Monitoring Committee lehkha chu nise chu kan hrethiam, amaherawhchu, engatinge hetiang a party lehkha sorkarin a lo received thlap hemi chungchangah hian tih lai kha. He in Dan siam ngei hi in bawhchhia a ni dawn lawm ni, tih kha a ni e Pu Speaker.

Pu R. LALZIRLIANA, MINISTER : Hekna hi a awm theih a, tu pawhin complaint te chu complaint theih a ni a, chuvangin, an complaint avangin Line Department ten an enzui a, thawk tlak lo nia an hriat kha an paih a ni.

Dr. K. BEICHHUA : Pu Speaker, hei hi Line Department lehkha a ni lo reng reng. Pu Speaker, kan zawhna hi kan duh anga min chhan phawt loh chuanin min khap dai theih lo.

Pu R. ROMAWIA, MINISTER : Pu Speaker, 'heng mite hi an pem tawh e' ti khan mi panga kha paih tur an rawn ti a. D.C. Office lama NLUP buaipui tute hnenah khan an lo thlen a, kei khan ka khua leh tui te an ni bawk a, an pem chiah em tiin keima theihna na in ka'n verify a. An lo pem miah lo mai sia, tichuanin, Village Monitoring angin an in ngai mai theih a khami Local Council Chairman ho kha. Mahse tu hming emaw thlak an duh avang khan a pem tawh kha an lo ti mai mai kha a nia. Khatiang thil a nih avang khan NLUP kha kan lo duh tlang hle mai tih kha chu a kaww khawp mai.

Er. LALRINAWMA : Pu Speaker, helai lehkha hi complaint a nilova, i phalna in kan chhiar ange - Khawngaih takin kan dilna hi min ngaihtuah sak a, hma min lak sak turin ka ngen a che. Armed Veng 'S' NLUP 3rd Phase beneficiaries thenkhat cheng singkhat dawng tawh te hi thenkhat paih a, thenkhat thun belh kan duh a, khawngaih taka hma min lak sak turin an tia ni. Thun belh leh paih ah hian thuneihna an nei em ni tih lai hi ka zawt a ni.

Pi VANLALAWMPUII CHAWNGTHU : Pu Speaker, thuneihna an nei lova, an rawn ngenpui a ni a. Tin, an sem chuang lovang titute hian engati nge heti taka an buaipui ?

Dr. K. BEICHHUA : Pu Speaker, he House zahawm takah hian kan zawhna min chhan hi kan right a ni. Member theuh kan nia, min chhan hma loh chu engzat pawh kan zawt thei a, satisfactory answer kan dawn hi kan right a ni tih ka rawn sawi a ni e.

Pu JOHN ROTLUANGLIANA, MINISTER : Pu Speaker, discretionary power a ni, a duh duhin in chhangin in zawt ngawt thei lo. A ni'n a phal loh chuan member-ten chutiingin duh duh zat a zawh theih ngawt loh.

Pu LALSAWTA, MINISTER : Pu Speaker, ka bial a nia. ka hnenah pawh an rawn ziak a, thuneihna lam a ni lova, ngenna a nia. Eng pawh hi kan ngen thei a, kan ngen kha thuneituin a lo tihhlawhtlin chuan a thu a ni. Chuvangin, kan ngen a, anni pawhin min rawn ngen a, an ngenna angin ka ngen ve leh a, an lo ngaipawimawh hlauh mai a. Chu chu duhsak vang ni lovin dik zawk nia ka hriat avangin kha thil kha ka ti a ni.

SPEAKER : Khai le, i duhtawk tawh ang aw.

Pu LALRUATKIMA : Pu Speaker, khawngaihini. Kawrtethawveng khua a NLUP beneficiaries, Horticulture trade a mite VLMC ina a complaint, nodal department tena an endik a tha an tih si, khang ho NLUP Implementing Board paw'n pek tura a recommend leh tawh si ho kha, anih leh official te kan la ring zui zel dawn lawm ni. Kan Minister khanin kan pe thei tawh em tun Session chhung ngei hian, khami te kha pek tura sanction awm sa vek kha pek theih a ni mai dawn lawm ni tih kha kan ngen duh a ni kan Minister.

*Speech not corrected.

SPEAKER : Duhtawk ang aw. Party leh party inbeihna kha House-in kan buaipui vak kha a mawi lo maithei a, kan duhtawk tawh ang a. Zawhna 118-na ah kal ila, a neitu Pu Lalruatkima, member zahawm takin han zawt se.

Pu LALRUATKIMA : Pu Speaker, ka lawm e. Ka Starred Question No. 118-na. School Education Department changtu Minister zahawm tak chhan atan -

- a) SSA State Project Office hian vehicle engzatnge a neih? Vehicle No. leh type of vehicle, vehicle kawltute hming leh an designation eng te nge?
- b) Chartered vehicle a awm em? A awm chuan eng vehicle te nge ni a, tute nge a neitute?
- c) Chartered vehicle te hi quotation chhuah a ni em? Anih chuan engtikah nge advertisement chhuah a nih, tih ka zawt e.

*Speech not corrected

SPEAKER : Awle, a changtu Minister zahawm tak Pu H. Rohluna chhang turin i lo sawm ang.

Pu H. ROHLUNA, MINISTER : Pu Speaker, member zahawm tak Pu Lalruatkima zawhna chhanna –

a) SSA Project Office hian vehicle pathum (3) a nei a, chung vehicle No. te chu MZ-01/A-4743 leh MZ-01/B-7153 leh MZ-01/B-7504 a ni a, Gypsy vek an ni. Heng motor hi pool vehicle a hman a niin a hmasa pahnih hi SPO-ah hman a ni a, a custody hi FAO leh Superintendent kutah dah a ni. A hnuhnung ber hi Secretariat School Education ah hman thin a ni.

b) Chartered vehicle hi pariat (8) a awm a, chung vehicle leh a neitute chu ;-

1. Tata Safari – Lalliansanga, Mission Vengthlang
2. Bolero - Rohlupuii, Chanmari
3. Bolero - Zonghini, Bawngkawn
4. Bolero - Zohmingthanga, Chanmari
5. Bolero - Lily Lalthanmawii, Chanmari
6. Bolero - F. Lalengzauva, Samtlang
7. Bolero - Lalhriatpuii, Chanmari tih a ni na a hei hi Scorpio zawk a niin ka hria a.
8. BIKE - Vanlalhriata, Dawrpui

c) Kum 2010 khan Mizoram Education Mission Society (MEMS) hnuaia vehicle charter tur atan NIT-I of 2010 hmangin quotation chhuah a ni a, advertisement pawh 20th April, 2010 khan chhuah a ni. Tender chhanna a chhangtu hniam ber chhan angin vehicle charter hi kalpui a ni a, heng vehicle te hi kum khat zel atan extend chhoh zel a ni ta a ni.

Tichuan, nikumah khan hemi a rate pangngai lo hret in percent engemaw zat khan tihsan chhoh a ni a 2018-2019 thleng, chu chu kum nga chhung atan ruahman a ni bawka a ni.

SPEAKER : Zawhbelhna. Pu Ruatkima.

Pu LALRUATKIMA : Pu Speaker, ka lawm e. Ka lo hriat dan in SPO hianin Gypsy pali – Soft top pahnih leh Hard top pahnih nei niin ka hria a, kha a chhanna ah khan pathum a ti a. School Education Addl. Director, Gypsy kawllai hi SPO lam ta niawm tak a ni a, a nih loh chuan tu ta nge tih kha ka zawt tel nisela.

Tin, SSA motor, charter nan hian kum khatah sum engzat nge sen a nih tih leh sharing patern SSA ah tihdanglam a nih hnu hian motor charter zel tum a la ni em tih kha ka zawh belh a ni.

*Speech not corrected

SPEAKER : Member dang zawh belhna nei kan awm em? Kan awm loh chuan Minister zahawm tak, zawhna neitu Pu H. Rohluna i lo sawm ang.

Pu H. ROHLUNA, MINISTER : Pu Speaker, kum khat-a a vaia kan sen hi ka lo belhkhawm hauh lo mai a. Tuna kan hire na a mal hi chuan executive class kan ti a, hei hi Tata Safari te, Scorpio te, a rate hrim hrim a ni a. Thlakhat ah hian cheng singthum leh sangruk a ni a, tichuan, a first class kan ti a, a class in kan then ve a, cheng singthum sangli a ni a thlakhat ah hei hi. Second class kan han tih ang chi hi cheng singthum sanghni a ni a. Tichuan a belhkawm lam zawng hi chuan hei hi a motor kan hire zat nen chuan belhkhawm theih mai turah ngai ila, kan member zahawm tak pawhin min hrethiam se la, ka lo belhkhawm hauh lo mai a. Tichuan, SPO-ah hianin pali (4) an kawl ni a a hriat thu kha a sawi a, keini lam hriat dan hi chuan pathum (3) a ni. Additional Director hian a kawl leh kawl loh chu Pu Speaker, ka hre lova, SSA atanga kan hire hi ka hriat chinah chuan a kawl lo a ni.

Pu LALRUATKIMA : Sharing pattern tihdanglam a nih hnu hian Motor chartered zel tum a la ni em? A chhan chu hlawh pek tur pawh harsatna kan neih takah hian tih lai kha ka zawh belhna tel kha a ni a.

*Speech not corrected

Pu H. ROHLUNA, MINISTER : Pu Speaker, Central leh State sharing pattern han danglam chho hian min ti buai khawp a, min ti luhai khawp a, a chhan chu SSA ah hian a salary component ringawt pawh hi a tam khawp a. Chuvang chuan a saving hi kan theih ang ang hi chuan kan siam a ngai ang 50 – 50 sharing tur a nih phei chuan tih kha kan ngaihtuahna ah a lian khawp a. Chuvang chuan casual vacancy awm te pawh hi hnawh khat thei kan ni em tih te thleng pawh hian ngaihtuahna ah a awm a, tuna tlem a zawng kan neih te pawh hi hnawhkhat lo in la sawi ho tlan ni se, te pawh kan ti a. Tun ah hian a management a len ang ai hi chuan rin ai in kan hire tlem ang reng viau a ni. Necessity tak tak hi a nih na lai a awm a, SSA hi sorkar school kan neih loh na hmun kilkhawr tak tak ah an awm a, monitoring leh supervise ngai reng te a nih avangin hengte hi chu a tul dan a zirin department in a la en nawn zel ang chu.

SPEAKER : Aw le, zawhna hun a tawp a, business dangah kan kal thei a.

Tunah chuan Presentation of Report, Pu K.Sangthuama, member zahawm takin heng -

- i) Thirteenth Report on the Report of CAG of India for the year 2010-2011 relating to Public Health Engineering Department.
- ii) Fourteenth Report on Action taken by the Government on the recommendations contained in the Sixth Report of the Public Accounts Committee on the Report of C&AG of India for the year 2010-2011 relating to School Education Department te hi House ah rawn present se la.

Pu K. SANGTHUAMA : Pu Speaker, report pekna hun min siamsak avangin ka lawm e. I mi hriat angin Session hmasa lamah chungkaw rokhawlhna avangin ka tel mumal ve thei lova. Report pek chung changah pawh ka thawhpui ten min lo kep thin a, lawmawm ka ti a, lawmthu ka han sawi hmasa a ni e.

PAC hian tun Session kal mek ah hian report pek tur pahnih (2) kan nei a, PHE department chungchangah main report leh School Education Department chungchang ah Action taken report te an ni a. Pu Speaker, report pek pah a sawi lan duh ka neih chu kan recommendation ah hian a bik pawh in han sawi ila. PHE department chungchangah hian anmahni department mal ringawt tan implement hleih theih loh, Finance department leh Law & Judiciary department te nen a hmalak ho ngai turte pawh a awm a, heng ah hian a kaihnawih department te nen hian mumal takin hma la ho thei se. Tichuan, recommendation implement na ah thil a awlsam phah ang a, Committee pawh a effective leh zualin ka ring a ni. Hei hi PAC report ah chuah ni lo in Assembly Committee dang zawng zawng ah pawh a ni vek a ni, tih hi ka tarlang tel hram duh a ni.

Pu Speaker, i phalna leh he House zahawm tak remtihna in –

- i) Thirteenth Report on the Report of CAG of India for the year 2010 – 2011 relating to Public Health Engineering Department.
- ii) Fourteenth Report on Action taken by the Government on the recommendations contained in the Sixth Report of the Public Accounts Committee on the Report of C&AG on India for the year 2010 – 2011 relating to School Education Department te hi House zahawm tak ah hian ka rawn present e. Ka lawm e.

SPEAKER : A copy kha sem ni se. Chumi chhung chuan, vawiinah hian kan Chief Minister zahawm tak, kan Leader Pu Lal Thanhawla, Pu T. Sangkunga leh Pu K.S.Thanga, MLA zahawm takte he House a awm loh phalna an rawn dil a, kan phalsak a. Kan Leader of the House hian a tih tur zawng zawng chu Deputy Leader, Pu R.Lalzirliana thuneihna a pe a ni tih kha House kan hriattir ni se.

A Copy sem zawh a nih chuan Financial Business-ah kan kal ang a, tunah hian kan Minister zahawm tak, Pu R.Lalzirliana a demand No. 7, 16, 31, 38 a a pawisa hman tur a zavai a belhkhawm ₹ 12,18,90,42,000/- hi he House a sawiho atan rawn submit se la, amah i lo sawm ang.

Pu R. LALZIRLIANA, MINISTER : Pu Speaker, ka lawm e. On the recommendation of the Governor of Mizoram and with your permission. Sir, I move the demand No. 7, 16, 31, 38 for ₹ 12,18,90,42,000/- for meeting expenses during 2015 – 2016 in respect of the following departments –

Demand No.7 Excise & Narcotics Department	₹ 29,02,46,000
Demand No.16 Home (including Prison & Sainik)	₹ 5,96,03,49,000
Demand No. 31 Agriculture	₹ 2,10,76,14,000
Demand No. 38 Rural Development Department	₹ 3,83,08,33,000
Total :	₹ 12,18,90,42,000

Thank you.

SPEAKER : Aw le, Vawiinah chuan Minister zahawm tak pahnih (2) chanvo te kan la kawp leh dawn a, tunah hian Pu John Rotluangliana, Minister zahawm takin a demand No. 17, 42, 43 te hi he House-a ngaihtuah atan rawn submit sela, a zavaia belhkhawm chu ₹ 3,46,75,85,000 crore a ni a. House ngaihtuah atan tunah hian submit turin i sawm ang.

Pu JOHN ROTLUANGLIANA, MINISTER : Mr. Speaker Sir, on the recommendation of the Governor of Mizoram and with your permission Sir, I move the demand No.17, 42 and 43 for ₹ 3,46,75,85,000 crore only for meeting expenses during 2015-2016 in respect of the following departments. Demand No.17 – Food, Civil Supplies & Consumer Affairs - ₹ 2,81,69,30,000 crore, Demand No.42 – Transport Department - ₹ 47,19,12,000 crore, Demand No.43 - ₹ 17,87,43,000 crore, total - ₹ 3,46,75,85,000 crore only, thank you.

SPEAKER : Aw le, Minister zahawm takte 2 chanvo demand hrang hrang an rawn pharh tak te kan sawiho dawn a, niminah khan minute10 ami kan hman mi pakhatin? A ngai bawk hman leh turin tunah sawihona kan tan ang a. Tunge sawi hmasa ber ang le? Aw, Pu Zothangliana.

Pu H. ZOTHANGLIANA : Pu Speaker, ka lawm e. Kan Minister zahawm tak Pu R.Lalzirliana chan atang hian han sawi tan ila. Demand No.7 - Excise & Narcotics ah langsar tak sawi hmasak loh theih loh nia ka hriat chu The Mizoram Liquor Prohibition and Control Act kan hman ta hi kan tifuh hle a ni tih alang chhovin ka hria a. Chumi kawngah chuan Excise leh Narcotics lama kan officer te leh thawktute an tithain ka hria a, fak an phu khawpin ka hria. Tunhnai ah Excise Constable 25 lak thar an ni a. Heng zingah hian Chhimtuipui pum pui atangin mi 1 chiah written exam –a inhlankai ve a awm a. Chu chu vanneih thlak takin a titha pawl ni chho in 25 zingah hian telh a ni a, a tling ve ta a. A lawmawm ka ti em a, ka sawi ri ve hrim hrim duh a ni.

Excise & Narcotics hian Lawngtlai ah sawn ram an nei a, ram tha tak mai building te pawh 2/1 chu niin ka hria, ka hre chiang chiah lova an neiin ka hria a. Chu chu hman tangkai

lohin a awm reng mai a. Hman tangkai theih dan hi kan Minister zahawm tak hian min ngaihtuhsak thei se a lawmawm ngawt ang tih kan sawi a ni.

Demand a tam avangin kan hrut thuk thuk chauh mai ang a. Demand No.16 – Home Department chungchangah Law & Order a kan Minister zahawm tak Pu R.Lalzirliana'n sorkar term hmasa atanga theihtawp a chhuah a, a tihthat zia chu kan hre tlangpui a. Kan sawi nual tawh thin a, wawiinah hian han sawi leh hrep chakawm viau mahse a tul ber loah dah ta ila, an fakawm Minister leh a thawhpui te, an chhuanawm takzet tih erawh hi chu sawi loh phal chi-ah ka ngai lova ka'n sawi ve hrim hrim duh a ni.

Police-ah hian vacant post kan ngah lutuk hi a mangan thlak hlein ka hria a, suma kan harsatna vang a ni ber tih chu kan hre theuh mai. Amaherawhchu, anni hi chu pawimawh bikna nei an nih avang hian kan Finance lamte pawh hian bengsika ngaihtuahna thar senga min ngaihtuahpui hi kan mamawh a ni. Tun hnaiah city police mi20 lak tur niin selection process hi kalpui mek a ni tih kan hria a. Kan thalaite 6 ft tling chin thiau za tel an lo awm a ni tih te kan han hmuin kan hria a. An thlamuanpuiawm khawp mai, thil lawmawm tak a ni a. Mi tha tak tak lak an ni ang tih ka ring a, ka beisei a. District tinah heng ang police-te hi neih theih a chakawm hle tih rilruah a lian khawp mai. District zawng zawngah kan ti thei lo deuh anih pawhin Lunglei kan ram khawpui ber dawttuah tal saw chuan tih ve leh theih ni se thil duhawm tak a ni ang tih ka rilruah a lian hle a ni.

Forensic science lam hi luhchilh deuh hlek ka duh a, Forensic science laboratory kan nei a, justice delivery system-ah hian lungthu 3 ang deuh a ke pawimawh tak tak 3 a awm tih kan hria a. Chungte chu Judiciary, Police leh Forensic te an ni. Separation of judiciary avangin kan Judicial system a phuisui chho ta viau va. A inngahna tlak viau a ni tih kan hmu chho zel a, a lawmawm a, police lam pawh thumthat la ngai belh deuh deuh ni bawk mahsela an titha tawk viau a ni tih kan hre bawk a. Chutih rual chuan Forensic science lamah erawh hi chuan hmabak kan la nei nasa hlein ka hria. Tunhnai teah department puitlinga hlankai an ni ve chauh va, ka hriatsual loh chuan Joint Director hovin an awm reng thin a, tunhnai lawk tak takah khan Director a officiating a dah niin ka hria a. Engpawhnise, hmasawna kan nei chho hlek hlek a ni tih alang a, a lawmawm a. Chutih rual chuan National Human Right Commission te pawhin Forensic science Department hi a ngaipawimawh a. Crime detection chungchangah te, tin, tisuah lo puiin an tawrh palh lohna tur atan te hmanraw pawimawh tak an ni a, mithiam bik awmna tur chi a ni tih hriain kum 2001-ah daih tawh khan department hrang anga state tin ten din turin direction alo chhuah tawh nghe nghe a ni a.

Tunhnaiah keini pawn kan lo tipuitling chho ta a, a lawmawm a. Amaherawhchu, tuna an nih ang ngau ngauah hi chuan an tangkai tur ang hian thum chak tawk an la nilo deuhin a lang a. Equipment an nei tha tawk lo deuh ni te pawhin ka hria a, engemaw zat nei bawk mahse ala tawk lova.

Tin, staff leh man-power lam hrim hrimah pawh thum belh an ngai viauin ka hria a ni. Hman deuh khan Lawngtlai-ah crore 5, crore 6 a zat chiah pawh sawi hleih theih loh a tam State Bank atanga rawk chhuah a ni a. Khami tumah te khan a ti tute, mi tlem azawng man ni bawk mahsela a phenah milian pui pui thil ti thei tak tak an awm ang tih hi vantlangin kan ngaihdan a ni a. Khang hunlai te khan Forensic science te hi tun ang tal dinhmun a ding tawh hi lo ni se'ng chuan a tuartu tur dik tak te hian an tawrh pawh hi a rinawmin a beisei awm a ni.

A hnu deuh lawkah Lai Autonomous Council sum mawlmang em em maiin a bo bawk a, ₹ 40 lakhs bawr vel niin ka hria. Chu pawh chu harsa lo deuh a man chhuah mai tur awm ngawih ngawih nia a lan lain man loh in an chhuak ringawt mai bawk a, a thinrim thlak a ni. Hengte hi a chhan bulpui ber a ni tih chu kan ti thei lovang a, Forensic science lama hmasawna tluantling kan la neih loh deuh vang a ni tih erawh hi chu a pawm nahawmin ka hria a ni. Chuvang chuan, (SPEAKER: Kan han inthlak lawk ang e aw) (DEPUTY SPEAKER : Zawm rawh le) Pu Deputy Speaker, Lunglei leh tun hmaa Chhimtuipui District kan tih zawng zawngte huamzo tur sawn Southern Mizoram kan tih enkawl tur hian Forensic science te pawh hi kan hotuten min dahsak ve theih dan ngaihtuah se kan duh em em mai a. A office puitling a min dahsak thei chiah lo anih pawhin a mobile deuhin district mobile forensic unit han tih emaw a hming tak chu engpawh lo ni ta se, chutiang lam hawi tal pawh chu min ngaihtuahsak thei se a lawmawm tak meuh ang tih kha kan sawi tel duh bawk a ni. In inthlak chhung kha Pu Dy.Speaker, 2 minutes vel zet a nia, che a rang tawh lutuk bik lo a.

Agriculture Demand No. 31 ah hian sawi tur a tam mai. Mahse ka rilrua ka'n ngaih pawimawh laia chu NLUP te nen a tangkawpin agricultural production a thang nasa a, nichina zawhna leh chhanna hunah pawh khan kan hriat ang kha kan dinhmun hmasawna kal mek dan a ni a, a lawmawm a ni. Chutihruah chuan member tam tak te leh Zoram mipui pawhin a kan mangnghilh palh ang, mangnghilh mai atan chuan a uiawm ka han tih chu, NLUP that zia hi kawng hrang hrangin kan hmu mawlh mawlh a, NLUP avang bawk hian RKVY tun hma a kan dawn theih loh te kan lo dawn pahin NLUP avang vek hian tun hma a beisei tin pawha kan tin loh zat zat a kha, tam tak mai crores and crores of rupees Central sawrkar atang in tanpuina kan hmu a, chumi a zarah chuan Department hrang hrang Vety lam te, Fishery te, Sericulture leh department dang dang ten pawisa tam tak an hmuh phah thei te hi thil lawmawm tak a ni.

Prime Minister thar zahawm tak kan nei a, chu chuan Centrally sponsored scheme tam taka a titawp a ni tih kan hria a, a reason a rational a chu kan zuk hriat thiampui ve lo a, chutih karah chuan Mizorama Agriculture Department-in CSS a kalpui thin kut hnathawktute tana hlu tak mai tam tak te pawh tihtawp a lo nih karah hian oil palm lam erawh chu tha taka kalpui mek a ni te hi a lawmawm a, helamah te tal hian tan kan lak deuh deuh pawh a pawimawhin ka hria a ni.

Demand No.38 Rural Development Department ah hian ka sawi duh pakhat chu Pu Lal Thanhawla kaihhruai tho ministry hmasa-ah khan khatih laia Agriculture leh Horticulture te leh

Department dang dang changtu Minister zahawm tak khan he House-ah hian assurance min pek chu Centrally Sponsored Scheme chi hrang hrang a bik takin, chutih hun laia IWDP leh vawiina IWMP lo ni chho ta chungchangah te hian District office te leh thawktu dangten a concerned MLA theuh te hi AAP a taka an kalpui hmain an hrilh hre vek ang tih assurance min pe a, chu chu a taka kalpui kan tum a, kan bial lamah pawh mi thenkhat an fel viau rualin officer thenkhat erawh chuan Minister assurance awm meuh chung pawh khan kan hriat ve hi an hlau em em maia, a huatthlalaawm khawp mai.

Hmun thenkhatah chuan vawkte pakhat mi hrang hrangin position hrang hrangin thla an lakpui a, chu chu an UC ah te, documentary proof ah te an theh lut a ni tih te kan hria a ni. Chuvangchuan enpui an ngaia, vawiinah pawh hian kan Minister zahawm tak hian he House hi khawngaih takin min assure leh thei sela, kan enpui theuh theihna turin farmer leh thawktu dang, a tak tak ten an chan tur ang hi an chan tak tak theihna turin tan min lak thar sak leh se tih hi ka'n sawi duh a ni.

Food, Civil Supplies & Consumer Affairs, Demand No.17 ah hian kudam 27 sak thar a nite hi a lawmawm a. Tin, Food Security Act, India rama hman alo nih chhoh mek laia, a tira kan huphurh em em, thingtlangah 80 % vel, khawpuiyah 46 % vel chauhin he food security hi an avail theih dawn si avangin keini state pachhia hi engtin nge kan kal ang le, a midang zawng zawng hian engtin nge ration buhfai kan ei tak ang ti a kan indawm kun laiin, kan Minister zahawm tak hian thiam takin ngaihtuahna a seng a. Food Security Act in a cover baka te pawhin ration buhfai man tlawm pangai a khulh hram hram theih dan tur min han ngaihtuah chhuahsak te hi a lawmawm thlawt a, fak a phu a ni. Hengte hi a chhan bulpui ber pakhatah chuan Congress chu kan harsa emaw, harsa lo emaw sum a vang emaw vang lo emaw, mipui nawlpui hmangaihtu kan nih flat vang a ni tih hi Zoram mipuiten Pu Deputy Speaker nangmah kaltlangin an lo hriat thar ka duh a ka rawn sawi ve bawka a ni.

Demand No. 42, Transport-ah hian Tuipui 'D' Darzokai, Tuipui Lei dawh chhe leh ta siam that lehna turin kan budget-ah hian a hma ami zat chiah ₹ 216 lakhs leh point something sawrkarin min dahsak leh hi a lawmawm ka ti a, siam thuai thuai a ngai khawp mai. Ke a kaina Lei saw a upa tawh em em maia, hmanni khan ka kal ve a, ka zawh ve a, keini a zawh thang lo tan chuan hlauhawm tak a ni. Tui a lian a, a liam vut vut mai bawka si a, hmeichhia te loh theih loh a an kai a ngai a an khawngaihthlak em em. Buhfai phurhna kawngah pawh harsatna tam tak an tawh phah a, hemi karah hian buhfai kan mipuiten eitur an neih zel theihna tura kan Food Minister leh Transport Minister ni bawka hian ngaihtuahna min sen thar sak leh a pawimawh hlein ka hria a. Taxi, Maxi cab, Rickshaw permit te pawh min han pe hram hram zel a kan lawm a ni. Min pek leh zel a tum ni te pawhin ka hria a, lawmawm ka ti.

Tin, officer thenkhat in zak thak lo a Minister leh Chief Minister te ai pawha motor tha tha an kawla hi in enchian a ngai. Transport Department hian an en that pawh a ngaiin ka hria,

hei hi a protocol a ni emaw col lo a ni emaw a zahthlak a, heng zahna chang hrelo te hian zahna chang an hriat theihna tura hmalak a, kalphung pangngaia kan kal dan tur ngaihtuah pawh hi a ngai a ni.

Tourism-ah hian hmalakna tha pui pui an nei a, mahse Prime Minister thar in a ti tawp thup mai a, engtin nge an tan leh zel dan tur kan hrelo a, engpawh nise theihtawp chhuah sela, keini te pawh hi min tir duh a, 'helaiah hian lo tang ve la, helai ban kua hi lo lai ve rawh' min ti duh a nih pawhin kan in peih a ni tih kha kan sawi duh a ni. Pu Deputy Speaker, tun tum hi hun ka pelh ve deuh duai vawikhatna a ni tih i hriata min dawh hram hram vang pawhin ka lawm khawp mai a lawmthu ka'n sawi bawk a ni e, ka lawm e.

DEPUTY SPEAKER : A lawmawm e, tunge han sawi leh ang le. Er. Lalrinawma.

Er. LALRINAWMA : Pu Speaker, ka lawm e, Vawiinah Demand kan minister zahawm tak tak te chanpual kan han sawi dawn a ni a, a tam deuh a, hun kan indaih lo deuh pawhin min lo hrethiam turah ngai ta ilang, khalai kha kan sawi duh a, amaherawhchu hun kan hmang reilo turah ngai ta ilangin.

A hmasa berah chuan Home Department hi ka'n sawi duh a, kan hriat theuh angin a pawimawh em em mai a, amaherawhchu ka lut reilo ang a ka'n ti kual deuh zung zung ang a, kan bial chhung lamah luh ka duh a. Kan bial chhungah khian District Jail te sak a ni ve tawh a, engemaw deuh chuan luah luhna lai te pawh awm tawhin ala function tak tak theilo a, khing te khi min han enpui selangin kan duh khawp mai a. Tin, Sainik school sak mek a awm bawk a, khing te pawh khi a lawmawm hle maia, hmalak na tha tak tak te pawh a ni chho a, chutihruah erawh chuan kan nghakhlel a, mipui Chhingchhip khua ten engmah compensation beisei lovin ram te an lo sat thla a ni a, chumi kawngah te chuan Chhingchhip khua mipuite duh dan an rawn thlen ang thin te pawh min lo ngaihtlaksak thin turin ka'n ngen nghal duh bawk a ni tih kha ka'n sawi duh a.

Tin, Agriculture Department bikah hi chuan NLUP te awm khawmna a ni a, Agriculture Department hi a pawimawh tak meuh meuh in ka hria a, a chhan chu tuna kan GSDP hi hman ni ah vaibelchhe singkhat sangli leh zahnih leh pali vel bawr an han ti chhuak a, mipakhat in cheng nuai khat leh sing khat leh sangriat vel bawr la lut ang kan lo ni a, amaherawhchu, Agriculture sector ami zawng zawngte hianin tuna helaia Economic Survey 2014 – 2015 ang chuan sixteen point something chauh mai kha GSDP ah kan han thawh chho ve thei a. Mizoram mipui zaa sawmruk velin kan eizawna a ni bawk si a, helaia data a a lan dan ang bawk hian. Chuti a nih chuan kan GSDP thanna kha chu lu lampang lian bur ke te tak te ang mai kha alo ni thei dawn a lo ni reng mai a. Chuvang chuan, kan tan takmeuh meuh kha a ngai niin ka hria a ni. Tin, NLUP line department hrang hrang enkawltute pawh kan ngen duh chu kumin a kan non- tax revenue hmuh turah khan nikuma kan beisei aiin kumina kan beisei kha a tlem tlat a ni. Khangin a entir chu NLUP ah hian kan ram Finance Economy titute pawhin beiseina an nei sang lo a ni lo maw a tih theih tlat

a ni. Chuvangchuan line department hrang hrang changtute pawhin Agriculture bikah chuan theihpatawp chhuah ila, chuti a nih loh chuan, kan sum hrawm a lian si a, tin khatianga eng emaw hlawhtlinna kan hmuh siloh chuan thil buaithlak tak te pawh a thleng thei ang tih te pawh a hlauhawm a, chuvangchuan i tang thar leh ang u, tih te kha ka'n sawi duh a.

Hetia sawi zel takah chuan bial chhung han luh kual ka duh a. Ka bial chhungah khian Chalphaiah leilet kum khata buh tin sangli vel leh sang nga inkar thar theihna a awm a, amaherawhchu wawiin thleng hian motor a la lut thei lo a ni. Kawl ram atanga sakawr lo thleng nghakin an buh phurh an nghak thin a ni. Chuvangin link road kan mamawh tak meuh meuh a, hman deuh khan Director-ah pawh ka va ngen nghe nghe a survey turin, min lo survey sak a, a lawmawm khawp mai a, a pawisa erawh chu thuhran ni sela. Kan kut hnathawktu hun rei tak kan lo enkawl tawhna leh buh tam tak kan lo tharchhuah tawhna a nih avangin wawiin thlenga link road pawh a la awm lo hi thil pawl tak a ni a. A ram khi Lungpho pa leh Ngentiang pa pahnihin an nei a, Lungpho pa ram deuh vek a ni a leilet chu, engpawhnise, kha lai kha ka sawi chhuak duh a ni tih kha ka sawi duh a ni.

Rural Department bikah hian kal leh ta ila. RD Department hi keini thingtlang bialtute min nghawng nasa em em mai a, tin, a VC ang te pawhin kan va kutkawihna tam tak a ni a. Material Component chungchang bik hi sawi ka duh a, material component-ah hian nimina ka zawhnaah khan Pu Speaker, kumin chhung hian nuai 3040 vel bawr hmuh a ni a. Khatah khan VC te hian hnathawh kan nei ve lo a, VC te hi an pawimawh em em a, Minister lokal zawng zawng, ruling pawh ka ti lo, opposition pawh ka ti lo, official a lo kal zawng zawng lo mikhual tu te an nih avangin VC te kan enkawl dan hi a fel ber em aw ka ti a ni.

Operational Guideline 2013, Mahatma Gandhi National Rural Employment Guarantee Act, 2005 ah hian, Section 2.1.4 ah hian Gram Panchayat te mawhphurh na chungchang a sawi ah hian, 'VC te hian technical work ah hian mawh an phur tur a ni tih te pawh kha a awm a. Chuvang chuanin material component kan thawh zawng zawng hi chu technical work deuh vek mai a ni a, hei pawh hi duhsak thei ta ila a tha hle in ka hria a. State level committee in a lo rel tawh ni 11 June, 2014 dar 1 meeting thuchhuak a ni a, hetah hian material component hi DRDA ah 40% , BDO ah 40%, VEC ah 20% tih in thutlukna alo siam tawh a ni. A chhan leh vang a sawiah hian Section 135, NREGA Act 2005 in 50% tal chu Village Panchayat te hnenah hlan a ni ang a ti a, labour component zaa za chu VC ten an execute/implement avangin hei hi kan ti a ni tiin a inziak a ni. VC te hian job card hi an thawk lova, monitoring chauh a ni tih hi wawiin hian ka sawi duh a ni. Chuvang chuan job card VC tumahin an thawk ngai lo, VC te hian wawiinah heng an lo inhlawh vena te hetia kan chhuhsak lai hi thil fel lo tak niin ka hria a. Chuvangin thingtlang VC ten, association kan nei hran lo nge ni heti lama nawr pawh kan awm lova kan tuar ngawr ngawr mai a, VC te an hlawk lutuk tih kha kan thik deuh ni berin ka hria a. Chuvang chuan helai hi VC te chanvo kan rahbehsakna niin ka hria a, kan local body te kan tihchak loh hi chuan ram hian hmasawna a nei ngai lovang tih wawiin hian ka sawi duh a ni.

14th Finance Commission-ah pawh anmahni pawisa tur pawh ruahman a rawn awm tawh lova, Mizoram Finance Commission-in recommendation a pe a, kha lah kan la pawm bawk si loh avangin Pu Speaker, vawiinah hian kan VC te chanvo hi i hnenah ka sawi duh a. Kan Minister zahawm tak pawhin heng thutlukna hi min lo ennawnsak leh se, heng dante hi min lo khaikhinsak leh se tih hi vawiinah hian ka sawi duh a ni.

Tin, Food & Civil Supplies Department chungchangah han kai ve leh lawk ta ila. A hmasain lawmthu sawi hmasak ka duh a, amaherawhchu lawmthu sawi reng hleihtheih pawh hi a ni bik lova. Nikumah mega-block a awm dawn e kan ti a keipawh ka hlauthawng angreng khawp mai a, buhfai pawh tam deuh tak lei tur anih hi ka ti a. Chutih lai erawh chuan mega-block tih pawh hre hauh lo maiin kan Minister chak tak in mipui min han siam hi a lawmawm ka ti hrim hrim a khalai kha sawi ve ka chak a vawiin ah hian. Thlamuang takin mipuite pawhin engmah mega-block hre lovin buhfai a hunah kim takin kan la thei lai te kha a lawmawm ka ti a. Chu mai piah lamah khang buhfai dahkhawl sa dahna tur Lungpho-ah leh Chhingchhip Mualpuiah kudam thar hlak mai min sak sak mek bawk a, khangte kha vawiinah hian lawmthu ka sawi a ni tih kha ka sawi duh a.

Chutih rual erawh chuan lawm hleihtheih loh thil a awm ve a ni. 2014-2015 chhungin excess issue a tam lutuka a hnuaiyah hian, DCSO-ho hrang hrangah excess, issue quota aia tam pek chhuah a awm a ni. Hei hi enge a chhan tih hi ka ngaihtuah a ni, a chhan leh avang hi kan thlir a ngai a ni. Nikumah Aizawl-ah ngei pawh retailer- ah buhfai kan quota kan hmu pha lo, MLA quota zawng zawngte pawh kan titawp a ni. Chu mai ala ni lo, buhfai man tihto a ni a, chu mai piah lamah pawh inkhawmpui, inneih, khatiang zawng zawnga buhfai pek thin chu min tihtawp sak a ni. Khatih lai khan engati nge quota piah lamah excess issue hi an la pek tih hi ka ngaihtuah a ni, chuvang chuan hei hi chu min lo chhui nawn sak leh se. Chuti anih loh chuan mipui chanvote hupbet si a, department-a retailer te quota aia tam excess issue a awm leh si hi chu thil ngaihthat thlak loh tak a ni tih hi Pu Speaker vawiinah hian ka sawi duh a. Chuti lai chu lawmthu sawi chungin min lo ensak turin ka sawi duh a ni.

Tin, Transport Department chungchangah erawh chuan ka sawi duh lai leh chu, Transport Department hi a pawimawh a, Road Safety-ah chutiang khatiang Road Accident-ah kan sang kan ti a. Amaherawhchu, he road safety chungchang kan ngaihtuahnaa kan sawi tur chu sawrkar hian motor neitute leh driver inkarah hian inrawlh hi a hun tawh lo maw tih hi vawiinah hian ka sawi duh a ni. A chhan chu Interstate Maxicab te an tlan a, night bus te nasa takin kan service tir a, Maxicab-ah te pheih chuan driver pakhat chauh ten an han khalh hi chu a ngaihthat thlak loh a ni. Chuvang chuan driver pakhatin chau em emin kawngah an khalh a, keipawh hi tum khat chu tawite min khalh chhawk ve rawh a ti a ka khalh chhawk ve a ni. Chutiang chu kan va enpui a ngai tawh a ni. Anniin hlawh tam loh hlauin driver pakhat lek an ruai a, tichuan chau tawkin an khalh a, an chetsualna tlangpui hi an insu a ni tunah hian ka hriatdan hi chuan. Hriat loh kara muthlu insu hi a ang a ni, chuvangin hengah te hian va enpui ila.

Chu mai piah lamah motor fitness pawh hi kan enchian a ngai a ni. Hmannia ka hmuh phei chu a thla ka la nghe nghe a, a ke hma zawng zawngah hian a thir a lang vek tawh Lunglei sumo service pakhat phei chu. Khang te kha service laiin han keh ta se chuan engtin nge maw an awm ang le, fitness pawh kan en uluk a ngai a ni. Chuvangin fitness pawh strict ila, kumkhatah vawikhat kan tih pawh hi a tawkin ka hre tawh lo, fitness pawh hi zing lehzualin enpui ila, kan four operator te awmdan hi kan zu thlirpui a ngai a ni. Hetah accident a tam, chutiang khatiing kan ti a, thingtlang sumo service phur sang satliah pawh kan mit a kham em em a, a chhan zawk lai chu he lampang zawk hi a ni.

Chu mai piah lamah hei MLPC Act te a lo awm a, tlemin a lo samkhai deuh bawk nen, han kamnam deuh te pawh kha thil awmthei a ni a, a check te pawh kha kan uluk lehzuale te pawh a ngai a ni tih kha vawiinah hian ka sawi duh a.

Excise Department hi sawi leh ta daih ila Excise Department chungchangah hian kan tifuh viau awm te paw'n kan ngai a ni thei e. Vawiin a ka ngaihtuah tak chu crore 38 lai mai kum khat chhung a lakluh kan beisei tih a ka rilru a lo lang ta chu; beneficiaries pawh nei tawh miah lo, a in tu ten an pek char char chhiah tlingkhawm atang vaibelchhe 38 lak kan beisei lai hian kan ram pawisa hi engzat nge ram pawnah luangthla ang tih hi kan ngaihtuah ve a ngai a ni. 10% paw'n chhut ta ila vaibelchhe 380 chu a ni hrim hrim ang phairam a kan thawn thlak hi. Ka va sawi mawi lam ni lovin a hma te kha chuan Rangvamualah te pawh tu tu te emaw in an lo bilh ve a beneficiaries neuh neuh te pawh an awm alawm. Mahse vawiinah hian Pu Speaker, beneficiary an awm tawh lo reng reng zaa za kan thawn thla a, khata tang khan tlem te kan hmu a kan lawm ve em em ringawt mai a ni. Chu aia la chhe zawk chu social level-ah hian engtin nge a thlen dawn tih hi a ni, social level-ah hian engtin nge a kal ang?

Vawiinah hian kan Health Care-ah chuti zat kan hmang kan ti a, zu vanga kan buaina hian engtin nge kan hriselna a tihchhiat dawn tih pawh hi ngaihtuah tham tak a ni. A nih loh leh nupa nun engtin nge a nghawng ang? Kan chhungkua engtin nge minrawn run ang tihte pawh hi kan ngaihtuah a ngai a ni. Kei chuan vawiin thleng hian he thil hi chu ka la pawm thei lo. Zu avang hian ramhuai te pawh a tam belh lovang tih tunge sawi thei? Damlo na dang reng reng hi chu an chauh hian Lal Isua hmel ka hmu an ti, an nat te pawn Vanram ka fang te pawh an ti, zu vanga buai tawh reng reng "Lal Isua hmel ka hmu" ti tumah an awm lo, ramhuai ka hmu tih vekin a tawp a ni zu a buai reng reng hi. Chuvangin Pu Deputy Speaker, kohhran pawh a tan a ngai maithei a ni ramhuai a tam dawn avangin, hmu tu an tam dawn tlat alawm, zu vanga ramhuai hmu an tam tlat alawm tih lai kha Pu Deputy Speaker, ka'n sawi a ni.

Engpawhnisela, Tourism Department chungchang erawh chu vawiinah building tam tak kan nei a, kan la enkawl hleithei lova, chutih rual erawh chuan heng building sak ngawr ngawr lo deuh hian a lo lut tur lamah hian tan lak dan te pawh tehkhawng siam chhuak ta ila tih kha ka

sawi duh a. Hun a tawp ngun tawh bawk si a, engpawhnise Bill hrim hrim hi chu ka pawm a ni tih kha ka'n sawi a ni e. Ka lawm e.

DEPUTY SPEAKER : Tunge sawi ang le? Pu Sangthuama.

Pu K. SANGTHUAMA : Pu Speaker, ka nilen zawh loh tak hlauhin min lo hrethiam ula, ka hritlang a na tulh tulh mai a. Kan House Leader pawh hi a hritlang a la reh thei lova waviinah pawh a lo tel thei lova. Chuvangin tlem han sawi ve ka duh a Pu Deputy Speaker.

Waviinah hian demand pawimawh deuh deuh kan han sawi chho dawn a ni a, a hmasa in Demand No.17 na, Food, Civil Supplies & Consumer Affairs. Tun a thil pawimawh em em ta Central atang a lo kal Food Security chungchang hi tlem han sawi ka duh a. Consultative Committee-ah te min rawn telh ve a kan Minister zahawm tak hian, thil thui tak te saw ti laiah pawh kan sawi a. A thil tum te leh a kalphung chu chiang takin ziah vek a ni a, helai a sawi pawh a ngai hranin a rinawm lova. Tin, a thil tum reng reng hi kan MLA te leh kan mi pawimawhte chuan neih theih vek ni se a that ka ring a.

Helaia ka sawi duh chu kan Minister hian tha taka tih lam kha a sawi uar ber kha a ni a, ka pawm zawng tak a ni a, tunah hian hemi Food Security a beneficiary te thlan dan tur chungchangah hian complaint tam tak ka hnenah pawh a lo lut a. A ruat danah hian kan uluklo deuh hlek emaw ni chu aw tihna a awm a, hetiang thil tenau ti mai ila, thil ruat ang chi ah hian fimkhur a ngai khawp mai a, MLA te pawh hi va inrawlh zel loh a tha khawpin ka hria a, tin, kan Minister te pawh heng hi chu a ruattu tur fel takin heti laiah hian a awm vek a, heta mi ang hian kal mai ila, he thil hi a nihna takah chuan party a lak chi pawh a ni lova, Central atangin Congress hun lai atanga an rawn ruahman tuna BJP in a rawn kal chhohpui ta zel a ni a. He thilah hian tumah thlei bik awm lohna, a phu tena dawn chauh tur a ni a. Tunah hian kan House Leader hi a lo kal thei lova, a hriata sawi hi ka duh viau a nia, mahse a la hre tho turah ngai ta ila, a aiawhte pawh an awm a, hei hi felfai takin kan hotute hian rawn ngaihtuah ula.

Kan Minister zahawm tak Food Civil Supply ami pawh hi hei hi kan ngen duh a, waviina DCSO thenkhat a zavai pheih chuan an ni lo ang a, ro an rawn reldan pheih hi chu a lungawi thlak loh deuh hlekin a lang a, heng hi rawn siam tha leh ta ula, rualkhai takin, a hmu tuten an hmuh theiha tha taka an dawn theihna tur chiah hi Food Security-ah hian kan ngaihtuah a ngai a, chuvangin helaia a select tute thlan danah hian a rual khailo deuh a, chuvangin hei hi ka chah ngawih ngawih duh a.

A sawi vek sen loh ang a, khaw thenkhatah an ruat dan helai ami hi Chairman-ah chuan District Civil Supply Officer a ni tur a ni a. Vice Chairman-ah hian President Village Council emaw Local Council emaw a ni ang a. Tin, Secretary-ah hian Chairman in khawchung mi lehkha thiam a ruat ang tih a ni a. Assistant Secretary-ah hian Secretary Village Council emaw

Local Council emaw a ni tur a ni a, tin, Sub Village Committee, Sub Village awmnaah chuan an ni tur a ni a.

Tin, member-ah te hian Village Council emaw Local Council emaw Member te an ni ang a, Sub-Village ah pawh chutiang bawkin an ni ang a, tin, mi pahnih two prominent person within the local area tih a ni a. Heng hi fimkhur taka tih a nih loh chuan kan inchhawp chhuah dan a bul atangin DCSO Office thenkhatah khaw thenkhat harsatna tawh an awm tan mek a, hei hi ti lo hram hram ila. Kan Minister zahawm tak hian Mizoram pumpui hi lo veng deuh hlek sela. Hetiang thilah hian harsatna lian zawk a thlen mai thil awm thei a ni a, chuvangin he Food Security hi India ram pumpuia hian a dik thei ang ber a hman theihna turin guideline te siam vek a ni a, hetiang ang hian, khang kha a tluan theih nan vawiiinah hian he House-ah hian duham taka han sawi ka duh a. Thildang kha chu kan la sawi chho zel ang a. Chuvangin mirethei tan a tha a, kan Minister zahawm takin hmannah pawh a sawi a, hemi bak mipakhatin 5Kg an la thei ang a cheng 3 in. Chumi cheng 3 a 5Kg a lak baka chu 8Kg a tlin theih nan 3Kg dang hi ₹ 15 in ration pangngaiin a la thei ang a la ti leh zel a. Chuvangin a tha khawp mai a, 8Kg mi pakhat tana thla khat a lak theih turah 5Kg kha cheng 3 in an la ang a, cheng 15 in a bak 3Kg la awm a kha cheng 15 in, cheng 45 in 3Kg an la thei ang a. A tlangpui thu-in Aizawlah chuan thlakhat vawi hnih te sem a ni tlangpui a, puitlingin 2 Kg te kan dawng thin a, tichuan thla khatah hian 4Kg vel emaw chauh dawn a ni a.

Hetah hi chuan 5Kg an dawn bakah 3Kg dang la dawn leh tur a ni a, hetiang ang a kal theih chuan hun kal tawh te leh tun hma ai mahin kan thatpui lehzuah dawn niin a lang a, a lawmawm khawpin ka hria a. Chuvang chuan politics thil hi helaiah hian awm miahlo se ka'n duh a. Kan House a member zawng zawngte pawh hian hria ila, mahni bial theuhah inrawlh vak tum lo ila MLA te hetiang ang chiah hian tha takin ti mai rawh u, a party emaw khatiang zawng ni loin khawtlang a YMA te MHIP te MUP te hetiang a ruat thei tur an nihna laiah khan tha taka ngaihtuah thei turin ruat mai rawh u ti tawp ila, a thain ka hria a. Ka bialah phei chuan kei ka inrawlh dawnlo a. A ngaihtuatu turte Sorkarin fel tak a rawn siam thlap ang hian kal mai selang chu chu kan ram tan leh kan khawtlang tan, kan Sorkar tan, kan zavai atan a that ka ring a. Chu chu vawiiinah hian ka'n sawi chhuak duh a ni a, kan minister te kan ram hruaitu awm khawm helaiah kan ni a, chu chu hre theuh ila a that ka'n ring a, hemi hi kan ram in kan enjoy thei dawn a, a lawmawm khawp, harsatna tam tak a su kiang ang tih ring ila.

Tin, pakhat lehah chuan Food Civil Supply tho ah Tanhrila FCI Kudam khu kan buaipui khawp mai a. Ka bial kawng chhiahna ber pawh hi quintal 200, 300 dawn dawn phurin nitin a mak a makin a rap a, a hrual thin a. Khulai kawng khu a tha hleitheh lova. Chuvang chuan FCI Kudam hi a rang thei ang ber a kan Minister hian ngaihtuahna tak tak hmang a khutah Sairang lamah khuan a sawn pheina a hma thei ang bera ngaihtuah turin vawiiinah hian kan rawn in, kan ngen nghal bawh a ni.

University kawng chhiat hma na ber hi chu kan Supply Kudam kawng a ni a, a rap tute hi an tam khawp mai a rit si a, tha deuh hlek te pawhin siam ta ila, a raptu an tam viau hi chuan a chhe hma a, chu chu a rang thei ang bera sawn theihna ngaihtuah theih chuan a lawmawm khawp ang tih kha ka'n sawi duh bawk a. Duham lo ila, kha kha Food and Civil Supply ah chuan taw mai sela.

Home lamah hian han kal leh ta ila, Demand No. 16 naah khan, hei zu kan han zuar ta a, engpawh nise kan zu zawrh hi a control na hi tha sela, tunah pawh permit tam tak kan pe tawh a, a zuartu tam tak kan awm tawh a, chutih lai chuan hman niah te khan permit mang lemlo a zu lei chhuak mai mai kha an awm deuh a. Hei hi a thla kha kan la chiah ta lova, mahse waviinah sawichhuah tha ka ti tlat a, control na tha tak nen zawrh theih taw, lak theih taw, kum upat lam engkim tha taka ruahman fel thlap a ni a. A ruahman fel thlap ang hian kalpui ta ila, ti lova duh zah zah hralh chhuah mai emaw hotuten an lo hriat loh anih avang a khatia paipawn a ti mai mai lo khan, chak takin kan Home Minister hian lo en deuh se a thain ka hria a, khami anih chuan kan tum ang ram kan thlenglo ang tih a hlauhawm a. Chuvangin waviinah hian khami chungchang kha ka'n sawi chhuak duh hrim hrim a, a permit nei chauh ten an lei theihna turin khauh zawkin he Dan hi kenkawh ni se tih kha waviinah hian ka'n sawichhuak duh a ni.

Tin, Agriculture hi Mizoram-ah hian kan hlawhchham angrengein ka hria a, kan bei rei tawh a, waviinah pawh hian kan hlawhtlinna lutuk hi ka la hmu chiah lova. Kan kalphungah hian tlangram lo neih bansan kan han ti a, kan bansan tak tak thei baw si lova. Tunah hian lo kan neihah hian hmanlai ai chuan a thar tha tawh zawk a, tin khat hmunah phur 50/70 te an thar thei a. Hmanlaia lo kan neih ve lai chuan tin khat hmunah phur 30 bak kan thar thei lova, a ram a tha zawk a. A chhan chu kan thlawh dan leh kan enkawl dan in a zir lova, zau pui pui tin 30 hmunte kan nei a, kha kha hah takin kan thlo a, a thar tam thei lova. Tunah chuan tin khat hmun te, tin hnih hmun lek lek te an nei a, fai takin an enkawla kha khan tin khat hmunah phur 50 te alo thar a phur 70 te, tin 2/1 hmun lekah chhungkaw tlai a lo awm thei mai a. Chuvangin, a thlakna chiah hi kan la hmu fuhlo a nih pawhin lo neia eizawna, buh chinga eizawna hi thlingtlangah hian la encourage tur niin ka hria a.

Kut hnathawk mi kan ni a, hlo thlo thang te kan ni a, kan thlak tawp theih hma chuan hei hi chu tawp tura inzirtir loh ni se, ei leh bar kan tih ang buh hi chu kan la thar tam zawkin rinna ka nei a. Kan Minister-te pawh lo zovin an kal thin a, a lawmawm a, kut hnathawh hi ngaihsan tur a ni a.

Agriculture atang hian Maite te, Berul te, Bawkbawn te, engkim mai hi kan khua Sihfa-ah phei chuan kum khatah hian cheng nuai 70/80 nuai 100 dawn lai an lei ziah a ni, chu chu hetia an lo neih atanga an rawn thar ve a ni a, buh bakah khan, tam tak tak kum khatah an thar thin a ni. Aizawl-ah an rawn phur thla a zanah an rawn kal a, zing

dar 3:00-ah an rawn thleng a, an khar tir a, an haw leh mai a. Chutiang chuan Sihfa-ah khian ei leh bar kawngah harsatna nei lovin vawiin thlengin an awm a. Pu Deputy Speaker minute hnih/khat lek hun min pek belh theih chuan ka lawm khawp ang. A dang pawh sawi tur tam tak a awm a, mahse kan sawi vek seng lovang a Department zawng zawnga kha chu.

Transport hi a pawimawh khawp mai a tunah pawh sum an lalut tam khawp a lawmawm ka ti a vaibelchhe 21 vel zet Transport hian an lalut a ni, henge hi fak tur an ni a. Department tam tak hi a dik chiah chuan pawisa lalut lo kan ni ve thova. Chutih rual chuan Transport Department-te hi kan rel kan rel a 'eithladuaki nu' te kan ti a tunhma atangin, mahse vaibelchhe 21 an lalut thei a, mi tam takin, mi rethei ten an chhawr a ni. Bus-ah te tlawm zawkin an chuang a, Sumo a chuang thei ve lo pawisa neilo te an chuang a, chuti chungin pawisa tam tak an la lalut a, an ropui khawpin ka hria, ka lo lak tawh vang ni hauh lovin, a Minister pawhin a zir bawk a theihtawp a chhuah a Supply-ah leh Transport-ah nasa takin hma kan sawn niin a lang a.

Amaherawhchu, chutih rualin Sumo Counter erawh hi chu lo enchiang zel se a thain ka hria a. A chhan chu thingtlang atanga an lo kalna aia a let deuhthawa tam pawisa Aizawl-ah hian an chawi zel mai a. Khawpuiah hian dar 7:00Am velah chuan chuti vakin motor a tawt love, dar 7:00 Am- ah te chuan an kal fai vek mai a. Heng hi chu ngaihtuahna thar hman a tha khawp mai. AMC lam kut a ni nge, Transport lam kut. AMC pawh hian an hma loh tur hi an hma chho zel nge ka hre lova, khalai kha chu an kut pawh lo ni ta sela, helam atangin thurawn a pek theih a, kan Ministry palzut chuan engmah tih theih an nei chuang lo. Khawpuiah thu viau mahse Ministry-in awm tawk, mipui tana tha tawk a tih ang chu thurawn a pe ang. Awle, a dang chu sawi tawhlo mai ila Pu Deputy Speaker, ka lawm e.

DEPUTY SPEAKER : Senior a nia kan han khap hreh deuh a, Pu Chalrosanga a phar hmasa a, a dawtah Pu Lalrobiaka.

Pu CHALROSANGA RALTE : Pu Deputy Speaker, ka lawm e. Kan Minister zahawm tak Pu R. Lalzirliana Demand No.16 atang hian tan ila. Ka bialchhung han sawi ve ila. Home Department-ah hi chuan lawmthu sawi bak hi chu tih tur kan nei lovin ka hria a, bial mipuite tan thil lawmawm tak tak mai min pe a. Jail-te hi ngaihtah theih a ni a, kan tlawh lo fo mai a. Amaherawhchu, kei chuan tum hnih lai mai Lunglei District Jail, Sazaikawn a awm saw ka bialchhung a awm a nihna angin ka zuk tlawh ve tawh a, kan hotute hnenah an harsatna te kan han thlen a chutah chuan duhsak takin a building-te leh eng engemaw tuamthatna nuai 80 chuang man min pe a, an chungah hian lawmthu ka sawi duh a ni.

Lunglei District Jail, Sazaikawn-a mi hi tunah hian a tawt tawh khawp mai a mihring 170 awmna turah hian a chang chuan 200 atanga 250 chuang inmates kan nei thin

a ni. Kan hotute pawh hian hrehawm an ti thin a. Tunah hian Prison I.G.-te leh kan Home Minister hriatpuinain Hauruang lamah ka bialchhung thovah hian Village Council Member-te leh bial mipuiten thahnemngai takin hmun tha tak mai Sorkar-ah an rawn pe a. Hemi hmunah hian District Jail changtlung tak mai sak theihna tur min rawn pek a vangin bial mipuite chungah pawh lawmthu ka sawi duh a. Kan hotute kut a thleng tawh a, survey te pawh an rawn nei tawhin ka hria a, chutah chuan kan Minister zahawm tak mai ka ngen duh chu DPR te a rang lama siam a, Hauruang khua-a District Jail tha tak mai kan siam theihna tur kawngah hian hma min laksak se tih kan sawi duh bawka ni.

Ka bial chhungah hian sorkar hmasa khan ram thahnem tak min lo pe tawh bawka ; Venglai-ah, ka pianna veng a ni lehngal a. Venglaiah Auditorium tha tak mai UD&PA hmalakna in Venglai mipuite hman turin Home Department hian an ram min rawn pe a, Home Department Minister chungah lawmthu bial mipuite aiawh bakah Venglai mipuite aiawhin ka sawi duh bawka ni.

Tunah hian Mizoram-a la awm lo Grade-IV Police Station sakna tur sum nuai 216 tunah hian a awm mek a, amaherawhchu eng engemaw rokhawlhna hrang hrang a awm a, a sakna tur hmun leh hma te pawh kan hotute leh bial mipuite leh Lunglei-a thahnemngai pawlten harsatna tlema zawng an rawn thlen a ni awm a amaherawhchu, he Grade IV Police Station hi kan nei thei a nih chuan Lunglei mipui tan hian thil thatak, rotling tak a ni dawn tih hi ka ring tlat a. He Grade IV Police Station Lunglei-in kan nei thei anih chuan, a ken tel tur chu nakin lawka CCTV te, Traffic Light Control tihna zawng zawngte hi Central atangin awlsam takin kan la hmu leh thei dawn a ni. Chuvangin, tunah pawh hian hetiang ang harsatna awm chung hian kan Home Minister zahawmtak hian huaisen takin hma rawn la se, District danga dah mai lovin, Lunglei District ngeiah dah turin ka ngen ngawih ngawih bawka ni.

Tin, hei Buarpui khua hi ka bial chhungah chuan khaw pawimawh ber pakhat a ni a. Helai hian Police Out-Post hi min dahsak thei hram turin ka ngen duh bawka. Buarpui leh Aizawl kalna tlangdungah hian Police hmun pawimawh pakhatmah a awmlah avangin, helai hi khawngaiha kan Home Minister hian min ngaihtuah saka, min ngaih pawimawhsak turin ka rawn ngen duh bawka ni.

Pu Deputy Speaker, Demand No. 7-na Excise & Narcotics Department-ah han lut leh ila. Hei hmanni lawkah khan Constable 25 lai mai Department-in a la a, a lawmawm ka ti khawp mai a. Amaherawhchu, hei hi a la tawka lo deuhin ka hria a kei chuan. Chuvangin manpower te pawh hi kan Finance hotute leh kan Home Minister-te pawh hian hei aia tam manpower hi la thei se ka duh a. Hei nimin Unstarred Question-ah khan an zawt a, vendors 27 lai mai kan lo awm tawh a. Hetah hian Constable hi pakhat tal duty vek tur a ni tlat mai a, MLPC Act leh Rules ah; Chuvangin, kan Excise hotute leh an

naute thawhrim zia chu kan hre vek ang a. Amaherawhchu, hetiang vendors a rawn pung chho zel a nih chuan manpower-te pawh hi an indaih dawn lo a ni.

Vawiinah pawh hian kan hre vek ang a, No. 4 te an man thu tukin newspaper Vanglaini-ah te pawh a lang a. Excise & Narcotics Department hian Heroin te pawh an la man zel a ni. Amaherawhchu, heroin-te hi a la hluar nasa khawp mai a. Chuvang chuan kan Excise & Narcotics Department tan hian Constable dang, a lo ber ah 25 dang tal hi han la leh thei sela chuan a va tha dawn em tih hi vawiinah hian ka rawn sawi duh bawk a.

Tin, a bik takin nichinah khan Er. Lalrinawma-te khan an rawn sawi a, hemi MLPC Act chungchangah khan an rawn sawi a. Control-na hnuaiah hian tunah vigilance te pawh hi tha taka an tih ka beisei a ni.

Tunah hian khawl tha tak tak Breath Analyser te pawh kan nei a. Hengte pawh hi hmang tangkai leh zual se, manpower kan dahbelh thei a nih chuan, tuna sumo te, taxi te leh bus driver-te pawh an chhuah dawn leh an rawn thlen te pawh hian check deuh zat zat se chuan, engemaw, chetsual palhna pawh a tlem deuh ang tih hi ka ring tlat a ni.

Pu Deputy Speaker, Agriculture leh R.D. lampang a kha chu han kalsan tawh mai ila. Khalai kha chu kan hotuten an rawn sawi mai ang a. NLUP leh rangva sem tur ngenna tur kha chu Pu Piana khan a rawn sawi leh mai turah ngai ila.

Pu John Rotluangliana Demand No. 42-na Transport Department ah hian han lut leh lawk ila, tawitein. Hei Lunglei-Aizawl MST Bus Service hi ka hriatsual loh chuan route-ah chuan a hlawk ber pawl a ni a. Tin, sumo service te pawh hi a tam khawp mai. Hetihlai hian kan Minister zahawmtak hian Lunglei leh Aizawl Service hi daily a pakhat mai ni lo, zing chhuak leh chawhnu chhuak te emaw chaweikham a chhuak turte pawh, bus dang nakinah Budget dangah bus thar leina tur te dah leh thei se, a va lawmawm dawn em tih hi ka rawn sawiduh a.

Tin, Demand No. 43-na Tourism bikah hian han lut ila, Mizoram hi kan vannei a, Tourism-ah hian hei Eco-Tourism te kan han ti a. Natural beauty kan nei a ni Mizoram hian. Chuvangin, hetah hian Officer lian tak tak Vai-te mihrang hrang Sap te pawh an rawn kalin hmun nuam, climate nuam an rawn ti ziah a, engatinge tourist lampang hi in va hip lo ve, an rawn ti thin a ni. Hemi kawngah hian Pu Deputy Speaker, ka han sawiduh chu, keini hian natural beauty tam tak kan nei, hei puk tha tak tak, adventure sport tur kan nei, Vantawng khawhthla tihte kan nei. Hei hmanni lawkah kan Minister zahawmtak khan trekking route engemaw zat siambelh leh tur a ni tih te kha a rawn sawi a. Hengah te hian tourist kan pawhluh theihna tur hian hma kan lak leh zual hi a ngaiin ka hria a.

A bik takin Mizo nula B. Lalruattluangi chuan Serow Tour Millenium Centre-ah khan a lo din daih tawh mai a. Indian Association of Tour Operatist te nen hian an lo inthlunzawm tawh bawk a. Amaherawhchu, vanduaithlak takin anni kha international tourism a a thawhpuite nen Dubai lama an kal tumin a chesual palh hlahh mai a, a boral ta nghe nghe a.

Pu Deputy Speaker, a pawl ka ti khawp mai, hetiang ang entrepreneur, private entrepreneur te, thalaite nena Tourism chungchanga hma an rawn lak te hi keini a Sorkar hian, Pu Deputy Speaker, khawngaih takin minute hnih khat lek hei hi ka tawpna tur a ni e. Hetiang ang tourism kan chawisan theihna tur kawng an la te hi a ropuiin, a lawmawm ka ti a. Chuvangin, kan sorkar hian hetiang ang private entrepreneur te hi chawisanna kawng, kan tihphura, encouragement kan pek tam a, private entrepreneur te hi an hlawhtlin theihna turin hma kan lak hi a pawimawhin ka hria a ni.

Hei tunah pawh Anthurium Festival kan ti a, hetah pawh hian sum tamtak kan hmang a ni. Khatianga hman ai chuan hetiang ang Private entrepreneurs te leh tourism, Mizoram kan neih kan Blue Mountain te leh hmun hrang hrang kan neih te hi phochhuah a, internet-a site te inphochhuahna atan hian heng sum te hi hmang ta zawk ila, kan tangkaipui zawk angem aw tih te hi ka rilruah hian a awm a ni.

Tourism chungchanga ka rawn sawiduahna chhan chu, kan thalaite hian hetiang tourism kan chawisan theih chuan inhlawhna te pawh hi kan nei dawn a ni. Kha kha Pu Deputy Speaker, hun chep tak karah ka rawn sawi theih nise, ka hma a mite ang khan sawitur a tam a, sawi zawh vek theih pawh a ni lova. Amaherawhchu, vawiina kan Minister 2 ten Demand an rawn siam Pu R. Lalzirliana leh Pu John Rotluangliana Demand te hi ka thlawp e tih kha ka rawn sawiduh a ni. Ka lawm e.

DEPUTY SPEAKER : I pel vak love, a lawmawm e. Pu Lalrobiaka.

Pu LALROBIAKA : Pu Deputy Speaker, ka lawm e. Demand No. 17, 42, 43 Pu John Rotluangliana Demand-ah hian han sawi ila. Vawiinah hian sawitur a tam hle in ka hria a. Food, Civil Supplies & Consumer Affairs atang hian han tan ila. Thil lawmawm tak mai chu hei Mega Block an ti a, chutihlai kar a mega block a awm dawn a ni tih sorkarin an puan laiin thenkhat kan lungngai em em a. Thenkhatin chheiraw an ti a, min thlir a ni. Party chhung leh Party pawnah leh Mizoram chhungah pawh kan mangang hle a. Engtinge kan tih ang, Motor ringawt hi chuan kan inthiar vek thei dawn si lova, helicopter te hian buhfa a thlak theih angem tiin kan ngaihtuah a ni. Amaherawhchu, vanneihthlak takin Minister tha tak mai tuan tha, a hun leh hmun pawh sawi lo, a tul a nih chuan international border pawh pel rawka kan mi leh sate tana chaw an nghei lohna atana hma latu kan han nei hi a vanneihthlak hlein ka hria a.

Tam takin kan hria ang a Tahan thlengin, a piah lam thlengin khatiang khanin mahni dinhmun pawh sawi hleithe lovin kawng hrehawm takah an kal a ni tih te vawiinah House-ah ka'n sawi duh a. Chung avang te chuan vawiinah mega block kan nei chungin kan zokhaw lamah, kawng harsa tak takah pawh tumah chhuanchham awm lovin, harsatna em em taww lovin, a awm ta lo em ni ti hialin thenkhat khaw chengker deuhah chuan an lo ngai hman a ni. Chutiang chung chuan hei, kan Minister chak tak hian he Food & Civil Supply hi a enkawl a, a lawmawm hlein ka hria a.

Tin, chu mai ni lovin ngun zawkin computerisation a'n ti chho a, chutah chuan bogus ration card kan han tih ang chi te kha tam tak paih a lo ni a. Chumi atang chuan Pawisa tam tak, a vaibelchhe telin pawisa kan hmuchhuak a ni. Chutiang avang chuan vawiinah hian sorkar pawhin thlatina vaibelchhe 12 dawn lai kan sen thin chu tuntuma Food Security Bill lo awm chho nen, tam tak kan save dawn ta niin a lang a. Heng avangte hian a lawmawm hlein ka hria a ni tih ka'n sawi duh a.

Tin, Transport Department-ah hian han kal leh ila, Transport Department hi sick unit kan tih ang chi Public Sector Enterprise kan tih ang chi ang thawthanga ngaih tawh sick unit hetiang hi a'n chang chho a, hlawkna tam tak kan han hmu chho hi a thain ka hria a, a lawmawm ka ti a, lawmthu ka'n sawi duh a. Tunhma pawhin staff tha tak tak an awm nachungin vawiinah chuan kan tha ta hle mai a. Hei, kei zin mi ka ni a, hmun hrang hrangah ka zin thin a, driver te, an conductor te vawiinah hi chuan an fakawm hle a ni. Bus-ah pawh tawngtai tur awm loh tum pawhin tawngtai thei zel an nei tawhte hi ka lawmpui a. Minister tha tak kan neih vang te pawh niin ka hria a. Tin, hlawkna tam tak government-ah chhiah kan ti dawn nge ni, khatiang khan hlawkna theh luh tur an han nei te hi a lawmawm hle a ni.

Tawi te tein sawi ila, Tourism-ah hian hma kan sawn chho ve zel a. Amaherawhchu, Tourism-ah hian ka vui vena ka'n sawi duh a, hei, border area-a awm kan ni a. Kan bial, a bik takin minority te kan nei a, Marpara-ah Tourist cottage/lodge i sa teh ang kan ti a. Amaherawhchu, vawiin thlengin hma min laksak theih loh piah lamah a fund kan hmuhna thin te pawh tihtawp lailaww a lo ni leh zel a, a vanduaithlak hlein ka hria a. A hmun kan nei a kan ti a, khati chho kha a ni a. Engpawhnise, hun lo la kal turah min ngaihtuahsak dan a hriain ka ring a kan Minster hian. Chutihruah chuan heng kan House Tourism-in an enkawl hrang hrang te, tourist lodge te quality tha zawka kan enkawla hengah hian sum siamna tur tam tak a awm thei a ni tih hi a langin ka hria a. Chungah te chuan nasa zawkin tan la turin ka duh a ka'n sawi lang duh a ni.

Tichuan, Excise, Home leh Agriculture te hi han sawi tum leh ta ila. Excise & Narcotics Department-ah hian kan hriat angin sum tam tak mai beisei kan han nei a, 35068 crore hmu turin kan inbeisei a. Kum kal ta lamah khan MLPC Act kan neih hma khan 4.91 crore kan hmu a ni a 2014-2015 ah khan. A jump nasa hle dawn a ni. A lawmawm hlein ka hria a, hei hi sawi chhiat leh sawi danglam te kan han tum thin naa amaherawhchu vawiinah hian heng zawng zawng

kan han nei thei tur hi kan vannei a. Sorkarin nasa taka a tanlakna te, tin, chumi piahlamah chuan a Department hnathawktute hei aia tam pawh hi hmu thei dinhmunah an ding a ni tih hi ka'n sawi duh a.

Tin, chu mai ni lovin ka'n sawi belh duh chu hemi chungchangah hian hmun hrang hrangah kan kal thin a, Sikkim-ah te, Goa-ah te. Chung hmunah chuan anmahni local zu kan ti mai ang a, chungte chu an promote thiam em em mai a ni. Enge ni a hming an sawi kha ka hre chiah ta lova, Goa-ah khuan Fendi an ti nge ni Fenny an ti, khatiang kha a then quality tha tak tak te a awm a, tlema tha lo deuh te. Chungte chu bur mawi tak takin, tourist-ho khan an ngaisang em em a ni, i'n tem ve chhin teh ang an ti a. Khatiang khanin helaiah kan buh zu kan tih ang chi te pawh promotion tha takin han nei ila, chung atang chuan phai atanga kan lak ai maha hlawkpui theih tur khawp pawhin hma a lak theih dawnin ka'n hria a. Khati zawng te pawh khan kan Minister-ten ngaihtuahna han neiin kum dang, kum lo la kal turah pawh hian hma han la se a tha awm mang e tih rawtna ka nei bawka a ni.

Tin, Home-ah hian kan hria a, vawiinah dante harsatna lo awm thin mah se an kut phuar phelh meuh chuan kan police-te hi an fel a ni, an tha a ni. An thil chhuinaah pawh hian an tha a ni. Chuvang chuan vawiina kan hlawhtlinna tam tak, state dangah pawh misual an man chhuak mai a, hmun dangah thil tih mak tak takah te pawh man chhuah zel an ni a. Heng kan achievement zawng zawngah hian kan sorkar hnathawhna that zia te, kan Home Minister-in a hneh zia te a lang chiang hlein ka hria a.

Han sawi leh thin ila, hel awmna bial te kan ni a, hel kan neih reng thin avangin harsatna tam tak kan tawka thin a, inlambunte kan tawka thin a kan bial lamah te hian. Chung nikhuaah pawh chuan kan Home Department, kan police-te, kan security-te that zia te, tin, an inpek zia te, chu mai ni lovin a changtute Minister-te leh Parliamentary Secretary te an prompt zia te, hei hi a chhinchhiahtlak hle a ni tih hi ka sawi duh a.

Tin, ka sawibelh leh duh chu kan sawi thin angin vawiinah hian hel khawitu ni lovin hel um chhuaktu he sorkar hi a ni a. 2007-2008 chhovah te chuan keipawhin mit ngeiin ka hmu a, AK-47, a motor neitu chu sawi lo mai ila, Aizawl atanga phurhthlaka Bangladesh-a pek thlak tam tak, tin, Mizo hmel pu si mahse Mizo ni si lo Bangladesh-a phurhthlak tam tak an awm a ni. Ka hria a ni, ka hmu a ni, chungte chu khatih laia sorkar neitute naute motor leh a phurtute ngei kha an ni tlat a ni. Chuvang chuan, vawiinah chuan chung zawng zawng chu awm lovin, sorkarin hel a duh lova, tin, khatihlaia kan Chief Minister khan Discretionary Fund pawh Hel hoin min ei zawhsak a ni, ti hialin House-ah pawh a sawi a ni. Chutiang te chu kan ni a, a tuartu kan ni bawka a ni. Pu Deputy Speaker, tawitein Opposition ho kha i duhsak thin si a, mi'n duhsak ve teh tun tum chu.

Phaileng-ah kan nula pakhat chu kahhlum a ni. Amaherawhchu, kaphlumtuten case pawh an neilo, an weapons pawh man sak an ni lo, a buaithlak hle a ni. Hnam run kawtah pawh an

inthat hial a nih kha, chutiang dinhmunah chuan an ding a ni. Chuvang chuan, vawiinah chuan raltiang ram kan kai tawh a ni lawm ni ka tia ni. Chutiang chu a ni a, chuvang chuan kan Home Minister hi ka fak a. Tin, hemi Demand a amount pawh hi a tha thawkhat hlein ka hria a. Amaherawhchu, hemi piahlahmah pawh hian tanlakna tur tam tak kan neiin ka hria a. A bik takin hei, cyber kan tih lamah te pawh hian kan finna te, kan thiamna te, a nawlpuiin kan dak zau chho zela, hengah hian anni pawhin nasa zawka an man chhoh zel hi a ngai dawn a ni tih hi ka'n sawi duh a ni.

Sawi loh theih loh, agriculture-ah hian nasa takin tan lak a ni a. Kan hriat angin agriculture a hma kan sawnna hi a chhinchhiahtlak hlein ka hria a. Agriculture-ah hian a bik takin NLUP 1st phase leh 2nd phase atanga beneficiary 11282 hnenah tanpuina pek an ni a, WRC (Wheat, Rice Cultivation) kan tihah khan. Chutatanga buh thar pun dan hi a chawimawi tlak a ni. Kum 5 chhung hian buh thar chu 60679 mt a ni. A hmaa kan hmuh thin te chu 40000 tih vel bawr te a ni chhova. Amaherawhchu, kum 5 chhungin hma an han la tak tak a, NLUP-ah te hna an han pe chhova chutatanga a punna ringawt hi 13478 mt lai a ni chho a ni.

Hei hi India sorkar pawhin a ngaipawimawh a, a ngai ropui a lawmman te hial a pe a ni. Vawiinah hian kan mipuite an sual lo, an taima, hnathawh tur kan kawhbmuh thiam chuan thawh tur tam tak a awm mai piahlahmah mipui an phur a ni. Chuvang chuan, helaiah hian nasa zawka tan lo la tur te, tin, mipui pawh vawiinah hian an dawnthleng an siamrem chho zela, chu an dawnthleng an siamrem that chhoh zelah chuan production nasa zawk kan nei chho zel dawn a ni tih hi sawi loh theih loh niin ka'n hria a.

Pu Deputy Speaker, helai hi tawite sawiloh theihloh sawi leh ka duh chu, oil palm chungchangah hian kan lo thang nasa em em tawh mai a, kan farmers te hnenah sum tam tak a lut tawh bawk a. Farmes-ho an phur em em mai a. Tin, mechanization kan tih atangin sum tam tak sengin part dealer te, mini part dealer te, water pump chi hrang hrang te kan han pe chho zela. Heng avangte hian nasa takin oil palm-ah pawh hian hmasawnna kan nei a ni. A chinchhuakin sawilo mai ila. (Dy. Speaker : Duhtawk dawn tawh mai rawh, midang pakhat chiah tan hun ala awm thei a). Tawitein, hma kan sawnna hrang hrang te hi nasa zawk a puandarh a, in educate a, hengah te hian eizawnna tlak a awm a ni tih hria a, Mizoram puma hma la turin mipuite ka'n ngen duh a. Chutihrual chuan, a Minister-te leh a hnathawktute zawng zawng an achievement-ah hian an chawimawi tlak a ni tih ka'n sawi duh a ni. Pu Dy. Speaker , ka lawm e.

DEPUTY SPEAKER : 10 minutes a la awm a zawh loh hret pawhin House-in rem a tih chuan zawh tir law law theih, dar 1 pelh hret pawh a theih a nia. Tunge rawn sawi ang. Pu K. Lalrinthanga a phar hmasa.

Pu K. LALRINTHANGA : Pu Dy. Speaker, ka lawm e. Vawiina Demand hrang hrang atang hian ngaih pawimawh zualte rawn tarlan ve ka duh a. Excise & Narcotics Department-

ah hian ka'n tarlan duh chu Aizawl hmartawpa bial nei ka ni a kan kal zing hle a, Phunchawng leh Rangvamual, (zan dar 6-9 ah te in kan haw thleng thin a,) tunah chuan a reh duak tawh mai. Zu in bike leh zu in car ni awm tak awm thin, insi thup thin leh jam thin kha tunah chuan hmuh tur a awm tawh lo.

Khatihlaia ka thinlunga awm thin chu Mizoramah zu kan khap a, (total prohibition kan ti a) kan khap hneh loh zia hi a lang chiang a. "A va zahthlak em, total prohibition awmna state ah hetiang khawp hian zu in in phurkhawmin motor jam khawp hialin a awm thin a", tih ka ngaihtuah thin a. Tunah chuan kan sorkar-in kan thalaite mamawh a hria a. Zu chhia mi tam takin an in a, thihna awlsam takin a thlen a. Tin, chutihruual chuan zu in chuan a rim a lo nam a, police leh excise officer tan te pawh man a lo awlsam a, mi tam tak drugs-ah an tlan a, drugs khawihuten nunna awlsam tak takin an chan a. Chung dinhmunte chu hriain Excise Minister-in zu enkawl dan thar a rawn duang ta a, zu tha an in theih na tur atan ruahmanna te a siam a, chutiangte a nih avang chuan, bial fan changa rawn haw pawhin Rangvamual leh Phunchawngah te tluang takin kan rawn tlan haw ve thei ta a ni, tih kha report angin ka han sawi duh a.

Tin, chutih rual chuan, hetia zu zawrh phalna sawrkarin a pek tak hnuah leh a enkawl na tha kan han duan tak hnuah hian breath analyser, kan ti ami, zu in hovin a an hman thin hi, Excise Department hian hmang uar hle se ka duh a ni. Hei hi an uar tawh lovin ka hria a. Tin, veng penhle deuh hmun thenkhatah te pawh hian zanlaiah te, zan dar 7/8 dar 9/10 ah te, a khat tawkin, bike hi nei sela, tlan kual se la. Khatiang hmuh theih tur awm ang kha chu ham tir hmiah hmiah mai sela, chuti chuan kan khawlai a thianfai ngawtin ka ring. Chutiang anga kan tih chuan mite zahpah lova zu in chingte kha a hnawt kiang ngawtin ka ring tih kha ka'n sawi leh a ni.

Demand No. 31-ah hian Agriculture Department a ni a, sawitur a awm nualin ka hria a. Kan thlai chinte hi hlawkpui tak tak tur chuan link road kan mamawh a ni. Link road kan neih loh chuan thingtlanga kan thlai chingtuten agriculture crop kan tih emaw, Department dang crop pawh ni se, hlawkpui tak tak nan hian hman a har hle a ni. Phaiah kan zin thin a, chuta kan hmuh thin chu thlai tharte hi, motor truck tire 2 hmang hian an nawr thin a, mi 2 lekin quintal 40-te market an nawr thleng a, awlsam takin market hmunah, a kal man mumal awm lovin, an zuar thei a. Chutiang a nih avang chuan tlawmtein an zuar a, miin lei enah an en a, an pan ta a. Chutiang chuan hlawkna an dawng thin a ni.

Hmanni khan Khawzawlah ka han kal a, khimi Tuisen kamah khian cubic lung latuten Tuisen kam ral lehlam pang atanga an lung lak kha, rope way ve angreng deuh hi an siam a, tah chuan lung cubic 10 dawn laite hi an rawn tawh thlak tir thin a ni. Chutiang ang deuhte pawh chu a tangkai hlein ka hria a. Ka thinlungin a zuk ngaihtuah tak chu link road hi luidung zal deuhah hian siam vek ila, chu luidungah chuan chung lam atangin kan thlai tharte kha, khatiang rope way ang deuh khanin, han tawh thla ve ta ila. Motor phurh theihin an buatsaih anga, tlawm takin, chhipa phur lovin, marketah an thlen thei ang a, tam tak tak, hralh tham kha awlsam takin an thlen

ve anga, chuan hlawkpuina an nei thei ang tih kha a awm a. Chuvang chuan, khatiang lampang zawng khan tan la ta ila. Agriculture kher lo pawh Department dang, thlai chinga eizawngte tan hian a tangkai ka ring a, chu chu ka'n sawi a ni.

Oil palm kan tharchhuah atang hian mi tam takin sum leh pai tam tak an hmu a eizawnnan an hmang tawh a. Kan Minister zahawm tak hlawhtlinnaah hian ka lawmpui takzet a ni. Chutih ruala ka tarlan duh chu, a ching hmasa deuh ho, oil palm kung hi tlemin a lo sang ve tan deuh ta a. Thingkung lawn huai ve deuhthe pawh a lo ngai a. Tin, a hnah zar hi a khawng em em a. Hemi kara a rah zuk la tur hian hmeichhe ho tan pheih chuan tihngaihna hi a awm lo angreng a. Helaiah hian Agriculture Department a mithiam deuh, thiamna lampanga a lawh dan ngaihtuahtu tur hi awm sela. Ruahmanna fel tak, a zar han tuk thlakna tur awlsam tak emaw, hachhekte emaw, a leihlawn ang chi te emaw, a rah lawh tawh sa an khai thlak dan tur ang zawng te, ruahmanna fel tak siamsak sela. Chuti chuan nuho te te, lo hleithe lo tan (DEPUTY SPEAKER : Kan hun a tawp chiah a, kan sawi zawh tir ang nge, kan luh leh hunah. Minute tlem a la nei a. Sawi zo rawh se maw? Amaherawhchu, thiante chawlh i hrek tih kha inhria la, duh tawka hlap erawh chu kan phal bik lovang.) Thingpui in chhung chu minute 5 bak an in lovang.

Tin, nichinah khan kan member zahawm tak khanin NLUP sem hnuah buhfai thar punna kha a rawn sawi chiang lo deuh hlekin ka hria a, metric tonne 13,478 a ni tih kha kan tarlan belh a ni. NLUP sem a nih hnu hian Mizoram Agriculture Department hian award a hmu a, buh thar tam avangin, chu chu Krishi Karman Award 2012-2013 leh 2013-2014 ah khan, vawi 2 award a hmu a, Rs 25 lakhs, a lawmawm ka ti hle a. Chuvang chuan, a enkawltu Minister hnenah lawmpuina ka han sawi tel ve leh a ni. WRC area tihpun a ni a, a lawmawm takzet a, a punna hi hectare 5,668 a ni a. Hengte atang hian Mizoramin kan buh tharte a lo pun phah zel dawn niin a lang a, lawmawm ka ti takzet a, chu chu ka'n tarlang duh baw a.

Power tiller-te, mini tiller-te, kan thingtlang loneituten, agriculture crop neitute tana pek a han ni hi lei lehna kawngah te awlsamna tam tak a siamsak a, hengte hi lawmawm ka ti a, ka han sawi leh baw a ni.

Rural Development-a ka sawi duh pakhat chu, material component hi keini RD Block-ah chuanin departmental work-in an thawk a. Department thenkhatah chuan departmental work a an thawh hi Supervisor an ruai thin a. Amaherawhchu, keini area-ah chuanin Department staff-in an thawk thin a, hei hi a tha lovin ka hria. PWD-te hian departmental work a an thawhte hi Department staff thawh tir ve ta vek sela mipuite tan inhlawhna a awm lovang. PHE-ah pawh chutiang baw a ni ang a, Department dangah pawh chutiang chu. Keini hmunah PD leh a hnuai staff-ten an thawk a, a endiktu tur anmahni an ni leh ringawt mai a. Hmun tam takah chuan midangin an thawh ai hian a endiktu anmahni an nih avangin chhe deuhin an thawk a. Tunah pawh hmuh tur tam tak a awm, kawhhmuh mai theih tur ka nei a ni. Chutiangte a nih avang chuan supervisor tur hi civil lam atang hian la ve tawh sela a thain ka hria a. Chu chu ka'n sawi a ni.

Tin, Village Employment Committee hi Rural Department chiah hian tuna V/C inthlang thei lo ho zinga Advisory Board an ruat hi an pawm duh lova. Pu Piana nen kan Minister hnenah pawh kan sawi tawh a, ani pawhin Secretary-ten lo pawm tawh tur khan a hrilhin ka hria a. Mahse a hrilh hnu khan lehkhah dang a rawn thleng leh a, anmahni bawh kha thawktu tur atan an inruat leh a. Hei hi tihdanglam a thain ka hria. Department dang zawng zawngin Village Advisory Committee hi an pawm a, Rural Development chiahin an pawm lo a ni.

Sawi tur ka nei teuh a, mahse ka sawi seng lo ang a. Food, Civil Supplies chungchanga ka ngaih pawimawh pakhat han tarlan ka duh a. Kan Minister hian Mizoram mipuite hi a khawngaih leh lutuk, a duhsak leh lutuk niin ka hre deuh a. Tuna Food Security kan tihah hian a phak tur (kan pek theih tur) chin hi a tlem em em a. A phak theih bak hi chu, keini state aia hausa ten an tih ang hian he sorkar hian pe ve tawh lo mai se, tun hi chance tha niin ka hria a. Mahse Food Security-in a huam loh chin zawng zawng pawh, mi zawng zawng ration card pek leh tura a han ruahman hi a duhsak leh lutuk ni hian ka hria a. Amaherawhchu, Mizoram tana sorkar kan tangkaipuina tur theuh kha a nihna kawngte chu a awm ve tho ang a. Amaherawhchu, keina ka ngaih dan chuan tun hi kan chance remchang tha tak niin ka hria a, ka han tarlang ve leh a ni e. Pu Deputy Speaker, ka lawm e.

DEPUTY SPEAKER : A lawmawm e. Tunah chuan kan chawl rih ang a, dar 2:00 ah kan thukhawm leh dawn nia.

2 : 00 P.M.

DEPUTY SPEAKER : Chawhma lam khan member 6 in an sawi hman a, kan sawihona kan chhonzawm leh anga, tunge han sawi hmasa ang le? Dr. K. Beichhua.

Dr. K. BEICHHUA : Pu Deputy Speaker, ka lawm e. Demand ka'n sawi zung zung mai ang a, hun a chep si a.

Demand No. 7 Excise & Narcotics-ah khan han en ila, Head of Accounts 13 Office Expenses ah hian Non Plan Head atangin 54 lakhs a awm tawh a. Others ah hian 53.10 lakhs a awm leh bawh a, hei hi enge a awmzia tih hi ka hrethiam lo a, tin, MLPC Act kan hmang dawn a, Excise hna tur hi tamtak a awm dawn a ni Machinery leh thildangte pawh Excise Department hi thuam that a ngai dawn hlein ka hria. Chutih lai chuan Head of Accounts 52 ah hian Machinery leh Equipments ngaihtuah nan nuai 2 lek dah a ni. Hei hian a manage thei angem tih kha ka rilruah a awm a. 2013-14 leh 2014-15 a kan neih kan budget nen khan a inang reng mai a ni, MLPC kan puan hma a mi nen. Chuvang chuan hei hi department mamawh hmanruate, leina tur tam tak kan mamawh a rinawm si a, a va harsa dawn ve tih kha Minister changtu khan min lo hriatsak se.

Tin, Excise & Narcotic-ah hian thil pakhat ka ngaih-mawh deuh mai ka sawi duh chu, tuna hetia MLPC dan hnuai-a Zu kan han zawrh takah Police te Zu kan zawrh tir hi khawvela thil inhmeah lo ber niin ka hria. Police tam tak kan nei ta a, hei hi kan Minister zahawm tak hianin lo ngaihtuah tha leh ta se, kan Mizoram Police smart tak tak, tha tak takte, heng ho hi Zu zuar mai tur chuan kei chuan ka ui deuh hlek a. Chuvang chuan an prestige leh status pawh hi issue a ni tel pawh hian ka hria a. Helai hi min siamthat sak se a tha hlein ka hria a ni. Chu chu Excise bik ni ta se.

Demand No. 16 Home kha han sawi leh ta ila. Head of Accounts 41 ah hian 8 lakhs chauh dah a ni a. Excise & Narcotic Department-ah hian secret service expenditure head of accounts 41 ah khan kan en chuan 10 lakhs dah a ni. Police ah hian hemi tana pawisa sen tur hi a tam zawkin ka ring a. Excise & Narcotic ah chuan staff te pawh kan tlem a, tlem zawk turah ka ngai a. Hemi department pahnihte hnathawh, nature of work atang hian ngaihtuah ta ila, in ang thei turah ka ngai lo a ni. (Excise leh Police kha). Police hi chu kan tam tlat, Excise kan tlem zawk si a. Khalaita kha ngaih-mawh awm ka ti a, a dik theiin ka hre lo a ni.

Tin, heng pawisa kan dah, secret service atana kan dah hi a tlem deuh hrim hrimin ka hria a, a daihin ka ring lo a ni. Head of Account a other charges han tih ringawt mai a, 970.82 lakhs lai mai kan dah te pawh kha a diklo deuhin ka hria a, chu chu Home-ah chuan ka sawi leh ni ta se.

A tam avangin ka sawi zung zung ang a, a chhung lam vawiin chu ka lut deuh hlek ang a, pawn lang kha chu ka sawi lem lo ang a.

Demand No. 31 Agriculture kha han en leh ta ila, Crop husbandry a head of accounts 51 ah khan Motor Vehicle tan ₹ 30,000 (cheng sing thum) dah a ni. Chu cheng sing thum chuan eng Motor nge kan lei ang? A nih loh pawn POL tur pawn ni ta se a va tlem dawn ve? Maintenance atan pawh ni se a engah nge kan hman ang? Motor lei dawn chuan Auto Rickshaw man pawh a ni bawki lova. Khalai kha ka hrethiam chiah lova, min lo en that sak se a thain ka hria a. POL atan heti zat chiah hi chu engmah tham a ni lo kan tih tawh kha, re-maintenance ang atan pawn.

Tin, head of account 52 Machinery & Equipment-ah khan pawisa cheng khat mah dah a ni lo a ni. Khangte kha min lo chhinchhiah sak a thain ka hria a. Engtingge ni Agriculture meuhah pawisa cheng khat mah dah lova a awm kha mak ka ti a ni.

Tin, Demand No. 38 R.D. kha han en leh ta ila. Head of Account 24 ah hian POL kan hmu a, mahse pawisa dah a awm miah lova, POL a pawisa dah hi a awm lo a ni. POL hi engtia tih tur nge ni tikhka ka rilruah a awm a. Central grant atanga project tam tak

rawn kalah hian duh dan leh guide line a awm thin a. Thenkhat POL atana hman theih loh te a ni thin a ni. C & AG report ah pawh hian kan hmanna tur nilova kan hman awm ang tam tak a awm avang hian Audit objection te pawh hi kan tawk fo thin a ni tih a hretu vek kan ni. Chuvang chuan hengah hian enchian leh ni se a tha ang e, tih kha ka sawi duh bawk a.

Demand No. 17 Food, Civil Supplies & Consumer Affairs ah khan Head Accounts 24 na POL ah khan a nil bawk a. Tin, 51 Head Accounts-ah khan Motor Vehicle atan ₹ 45,000 (cheng singli sangnga) dah a ni leh ta a ni. Chu chuan Motor leina emaw, maintenance emaw, POL atan pawh khan engmah tham a nih ka ring lova. Machinery equipment atan khan nuaikhat chauh dah a ni leh ta a. Chuvang chuan hei hi Food Security kan han hmang tan a, Computer kan han hman tur ang te pawh hi ka'n ngaihtuah ta a. Machinery leh equipment-ah khan a tel ve lo thei dawn si lova, tih te hi kan rilruah a awm lo nge ni? Engtin nge hei hian kan in manage ang tih ka lo ngaihtuah a.

Tin, DCSO te pawh hianin an area chhunga hnathawh dan leh supply kalphung leh routine te pawh checking nei a an kal changte pawh hi tam tak awmin ka ring a, Chulovah thil dang dangah te pawh vehicle mamawhna hi a nasa dawnin ka hria a, chuvang chuan kan sum dah hi a tlem lutuk lo maw tih kha ka rilruah a awm a.

Tin, food security kan kalpui dan tukin lamah khan kan senior member te pawh khan an sawi nasa a, kan Minister zahawm takin theihtawpin hma a la a, a lakna pawh a chhuanawm viauin ka hria a. Mihring famkim kan awmlo, hetih lai hian engemaw neuh neuh sawi tur awm hi chu kan Minister hi a hming a chhe palh ang tih hi ka lo hlauhpu deuh roh a. Entirnan Saiha-ah chuan a guideline tukinah khan an rawn sawi vek tawh a. DCSO in order a chhuah a, chu order chu Party lam atangin pawm lovin, Mara District Congress Committee headquarters atangin tidanglam turin lehkha an pe a, chumi lehkha zulzui chuan DCSO hianin lehkha a lo chhuah leh a ni. Chuvangin helai hi kan Minister zahawm tak hianin min enchian sak se a tha hle dawnin ka hre bawk a. Chu chu a tlangpuia ka sawi ni se, Demand No. 17-ah chuan.

Demand No. 42 Transport Department-ah khan en leh ta ila. Head Account-ah 21 ah khan Supplies and Materials tihah 1.5 lakhs chiah dah a ni leh ta a ni. Tin, Machinery and Equipment-ah khan 4 lakhs chauh dah a ni leh ta bawk si a. A bik takin Transport te phei chu hei kan hria a, vehicles tam tak khawih an ni ta a, khawl tamtak mamawh an ni a. Eng enge maw neuh neuh mamawh tam tak an nei ta a. Tuna kan budget Head Account-a kan han dah ang ringawt te hi chuan an in manage zawh hi ka ring lo a ni.

Tin, High Security Plate hi vuah thin turin min ti, keini pawhin thu kan awih a kan vuah sup sup a, chutih rual a ka hriatthiam loh chu Mizoram State Transport motor tam takah hian High Security plate hi pakhatmah tar a ni tlat lo mai a ni. Helai hi a mak ka ti a, helai hi Minister khan min lo enthatsak se tih kha ka ngenna a ni bawk a.

Tin, Demand No.23-na Tourism hi kan hre theuh ang a, kan hotute pawh outlook zau tak in ni a. Tourism hi State dangah chuan an sum hnar a nia, kan hre theuhva a thente chu tuipui kamah an awm a, chu tuipui kam chu hmasawna a tan an hmang thei a ni. Tlang ram chhengchhe tak a an awm pawhin an tlang ram chhengchhe lai tak chu Tourist hip nan malsawmna ah an chantir hlah thung a ni. Chutiang chuan keini Mizoram pawh hi Member te khan an sawi theuh tawh a, Tourism hian Policy tha tha hi duang ta ila vawiin thut thuta hlawhtlin loh pawhin tun atanga kum 10 tala hlawhtling tur ang chi, tuna kan hmalakna chak tak kal mekah hian a policy hi kan siam a hun tawh viau a ni. Ka lawm e Pu Deputy Speaker.

DEPUTY SPEAKER : Minute 10 kan strict vak lo ang kan tih kha chu General Discussion ah khan a ni a, ni hnih lai hun kan neih avang khan. Tunah erawh chuan demand hi pass zel a ngai a, hun in hman thiam loh leh zan khaw tai rek thleng pawh kan sawi ang a, kan pass pui hrim hrim dawn che u a ni. Awle, Pu R.L.Pianmawia i lo sawm ang.

Pu R. L. PIANMAWIA : Pu Deputy Speaker, ka lawm e. Demand No.7-naah khan. Thawktu tur indaihloh nak laiin mi 25 tun hnai khan lak an ni a, khamiah khan kan bialte an tling pha ve bawk si lova. A manganthlak duh khawp mai a, kan bialte tlin vena phak tur khawp min laksak ve se tih ka'n sawi duh a.

Tin, Home Department-ah hian lawmthu ka sawi duh a. Kan bialah chuan nu leh pa chan chang tak tak an ni a, kan mangan nikhua pawha min thlamuantu leh beiseina min siam zel theitu an ni a, an chungah hian lawmthu ka sawi a ni.

Tin, Prison-ah hian, Jail rim nam ve tawh ka ni a, hahchawlh nan te pawh kan duh leh mai thei a. VIP ho hmun tura an tih ve khu a chhe lutuk a, khum lah chu keini ang tan chuan tlawh tlang kha a ni a, keini ang tlin tawk te kha Khum siam sela, nuamsa deuh hlekin siam sela a thain ka hria a ni. Ka zuk riah ve tum khan mamawh an neih thute an lo thlen ve a, chu chu kan Home Minister leh House Leader hriatah ka sawi tawh a, an Kudam chhe lutuk sakthatna tur kha a nia an sawi, thuneitute ve ve ka hrih tawh a, kha kha an la ti lo a nih chuan ka'n remind leh ni sela.

Tin, Home hi General Discussion-ah khan ka sawi tawh a, kan rinpui an ni a, chutichung chuan secret service expenditure- ah khan a tlem em em mai a, ti tura kan tih leh an thawh hi a turu si a. Ka tehkhin deuh ber chu rambuai laia sipai puak phur kan nu leh kan pate hnenah sipai hovin Atta per khat an pe a, puar deuhvin ei rawh aw an tih ang deuh kha niin ka hria a ni. Chuvang chuan puar deuhva ei kha a har ka ring a, chuvang chuan tuna secret service expenditure kan dah hi a tlem lutuk a, hetiang chuan mi beisei inngahna khaihawmna chu he thil hian a funin ka hre bawk si a. Tun aia tam zawk dah a tul

hlein ka hria a ni. Kan bial leh bial dangah te eng eng emaw harsatna kan tawk thin a, chuvang chuan a bik deuhva ngaihtuah hi kan mamawh deuh riauin ka hria a ni.

Ka sawilan duh chu, ziaka ka zawhna chhannaah khan Police hian bullet prove motor te an lo nei a, hei hi kan lo hmu ve ngai reng reng lo mai a, Sakawrdaiyah khian an hmuh ve theih turin bullet prove motor hi min dah sak ve sela tih ka'n sawi lang duh a. Vaitin leh Zohmun te hi an hmuh hmaih a nih ka ring a, helai hmunah hian motor min dahsak ve leh bawk sela. Chutiang chuan mipui tithlamuangtu tur an nih ang hian tun ai hian an tithlamuang leh sawt dawn a ni tih ka'n hrilh duh a. An building te khi a chhe em em a kan sawi tawh a, tun thleng hian thawm thatna engmah ala awm thei lova, tun kan budget han en phehi hi chuan a manganthlak lehzualin ka hria a.

Tin, camp panna tur pawh hi siamthat ngai a awm nual a, a bik takin Vaitin BOP phehi hi chu kal ngaihna a awm vak lova. Chuvang chuan heti ngawt lo deuh hian min tihsak sela tih ka'n sawi duh a.

Tin, Budget bu han en hian motor maintenance-na tur hi a lang lo khawp mai a. Police motor te hi chhe thei lova tha reng bik turin company-in an rawn tih hmel si lova, chuvang chuan maintenance a ngai em em mai a. Tunah hian maintenance nan pawh bat hi an ngah hlein ka hria a, 124.6 lakhs hi tunah hian workshop hrang hrangah an ba a ni a. Chuvang chuan nitin kan mamawh leh min thlamuantute ber chet velna pawh kan ngaihtuah thei lo a nih chuan tha dawnin a lang lova, chuvangin anni hi ngaihsak an ngai hle mai a. Minister tan pawh thil ngaihtuah thiam a har mai thei a, chuvang chuan a ngaihtuahpui thei tur awmte khan chuanin ngaihtuipui vat vat kha a tul hle a ni.

Tin, GPF diltu, mamawhtu pawh an thahnem a, TA ang chi kha an titawp tawh bawk si nen an dinhmun a khirhkhan tawh em em mai a, chuvangin GPF mamawhtuten an dil chuan pek tur daih hi kan ngaihtuah a tulin ka hria a ni.

Tin, Agriculture-ah hian hma min laksak nasa em em mai a, thawktute pawh indaihlo chung chungin harsa lutuk tur min ven sak thei a, lawmawm ka ti a ni. Kan Minister-in hnathawktu, Loneitute a ngaihsak dante kan hria a, heng power Tiller Loneituten an tangkaipui tur ang chiah pawh hian min la theihngihlh miah lova, a chungah pawh lawmthu ka sawi a, ama'rawhchu, hmalak zelna turah chuan theihngihlh chi kan ni lo tih ka sawi tel duh a ni.

Tin, Demand 38-na hian thingthlang mite a kawkw bik a, budget kan thlir chuan Rangva semna tur a awm tawh silova, BADP te kan neih ve loh avangin anni hi kan rinchhan an ni mai si a. Sanction an pek tawh pek chhonzawm theih loh Community Hall rel uaih

te kan nei a, heng ang han tihlehna tur tak ngial pawh Social Education Head-ah khan dah a awm bawk si lova, a mangan thlak hle a.

Tin, Darlawn BDO office te pawh nuai 15 a sak tur tih vek tawh, pawisa dah vek tawh kha thil dangah hman leh a ni a. Hetiang em em hi chu a ni lovin ka hria a. Ka tawng an huatthu suhah, MNF sorkar lai kha chuan quarter sak tur kha sa miah lovin bill te an pe thei a ni. Chuvang chuan hetiang pawisa dah tawh sak mai tur ang hi chu khatiang khan kan ti ve dawn lova kan sa ngei dawn a ni tih kan Minister hian lo hria sela a thain ka hria a. Chuvang chuan anni kaltlang a thingtlang mite kan rualawhna min phuhruk sakna thinah hian sum awm bawk si lo hi chu a mangan thlak a. Hengte hi tih leh dan tur ala awm ang em? Tun dinhmunah tih leh dan tur a awm mai lo a nih pawhin hun lokal leh zel turah chuan thingtlang tel lovin Mizoram a awm thei lo a ni tih hi mitinin kan hria a. Chuvang chuan hei hi min ngaih pawimawhsak ka duh hle a ka'n sawi a ni.

Tin, Demand no 17-na Food, Civil Supplies & Consumer Affairs-ah hian lawmthu ka'n sawi duh a. Kan Supply Minister leh Parliamentary Secretary te leh a thawhpui a naute hi kan rama a fel ber ber leh a thiam ber ber te thlanchhuah an ni lo chung hian thil an tilawmawm hlein ka hria a. Kan buhfai lakluh thin cheng tam tak man kan sem ral thin tho a kha a zahve velah an titem thei a, chu chu an tipung leh nge ni kan kham tho bawk si a, a tihdan riau an thiam hi a lawmawm ka ti a. Hetiang mipui manganna kan tawh thin, tam tak kan lakluh thin laia kan mangan vei nen tunah a zahve lek buhfai an lakluh hian mangang loa min siam avang hian a lawmawm ka ti takmeuh meuh a, lawmthu ka'n sawi a.

Tin, Kudam chungchangah hian kan hmuh theih chinah chuan repair-na tur Darlawn kudam te kha a lang tel ve a, a lawmawm hlein ka hria a. MNF sorkar hunlai khan BAFFACO sum atangin nuai 3 in an repair a, a rei leh tawh a, a chhe leh tawh si a, cheng nuai 3 tal a repair-na te a awm a nih loh pheih chuan a mangan thlak dawn a. A thar sak law law kha a pawimawh hle a, a thar sakna tur min ngaihtuhsak hram ka'n duh bawk a. Chutiang tur chuan theihtawp min chhuahsak ka'n duh a.

Tin, Zohmun-ah IV Grade quarters lungin a delhchhia a, a siamna tur sum mamawh leh a thlalak nen kan thehlut a. Department pawhin DCSO tirin an rawn en tawh a, a aia lal te pawhin an rawn en tawh a, an en khan a tawp ringawt mai a. En tawp mai chi a ni lo tih chu min hriatsak sela. Thawktute awm vena pakhat ve renrawn a awm a, khami pawh tungding hlei thei lo a awm kha a zahthlak a. Chuvang chuan hengte pawh hi min hriatsak se a thain ka hria a.

Tin, Demand no 43-na, Tourism Department-in Darlawnah Tourism building tha tak mai min siamsak a, privatise turin min tihsak leh mai a. Amaherawhchu, a kawng khi

chu min siamsak a tul a ni. A chhan chu kan khawtlang VC ten ni za inhlawhna atangin black-top theih turin engkim an ruahman a an lai zau tawh a, a tul ang han thawh belh tur awm tawh lovin black-top hna thawh hmiah hmiah theih turin kan lo inralring tawh a ni. Chutiang ang ti thei tur chuan hma pawh min laksak turin ka'n ngen duh a. Kan Minister fak pahin chu chu ka'n sawi ve duh a.

Vawiinah kan Minister zahawm tak takten Department chan tur an rawn tarlan hi kei pawhin lawm takin ka thlawp a ni tih ka sawi duh a ni e. Ka lawm e.

DEPUTY SPEAKER : Pu Lalrinliana Sailo hi chawhma khan a phar tawh a, Pu Rina a phar a, chuan Pu Vena, Pu Ngurdingliana. Pu Rinliana Sailo chawhmaa a rawn phar kha a thut hmain a rawn phar a, taksa chetna rawn chang emaw ka tia, chuvangin ka ko lova. Tunah lo ko ila.

Pu LALRINLIANA SAILO : Pu Deputy Speaker, ka lawm e. Tawite tein ka'n lut ve ang a. A hmasa berin kan Demand No. 31-na Agriculture hi han luh ka duh a. Hei, lawmawm deuh mai pakhat chu kan Minister te, kan thawktute zarah hma kan sawnin ka hria a. 2013 – 2014 Statistical Hand Book-ah khan hemi WRC te hmalaknaah khan ti hian a inziak a, 'Area of WRC cultivated by seasonal rain in hectre: 2012- 2013 ah khan 1,2,137 a ni a, hemi Statistical Hand book-ah hian report tunah hian a thar ber chu 2013 – 2014 a ni a. Tuna record-ah hian 1,3,259 hectare kha hmalakna a lo ni a, a lawmawm hlein ka hria a. Chutih rual chuan area of cultivated by MI hian kum hmasa lamah 2294 an lak laiin 2361 an la chho bawk a. Tin, hei tuna an han tih hrang hrangah pawh hian tuna an hmalak lai mek, tuna New Land Use Policy-in a rawn tuamah hian 1,6,866 hectare hma an la a ni a, hma an sawn hlein ka hria a Pu Speaker, a lawmawmin ka hria a.

Hei thingtlang te leh lo nei mite (Deputy Speaker : Chair kan han inthlak lawk ang e.) chung tana malsawmna hrang hrang an han siam Sorkarah hian a lawmawm ka ti a. Heng ang lei laihna hmanrua chi hrang hrang an han sem te a lawmawm takmeuh meuhin ka hria a. Tunah hian heng hnathawh hi lang vut vut lo mahse ala lang zel dawn ni te pawhin ka ring a, a thlamuan thlak ka ti a ni.

Hei chutih rual chuan kumin hian kei Lo ka nei ve a, Sialhawk ram Lungpum an tih hming thang deuh mai a ni a. Lungpum hi khilai tlangsangah khian lung feet 17 vela sei ropui tak mai a chher hi a awm a, a bul velah lung a awm reng reng lova chumi hmunah chuan Lo min pe ve a, wawi hnih lai chu ka han feh ve a. Tin, Phaisen lamahte kan nei tha dawn khawp mai a. Chutih rual chuan khimi ram khi Sialhawk khi, ka Bial lamah ka'n lut ve ang a. Mizoramah chuan khaw lian ve si-ah chuan ram nei chhe ber pawl an niin ka ring a, ram nei tlem ber. Lungpum ram khi ram tam/tang a ni a. Kan Agriculture Minister zahawm tak hian a panna kawng khi min tihsak se chuan kha khan

kum 2 te an bawh thei a, chu chuan an economy pawh tam takin a chawi chhuak thei dawn a. Huan hlun te, ram hlun te a siam theih dawn a ni. Chuvang chuan Agriculture hmalakna hi a ngaihnaawm a, ala hlawhtling zel dawn a ni tih kha a hmuh theih a an hmalak tawhna.

Amaherawhchu, challenging deuh mai la awm leh chu hei area still to be developed for WRC in hectare-ah hian la hman loh hi hectare 4,5,900 lai mai la neiin an report a. Pu Chairman, kan Statistical Hand book a record leh kan department record a inang lo ang tih ka hlau a. Nakumah damtea kan awm a nih chuan hei hi kan rawn en leh dawn nia, lo fimkhur se a thain ka ring a. Tiang te te khan tunah hian a challenge ve hle a ni tih kha kan sawiduh a, hmalakna pawh an nei hle a ni. An thawk tha hlein ka hria.

Tin, Demand No.16-na Home-ah hian kan kal leh daih ang a. Kan Home Minister hian Home hi a enkawl tha hlein ka hria a. Thil ngaihthlaknuam lo tak tak chi te pawh kha tunhma a awm thin kha a awm ta lo va. A lawmawm ka ti a, kawng hrang hrangin. Chutihlaia min tilawm em emtu pakhat leh uar zel se tih ka neih chu kan Home Minister zahawm tak hmalakna a Danin a lo zam sa reng, mahse lang lutuk si lo, tunhnaia Chanchinbuah te lo lang hi ka'n hmuh hian lawmawm ka ti a.

IPC Section 411 na, hei hi a pawimawh ka ti ve thin a. Thil rute hian an thilruk hi an va hralh a emaw, an tiral a. Kan inngaidamin emaw ho te hian an chhuak leh mai thin a. Mahse, IPC 411 hian a lo veng ngunin a lo ziak chiang em em mai a. Chu chu tunah hian kan Zoram kilkhawr ti mai ila, helam Silchar lam kan ramri dep, Kolasib District atangin an rawn tan niin ka hria a. Dan awmsa mah ni sela an rawn ti hi a ropui ka ti a.

Hmanniah SP in thilru te, a lo leitu leh a lo retain tute, hemi hremna/khuahkhirhna Dan nasa tak mai lo awm hi hei ai hian uar lehzualin kal se a that ka ring a, uar lehzualin hma la se a that ka ring a. A dik tak chuan a leitute pawhin liabilities kha an lo nei ve tho mai a. Chuvang chuan, miin thil a ru a, a rutu ringawt kan ti a, a leituin kan lei loh hi chuan an ruk kha an hralh leh ngam lovang. A leitu kha a hremna Dan tha takin hei a lo ziak kua mai a, keini Dan thiam kan ni ve lo va IPC 411-na hian. I phalnain Pu Chairman, 'dishonestly receiving stolen property who serve dishonestly received or retain any stolen property, knowing or having a reason to believe the same to be the stolen property, shall be punished with imprisonment of either description for a term which may extend to 3 years or with fine or with bond'. An hremnaah hian a khawi maw lai hi kan ti thin a. Chuvang chuan, 3 years and fine ngat hian, hemi ingredient of section 411 tih te, dishonestly receiving stolen property tihte leh heng hrang hrangah hian fiah tak maiin a lo ziak a ni. Hei ai hian chak tak leh strong tak hian kal ta se chuan a ngaihna hre lo, a nachang hre lo, lo lei ve mai mai hi kan tam hlein ka ring a, thingtlangah pawh thingtlang lovah pawh. Chuvang chuan, hei hi hlah lovin a lo leitute kha man vein leh tiang khan hrem hmiah hmiah ila chuan thilruk pawh hi a

tlem pah ka ring a ni. Chu chu tuna kan Home Minister hova tunlai thil thar, dan awmsa mahse lang lutuk lo a tunlaia a langthar hi a lawmawm ka ti a ni.

Chutih rualin pakhat chauh, ka ngaimawh pakhat chu Saturday-ah hian thaibawih chu ni em lo mah ila bazaar a chhuah ching ka ni ve a. Saturday-ah hian traffic police hi an tlem a ni, ka Chiang Khawp mai, a date, ni, thla, pawh ka ti vek a. A tlangpuiin a ni a, helaiah hian inthlahdah lo teh se. Upper Republic-ah kan awm a, bazar pui thleng tur hi darkar 2 te 1/2 te kan hmang thin a, a uiawm ka ti khawp mai.

Tawi tein pakhat leh lek. Transport hi ka'n lut leh lawk ange Demand No.42 na. Transport hian an titha ka ti a. Hei, hma kan sawn a, thil tam tak sawi ka tum tawh lo va, hun ka neih tlem vangin, mahse thil pakhat rawt ka duh a. Kan Minister chak tak hian a tihlang theih pawh ka ring a. Tin, Secretary te officer tha an awm a. Delhi-ah duty in emaw han chhuk thla dawn ila, kan officer te pawh chhuk thla se flight cancel tih neuh neuh hi a tam mai a. Chutih rualin thlawhna chuang thei miah lo te pawh awm ve a ni a mihringah hian. Kan thianpa, kan kawt ngei ami Bank Officer pawh thlawhnaah a chuang ngam lo a ni. Aizawl atanga Kolkata direct bus hi tihpuitlin ni se, hei hi tih hawn ni se a thain ka hria a. A chhan chu Prime Minister zahawm tak leh Bangladesh Prime Minister inkawmnaah kumin khan an rawn chhuah chiah a. Tripura leh Kolkata kawng sah hawn te, Bangladesh kawng sah hawn te, khang hrang hrang kha a rawn tel a topic 19 zingah, keini hian engah nge kan tih lovang. Chuvang chuan, kan economy tak tak hi a save dawnin ka hria a. Kan Transport Minister hi a chak bawk a, helaiah hian hma han la leh se ka ti ngawt mai.

Tin, motor fitness hi hei ai hian uar leh zual se. Kan Enforcement te pawh hian an titha khawp mai. Amaherawhchu, hei aia nasa hian helai te hi uluk se kan ti deuh a. Tin, Pu Chairman, driver chungchang hi, tha takin MVI ten certificate license pek dawnin an uluk a ni. Tunah phei chuan an computerized a, a tha khawp mai. Amaherawhchu, manners leh etiquettes hi tun ai hian la inzirtir fo se license pek dawn hian. Pawimawh tih em em na ka nei a, hei hun hmasaah khan tunhma zawk khan Hongkong-ah kan kal a PAC ho kha. Tahchuan, darkar 2 vel hun kan nei a, Bruce Lee a thlan i tlawh teh ang u, an ti a kan hotute khan. Bruce Lee a kha hria an lo awm reng reng lo mai a Hongkong-ah khan. Kan han zawt thin a, hotel lianah kan thleng a. Hotel-ah te, bazaar-ah te, office-ah te Bruce Lee a reng reng an hre lo a. Driver hian thil an hre duh riau a nia, an ti a, kan han zawt a, a hre lo nasa mai. Tahchuan, i thiante tu emaw zawt mai rawh, an ti a. Ka lawmna em em leh tha ka tih chu, tah hian motor seat-ah ka thu a telephone a biak theih loh a ti a ni. Dan a va han zah teh lul em. Chuan a hrefiah lo a niang kan saptawng kha an ti a, an han hrilh leh a, i thiante Bruce Lee a thlan awmna zawt rawh kan ti a. Tichuan, sap tawng mawl takin 'I sit on the seat, no phone' a ti a ni. Chu chu MLA tam takin kan hria a, Dan a va zah teh lul em. Vawiina kan driver te hi hei aia train that hi a thain ka hria a, Driver Union te pawhin an titha hle chungin.

Pu Chairman, a last nan thil pakhat lek sawi leh ka duh a, Inland Waterway hi, kan Minister hi a chak veh vawh bawk a. PWD in an la ta anih chuan kha kha chu. Hemi business allocation a hi a buai neih nuaih a kan Chiang ta lo va, 1987 bak kha tih a la awm si lo va, hei hi siamthat a tha ngawtin ka ring a.

Pakhat ka sawi leh duh chu Tourism-ah hian, chu chauh chu ka'n sawi ange. Tourism attract-na tur hian kan Minister hi a fit tawkin ka hria a tin, a ngaihna pawh a hre dawnin ka ring a. Vietnam kan kalin 1970 chho vela an indona vel kha tunah hian pawisa lak luh nan an hmang ta a ni. Europe atang hian 5 millions vel hi visitor kum tin an nei a, khami avang khan, "the fastest economy growing in the world" tih kha, khang zinga chhiar kha a lo ni ta a. Chuta mi en duh em em mai chu, khami indonaa thil kahthlak leh thil hrang hrang (a detail-in ka sawi tawh lovang a) khang bakah khan lei hnuai an verh a, tunnel an siam, third layer te, a chhung hnuai damdawi in an dah, khang thil hrang hrangte leh thang an lo kam a, lei an lai khuar a, vawmtlak anga thang an siam hrang hrangte kha khawvel hian a hmu duh a ni.

Mizopa deuh maiin lei an lai khuar a tichuan, a laiah phelsep an dah a, a hnuaiiah fei an lo dah a, tichuan hnimin an khuh leh a. Khangte kha an hmu duh em em mai a. Tin, lei an lai khuar a, a chhin an siam a, thalin an va ham a, a nih loh leh an perh a tur nei te khan. Chungte chu tihian an lo hung tha a. Chutiang avang chuan khawvel hian Vietnam hi a tlawh nasa em em mai a ni, khami indona avang khan.

Chuvang chuan, ka bial han sawi ve ta ila, Khawzawl khawpui a ni a, tah khianin hma min laksak dawn a, khangte khi min rawn tlawhpui ve se.

Tin, a piah Khawhai tlang dung khi hei kan Minister zahawm tak Pu Rinmawia'n, "tiang anga tlang dung mawi leh phul nuam tha hi ka la hmu lo ve" a ti a. Dil lian pui mai a awm bawk a tlangah khan. Khi khi min han chei sak se kan ti a. A chhan chu, kan hnung kar khan hei kan Parliamentary Secretary zahawm tak Pu T.T. Zothansanga te nen hian kan kal a, Bung zanga kan phun a ni. Kan tum dan chuan khawvel hian tourist attract nan chuan unique deuh hlek hi a duh a, tichuan Bung 500 kan phun a, a zar to zarah branch to branch-ah without landing-in, nikhatah km 1 a kal theih, km 3 a kal theih, saw tia Biate thlenga va tih pheik kan tum a ni. Khatiang khan keimahni tih tihin kan lo ti ve a, min han chei Zoram tan economy, sum leh pai khawvel atangin an rawn hmu ang a tih kha kan duh a, ka rawn sawi a ni e. Pu Chairman, hun min pek belha a ka lawm e.

*Speech not corrected

SPEAKER : Tunge sawi leh ang. Dr. Ngurdingliana.

Dr. NGURDINGLIANA : Pu Chairman ka lawm e. Demand No. 7 atang hian kan sawi ang a, Excise and Narcotics Department-ah hian zawhna ka siam a kar lehah min chhan ka ring a, min chhan hah ngai kher lovin ka zawhna kha chu Zu permit kan pek hnuah hian revenue engzat nge sorkar-ah lut tawh tih leh Dan bawhchhia engzat nge hrem an nih tawh tih kha nakinah wind-up-naah kan Minister zahawm takin rawn chhang nghal mai sela hun a hek loh nan.

Excise-ah hi chuan kan sorkar-in hma a laknaah lawmthu sawi tur ber pawh niin ka inhria a. Hei kan staff te thla thar ni khat ni hnihah te pawh hian hlawh kan pek phah zat zat thei tawh niin ka hria a, a lawmawm ka ti a.

Tin, Home Department, Demand 16-naah hian ka'n lut duh a. A hmasa berin kan Minister-in a vil tha bawk a. Hei keini chu thawh lawm danglam khawwna bial kan ni a kan sawi ang khan. Kan han zin nikhua hian Pilot leh Escort te hruai a ngai a. Chutiangah chuan hnathawh tur hi an hria ka ti a kan Sipaite, a thlap thlap mai hian an kal a, an invawn dan a tha em emin ka hria a, hmuh pawh an nuam a. Keini min vengte tan pawh hian a inthlahrunawm lek lek zawka an hah te hi kan hlah phah a. Mahse, hemi kawngah hian kan Home Department hian loh theih lohvin hmana khilai Zokhawthianga thil thleng vang khan kan zin chhuah dawn pawh hian Home Minister emaw, Chief Minister emaw phalna neih loh chuan kan zin thianglo tluk a ni a. Chutah Guard nen Escort Pilot kan hruai a ngai a. Motor hi kan indaihlo tlat mai a, mahni pawisain kan intum a, Pilot Escort te rental-ah te to tak takin kan hire a. Hei hi motor thu hlaah tam zawk kan neih theih chuan a lawmawm khawp ang ka ti a.

Tin, helaiah (Prison leh Sainik) a awm bawk a. Sainik chungchangah hian thawk khat lai khan Subject Committee-II in kan han tlawh tawh a, khi khi tun aia changtlung zawka a contractor te kan Home Minister hian lo vil zuiin a rang thei ang bera hma min laksak theih chuan a lawmawm ngawt ang ka ti a ni.

Tin, Home-ah rau rau pawh hei kan Police te kan hria a, an in train tha em em a, kan Home Minister te, kan Police hotute pawn Silai chang kang ber berin an thum a. Hengte pawh hi a thlamuanthlak a, a hmuhnaawm a. Chutiang chuan tan la zel turin kan hrilh ve duh a ni e.

Demand No. 30-na Agriculture-ah hian hei vannei ka inti a, kan Minister hnenah leh kan department Director te chungah pawh lawmthu tam tak sawi tur ka nei a. Kan bial khi bial hnufual a ni a, Agriculture lamah nasa taka hmalak a ni a, kan dilnate ngaipawimawhin agriculture link road hi tunah hian hmun tam takah min tihsak a, an chungah pawh lawmthu ka'n sawi e.

Tin, Phullen-ah khian Agriculture hmun lian deuh mai kan nei a, anni khian khaw 12 vel an enkawl a. Phullen khi Sub-Division-ah min hlan kaisak theih chuan a chhawrtu tur kan tam bawk nen kan hmasawn zelna tur niin ka hria a, chu chu karawn ngen bawka ni.

Demand No. 38-na kha, hei pawh hi DRDA atanga Project tam tak min hai luh sak avangin lawmthu ka sawi a. A tir kha chuan singhnih singthum diat diat kha a ni a, tunah chuan min han pe tam leh ta a. A hnuhnung berah pawh khan khilalah pawisa tam tak min pein hma min laksak a, an chungah lawmthu ka sawi mawlh mawlh a ni.

Demand No. 17-na Food, Civil Supplies & Consumer Affairs Department-ah pawh hian lawmthu sawi kan ba a. Kan Minister chak tak hian Phullen-ah Kudam leh Quarter min sak sak a, Suangpuilawnah Kudam leh Quarter chutiang bawkin min sak sak a. Tin, kan bial khi kawng chhia a ni nachungin vawi khatmah kan kudam a la ruak lova. Chungah pawh chuan kan Minister chungah lawmthu kan sawi a ni.

Transport Department, Demand No. 42-na, nichina kan ngaihthlak ang khan Pu Lalrinliana Sailo-in a sawi ang khan kei pawh ka ngaipawimawh a. Kan Driver te etiquette/manner zirtir hi a lo pawimawh khawp mai a, vawi khat ka tawng tawh a. MST ah hian ka chuang a, tichuan a hnung lawkah khan Motor nalh deuh hi chak deuhin a lo tlan a, Kan driver, MST Driver khan a pass thei lawk lova, a pass theih hunah khan (kha Car Driver kha mihausa tak a nih chu ka ring a) MST Driver hnenah khan, "I va mawl ve" a ti a, kha MST Driver khan, "Mawl lo ila he Bus hi ka khalh nang" a ti a. Chu, mawl angin an in ngai a an mawl lo, an zahawm lutuk a ni. Passenger a phurhte karah pawh engmah inthlahrung lova hawihhawm taka a awm theihna kha hei hi neih chhonzawm ni se tha ka ti a.

Tin, ka bial Khawlian thleng kan Minister kaltlanga MST service tur min han pe a, kha kha chhonzawm leh thei se kan ngen duh bawka ni.

A tawp berah chuan Demand 42-na Tourism-ah hian a lawmawm a. Amaherawhchu, kan vanduai a. Nimin lawkah khan kan Minister khan a sawi a. Chalfilh tlang Trekking Route min siamah Central lam atangin 2nd Instalment arawn lut hrih si lova, hetah hian kan thuanawp a. Kan sawi tawh a Session hmasa pawh khan. Hetah Tuirini atangin Chalfilh tlang vet chhuakin Trekking, adventure tui mi te tan riahbuk kan siam a, chutah a chhuk leh ang a Tualbungah riahbuk kan siam leh ang a Dikhana lo chhuak turin. Tunah hian kan thawk mup mup a, amaherawhchu kan hriat ang khan 2nd instalment a lo kal loh avangin tunah hian kan chawl hrih a, a uiawm khawp mai a. Hei hi a bawhzui dan kan Minister-in a hriat ka ring a, min lo bawhzuisak leh turin ka'n ngen bawka ni.

Tin, Tourism Department-ah pawh ka hriatsual loh chuan khaw hrang hranga kan Tourist Lodge 15 lai privatise tura tih a ni a, chung zingah chuan keini kan bial Khanpui pawh a tel a, hei hi tender tawh a ni a, chhangtu pawh an awm a. Mahse tun thlengin a la function lova, khang te kha kan Minister-in min chhan theih chuan ka lawm khawp ang, khang kha nise ka duhtawk e.

SPEAKER : Awle, Pu R. Vanlalvena kha i sawi tawh em? Anih leh le Pi Vanlalawmpuii.

Pi VANLALAWMPUII CHAWNGTHU : Pu Speaker, ka lawm e. Demand No. 7, Excise & Narcotics Department-ah khan MLPC Act kan han hmang a. Dan fel tak nei a ni a, Dan kan neih that vang hi anih ka ring a. He Dan hman atang hian zu in buai leh bengchheng leh tiang ang thawm hi a hma ai khan hmuh tur hi an tlem zawkin ka hria. Tin, zu zawrh atangin tunhmaa zu in ngai lo te'n zu zawrh anih tak avanga zu in an awm hi ka hre lova, midangin in hria nge hre lo chu ka hre lova. Chuvang chuan he Dan hi a tha tawka, tin, tunhmaa zu in avanga buaina siam leh bengchheng siam te khan hetiang anga hremna Dan an hlauh avang khan fimkhur takin zu te pawh an inin an lei niin ka hria a. He Dan hi a thain a kengkawhtute an fakawm ka ti a.

Tin, nichina member zahawm tak tak ten an rawn sawi tawh ang khan Excise Department-ah hian Constable te lak belh leh ni thei se, helaia sum dah hi a tlem em em si a, chuvang chuan dah belh theih ni se a lawmawm hlein ka ring.

Tin, Demand No. 16-na, Home Department-ah khan, City Police lak belh an ni tur hi lawmawm ka ti a, tin, chu mai bakah ft. 6 chunglam an han ti te, khatiang anga lian tha tak tak te an han la tur hi a lawmawm hle a. Han en pawh a Police lian tha tak tak te hi chu an zahawmin an hmuhnawm bik a, inngahna tlak an ni bik lehzualin ka hria. Hetiang anga ft. 6 chin an han ti te hi a lawmawm hle a ni.

Tin, ruihhlo man chungchangah te pawh, kar tin, kar tin chu sawi loh a ni zawn ang te pawn ruihhlo tam tham tak tak an han man thin te hi Home Department chungah hian lawmthu sawi a tulin ka hria. Tin, tualthattute rang tak taka man chhuah an han ni thin te hi kan Police te chak zia tilangtu a ni pakhat a. Tin, hel beihna kawngah te pawh hun reilote chhungin hel hruaitute leh keimahni ngei pawn kan han tawn ngei, min kaptute man an han ni te kha a ropui ka ti a. Hetianga Police chak tak tak kan han neih avang hian a changtu Minister zahawm tak hi a fakawm hle a, vawiinah hian a chungah lawmthu ka sawi a ni.

Tin, chumi a nih rualin, ka bial Vanlaiphai-ah khian Police Outpost kan nei a. Sailulak leh Lungkawlh khi international border a nih avangin Outpost khi min tihchangtlunsak theih chuan ka lawm hle ang.

Tin, MLA zahawm tak tak ten an sawi tawh ang khan, POL ah hian buaina an tawk nasain ka hria a. Police Outpost hrang hrangah hian POL nei lo tih hi chhuanlam a awm fo thin, hei hi chu thuneituten ngaihtuah tha thei sela a lawmawm hlein ka ring. Tuivawl bialtu zahawm tak Pu Piana rawn sawi tawh ang khan, anni area-ah phei chuan Pu Ngurdingliana bial te nen hian motor tha tak hi englai pawhin a awm a tulin ka hria. Kha kan hre vek a, kan han tawn, Zokhawthiang-ah te pawh khan SDPO motor kha a that loh avangin an bialtu Pu Piana motor-ah te khan an bet kual mai mai a ni a. Khang ang te kha hotute hian ngaihtuah tha sela, hetiang ang sensitive area-ah hi chuan bial dang aia duhsakna kan ti dawn nge khatiang ang kha an tih theih chuan a lawmawm khawpin ka ring.

Tin, traffic police hi sawi ve ka duh a, an hmel hmuh hi nuam ka ti a, an zahawm ka ti a, an smart em em a. Tin, traffic police mai bakah hmeichhe police te hi an smart a, an nalh zaih reng a, police tawp tak hi khawlai velah leh duty te hmuh tur an awm ngai lo te hi Home Department-in anmahni department chhung te an inenkawl that zia a langin ka hria a, Home Minister chungah hian lawmthu ka'n sawi duh bawk a ni.

Tin, Agriculture chungchang kha sawi leh ila. Tun sorkarah kut hnathawktute an hlim a ni tih a hriat a, chutin khatin ti a sawi duah lovin. Kan hre theuh ang a, T.V. ah te Chanchinthar-ah te, eng Kut Kut emaw ni an siam a thenkhat chuan kan nuihzat a ni mai thei, Bawkbawn Kut te an ti a, Kurtai Kut te an tia. Heng hi kuthnathawktute sorkarah an lawm zia tihlanna a ni a. Tin, chu mai piah lamah chuanin tunhma a kut hnathawktuten sorkar-ah lungawi lohna lantirin Aizawl khawpuiah kawng te an zawh a. Chumi nilova tun sorkara kut hnathawktuten lawmthu sawina hial an han siam te kha Agriculture Department chak zia tilangtu a niin ka hria. Tin, Lo zawhna hmun hrang hrangah kan hotute an sawm a, Lo zawhna te an han nei te kha thenkhat chuan tul lo an ti mai thei a, amaherawhchu, khang te khan tun sorkarah hian kut hnathawktute an lawm zia a lan tir a ni.

Tin, Demand No. 38-na – Rural Development Department chungchangah khan, keini bialah chuan BADP hian min tuam a, hemi department chungah hian lawmthu sawi lo thei lo niin ka inhria a. Khaw tin deuhthawah Hall te, School te, inkalpawhna tha zawk te leh development tam tak a luh avang hianin lawmthu ka sawi a ni. Tin, a thawktute pawhin dik taka thawh an tum ve a, a bik takin ka bialah te phei chuan, he department chungah hian ka lawm em em a. A chhan chu hmasawna hi khawtin deuhthawah anni avang hian ka hmu a, lawmthu ka'n sawi leh bawk a ni. Tin, chumi piah lamah chuanin a sum te pawh hi hei ai hian dah tam sak theih deuh ni sela a lawmawm hlein ka ring.

Tin, Demand No.17-na Food,Civil Supplies & Consumer Affairs chungchangah hian ka hmaa rawn sawitute khan an sawi ka la hre lova. Tunhma chuan zan khaw tairek a gas lak tuma intlar te kan awm thin a, tunah chuanin nitin deuthaw gas a lak theih e tih thawm kan hre deuh reng mai te hian, kan Supply Minister chak zia a tilang chiangin ka hria, a chungah lawmthu ka sawi a ni.

Tin, buhfai nisela, chanchintharah te kan hmuin ka ring a, ka bial Khawlailung leh Biate-ah kudam ruak te an rawn tilang a. Khami chungchang kha hetia han din takah chuan sawi ve ka duh a. An quota an la a, an la chhuak fel hlim kha thla an lo la a ni mai a. Tin, kudamah hian buhfai hi a khat reng tur a ni tih dan kha a awm chuang lova, an quota an lak a an nghei loh kha chuan a tha a ni mai, ka bial chhung ka hriatchian a nih avangin buhfai nghei avanga au thawm leh tam an awm lo a ni.

A dawt lelah chuan Transport Department Demand No. 42-naah khan, sum tam tham tak an lalut hi a lawmawm ka ti a, sum renchem tur tih laia he department-in sum nasa taka a lo hailut hi a lawmawm takzet a ni.

Demand No. 43-na Tourism Department-ah khan. Ka bial chhung Khawlailung-ah Tourist Lodge sak a ni dawn a, an han lai a, chhunzawm leh a awm ta lova, a changtu Minister zahawm tak hianin a ranglama min chhunzawmsak tur khan ka'n ngen bawk e.

Tin, kan Minister zahawm tak tak te Demand pahnih hi ka thlawp a, budget te hi bengmuka liam zawih zawih ni ve lo mahsela renchem taka thiam taka hman a nih theih nan pawm tlang turin in zavaiin ka sawm bawk che u a ni e, ka lawm e.

SPEAKER : A lawmawm e. Aw, Pu Thanliana.

Pu LALTHANLIANA : Pu Speaker, ka lawm e. Tawite han sawi ve ka duh a, Demand No. 7-na - Excise & Narcotics Department hi ka'n sawi ve duh a. Hei, chhiah laklul tur tam tak kan nei ta a, MLCP Act nge MLTC Act kha kan sawi pawlh nuaih nuaih ka hria a, Mizoram Liquor Prohibition & Control Act, 2014 chungchang hi tlem han sawi ve ka duh a.

Hei ka bial chhungah i ti nghal mai teh ang, zu zawrh theihna permit pek an awm a veng pakhatah. Mipuiin an duh lo a, sit-in demonstration te an ti a, an buai em em mai a. Vantlang inkhawm te an ko a, mi 260 an kal khawm a tah chuan Vote an thlak a, 226 in an duh lo a, 34 in pawin an ti lova, chuti chu an vote hmuhdan a ni a. Dan anga zawrh theihna Permit pek ni mahse mipui heti zo zaiin an duh loh an lan tir nuaih nuaih hi chu kan Minister zahawm tak hian ngaihtuahna min han sen sak leh deuh se ka van ti em aw ka request a ni. Han sawi thui vak dan pawh ka thiam chuang lova. Ka tawng huatthusuhah kei thil hi ka hrethiam lo thin a, ka hriatthiam

loh deuh chu, zu kan zuar a, lehlamah man kan tum bawk a, Breathing Analyser te kan ti a, kan check a. Hmanah ti daih ila, a khaikhin pha lutuk lo mai thei a, Shillong atangin Bus-ah kan rawn chuang a, kan chuanpui pa chu Police a ni a, Kolkata atangin a rawn haw a, kan puten min ban a ti a. Engati nge an ban che u? ka tia, “Gunda kan man a, kan S.I. hovin, kan man te khan min tham a, lehlamah min va hek leh si a, min ban diak a ka rawn haw daih” a ti a. Khangte kha min tihrechhuak a, khatiang kha chu a tluk ka tihna chu a ni chuang lo va. Amaherawchu, kawng lehlamah Dan te a awm a, zalen na te kan nei bawk a. Kan lehkha zir a kan zir pakhat chu, Law & Liberty tih a ni a, mihringin zalenna hi nei mah ila, Danin min hung loh chuan duh duh a khawsak erawh kha chu a dik lem lo a ni tih chu ka hre tho a, he lai chungchang hi ka sawi lang ve hrim hrim a ni.

Tin, Home chungchang hi ka sawi ve leh zawk duh a, hei kan Home Minister hi a fakawm ka ti a, a huaisen ka ti a. Zokhawthiangah nichin khan kan ngaithla a, thlabar takin kan awm a. Kan thlavang kan Chief Minister nen min hauhsak kha a thlamuanthlak ka ti a, lawmthu han sawina remchang hi ka la nei thei chiah lo a, lawmawm ka ti khawp mai a. Kan thlavang kha nasa takin an hauh a, a thlamuanthlak a. Tin, hliam tuarte, khalai a tuartu zawng zawng pawh kha an tuam hlawm theih dan ang zawng zawng khan an umzui niin ka hria a, a lawmawm ka ti khawp mai a, a thlamuanthlak a. Tin, kan PSO te pawh hi an lo dawih lo khawp mai ka ti a, an fing bawk a, min thlamuan reng mai a, min kap reng chung khanin. Anmahni avang khan hlau lo awm te pawh khan kan awm thei a, an lo tha hle mai a Police ho hi, an lo dawih lo hle mai a kan ti a. Kan in surrender turte kha an han hreh khawp a, mahse keimahni kha kan thi ang tih an hlau ve si a, an mawhphurhna kha engemaw chenah zo lo nih kha an hlauh avangin hreh chung chungin kan in surrender ta kha a ni a. An fakawm ka ti khawp mai, he thu hi ka sawi leh duh a.

Tin, he laia Home Department a other charges tih hi nikum lam leh tun kum budget estimate hi a inthlau hle mai a, hei hi engatana hman tur nge ni ang aw tih ka ngaihtuah a. Nikumah khan revised estimate-ah khan other charges-ah nuai 242.70 chauh a awm a, chutih laiin kuminah hian nuai 1213.12 lai awm a, nuai 970.42 in a inthlau ta daih mai a. Tangkaina awm lo tur chuan an dah hauh lo ang a, amaherawhchu han hriat ve hi ka chak deuh a, ka zawt duh a.

Tin, Agriculture lamah hian, hmanni khan Kolasib thlang Oil Palm Oil herna khawl kan zuk en khan a lo tha em em mai a, a lo lian in a hmunte kha alo rem em em mai a. Khawl kha an ngah sia, an nei lian sia, raw material lam pang zawk kha kan feed hneh lo hle mai a, khawl capacity kha alo lian khawp mai a. A rualawh thlak ka ti a, he mi han chawm char char tur khawp Oil Palm hi thar chhuah ni ta se chu ka ti a, ka ngaihtuahna ah a awm zui reng a, he mi chung changah hianin, tam zawk kan thar theihna turin huan nei tute hi sum leh pai te pawh a incentive ang zawng te emaw, a price support emaw zawng te a tanpui khan tun aia tam hi kumtluanin an thar thei em lo a nih pawn, tun aia thahnem zawk khu thar se, an thar chhuah ang zawng zawng khu an her thei dawn ni khuan a lang a. Thil tha tak mai niin ka hria a, kan zuk hmu ve a, a lawmawm ka ti a.

Tin, nimin khan kan ngaithla zawk a, kan member zahawm tak pakhat pawh khan a sawi a, kan thlai thar pangngai kan thiam sa, helai Mizorama awm tihuar lam pang kha a sawi a. Tin, Government of India-in a thil tum pakhat, Technology thar tha zawk hmang a India ram mai ni lo, International market te pawh thleng phak hial khawp a thlai tharte deh chhuah hi a duhdan a nih thu te kan hria a. Chutih rual chuan helai kan thiam tawh sa leh kan tih mek te hi tlansan chuang si lovin tih a ni a. Chuti chung chung pawh chuan ka ngaihtuahnaah chuan Oil Palm te pawh hi hman atang khan kan sawi rei tawh a, a hmunhma buatsaih nan engzah nge kan sen tawh chu ka hre pha hau lo a. Kan thiam tawh sa, he tia kan va tih theih mai, keni ang pawhin kan va tih thiam mai ang chi, Sawhthing te, Aieng te emaw thil chi dang tam tak hi kan ramah hian a tha em em a. Hengte hi tam tak thar chhuah dan te hi ngaihtuah ta ila.

Nikum khan Khanpuiah khian Sawhthing an thar nasa a, an hausak pah angreng khawp mai a, a man pawh kha an vannei a, a to a. Hmarcha te pawh hi uar thar leh ta deuh deuh ila a tha awm mang e aw ka tia. Tin, chu mi tur chuan incentive lam pang hi kan tih mek lai pawh ni se uar zawkin pek theih tum ta ila, price support chungchangah te pawh hian tun aia tha zawk hi tih theih dan chu awm se chuanin kan intodelhna tur hnaivai chu a ni mai awm mang e aw tih kha ka ngaihtuahnaah a awm a, chungte chu ka sawi duh a.

Tin, Food Civil Supplies & Consumer Affairs ah hian ka sawi duh chu hei, Food Security Act chungchangah kan hria a. He lai inziakah chuan, TPDS dawng thin te, thingtlang mi 81.88% a tuam ang a, khawpui mi 46.60% min tuam dawn chauh a ni a. Mihring nuai 760000 vel kan ni a, nuai 3 vel zet zawt kha hei hian min huam pha dawn lo va. Chumi nih lai chuan in Ration lak pangngai ang rate vel a lak theih dan tur kawng kha kan Minister zahawm takin a dap a. A tir khan ka lungngai angreng khawp a, a tha viau a, amaherawhchu ngaihtuah chian khan a tha viau lo deuh emaw ka ti a. Mahse, ruahmanna tha tak mai a lo chhuak ta hian min tihlim khawp mai a, ngaihtuahna a seng thiam angreng ka ti a, a fakawm ka ti a, ka fak a ni. Tin, Supply Department Budget-ah hian supplies and material tihah hian in ₹17833.10 lakhs a awm a. Hei hi eng atana hman tur nge niang aw tih kha ka ngaihtuah a.

Tin, hei han sawi awm a ni em ka hre lo (SPEAKER : Minute 10 ihmang tawh ania) eee, ve teh tlat a kei leh kei lo angin hun hi ka hmang full ngailo khawp mai a, sawi tur ka hre dawnlo emaw ka ti a ka lo hre ve a ka lawm khawp mai, Pu Speaker. POL hi transport-ah hian alo lang ve teh tlat a, department dangah chuan alang lova. Kumtir a tlem ta tial tial mai a, transport department hian bus an nei tlem ta tial tial a. POL hi an mamawh lo tial tial tihna nge ni? Hna an thawk tlem tial tial nge, alternative dang kha an nei tha zawk tih ka ngaihtuahnaah a awm a. Tun kumah hian budget estimate 15-16 ah nuai 120 an dah a; nikum revised 14-15 ah khan nuai 128.33 a ni a, a hma leh kum 13-14 actual-ah khan 160.46 dah a ni a, ti hian a rawn tlem chho tial tial a.

Tin, transport department hian taxi permit te, sumo permit te, bus permit te a pe ta a. Parking chungchangah hian emaw enge ni a thuneihna chin ka hre lova. Tin, a plying-ah te pawh

hian transport department thuneihna niawm tak a ni a. Nichin khan kan sawi a, municipal lampang nge kaihhnawih ka sawisual a nih chuan min ngaidam ula, green bus, express bus te kha kan ti a, nikum khan kan sawi nasa a, a reh leh ta daih a. Municipal lam atang khan a ri nasa khawp mai a, a thawm te kha a lian a. Tin, saw vanneih thlak takin kan ti dawn nge mawni thingtlang tan chuan vanneih thlak a ni ang a. Kan kawtah sawn sumo stand a awm a, khaw tam tak an ding a. An awmna lai Zemabawk kawng saw a chim leh ta vak mai a, an rawn tlanlut leh tawp mai a ni, stand ngaiyah khan. Chutih lai chuan an awm loh chung khan kan kawt zawnah chiah khan bus stand an rawn rin bawk si a, sumo an rawn ding a, ka motor a ding duh bawk si a, bus an ding duh bawk si a, an ri nuaih nuaih reng mai a, a chhangchhiat thlak in a nuam angreng phian zawk ka ti a. A lehlamah chuan sumo tan chuan ka lawmpui a, thingtlang ho tan chuan a tha, a chhan chu taxi chuan man ₹ 100 vel khati lai atang chuan an save thin a ni, chungte chu kan sawilang mai mai a. Ka tan erawh chuan a buaithlak duh thin khawp mai, a chang chuan bus driver ten min han vin lek lek, conductor ten a chang chuan min melh rum chang ka tawng ve zeuh zeuh thin a, kan sawi mai mai a nih chu.

Tunhma khan department pakhatin anmahni compound chhungah hian parking fee an khawn a, tunah chuan an khawn tawh lo a. Hmanni chu private hospital pakhatat damlo kanin ka kal a, parking fee min khawn a ni, mak ka ti angreng khawp mai a, hei tu tihtir nge mawni? Private hospital building-ah parking fee an khawn ve che u em ka hre lova, a receipt kha ka lo paih daih si a. Pu Chairman, minute 2 ½ aw.

Tourism hi kan sawi ve lawk. Hmanniah tourist lodge privatisation tih kha hemi ruahmanna hi tha ka ti a. Tender enge quotation notice an ti emni? An chhuah a, tam takin an chhang a, 11-in an chhang a, a chhang ho zawng zawng kha an pe lova, 6 vel an pe a, 5 nge mawni, an re-tender leh a, enge a awmzia aw? An re-tender leh khan basic a chhan hniam theihna leh upper ceiling a kha an rawn dah ta a ni. A chhan hniam theihna ber ah chuan ₹ 10,000/- an tia, a sang ber ah khan ₹ 15,000/- aia tam in a chhan theih lova, a hma daih a, an pek loh te khan chuan ₹ 50,000/- in an chhang daih a ni. Vawinah hian inrenchem kan tum na zawnah ngaihtuah chuan khatiang a ₹ 50,000/- a chhang te chu pek mai awm ka ti a. Sum kha kan hmuh tam theih phah dawn si a.

Hei zawhnaah pawh ka zawt tel a, ka zawhna hi a chhuak lo zeuh zeuh mai a. Chuvangin, a chhuah loh palh takin he thilah hian in intentional thil a awm emaw ni chu aw ka ti a. Khami upper ceiling a kha ₹ 15,000/- an rawn dah sa tlat mai a ni. Khangte kha thildik a ni em? Ngeni a tum kha kan va hre pha lova, minister hriat ah kan sawi duh a ni. Budget hi ka thlawp e, Pu Speaker ka lawm e.

SPEAKER : Le, sawi tur kan awm tawh lo, e..tunge? Pu Vena maw? nichin khan hetah i hming a awm sa a, i phar lo a an rawn ziak sual emaw ka tia, le, sawi rawh le.

Pu R. VANLALVENA : Pu Speaker, ka lawm e. I hma chiah a chair lakah khan ka vui lek lek, “recess room-ah ka chair hunah thui deuh i sawi ang, hun ka pe teuh dawn che mi ti a, ka phar reng a, mi en leh duh miah lo mai a”, engati nge mawni ka ti a. An khuaah ka va kal a, ngatinge ani hi a tha si a, a miziaah hian congress mizia niawm tak a ni si a, congress hian kan awt khawp mai a ka ti a. An thenawmten, “nia congress-ah a lut dawn emaw kan ti a thenawm ui a in a seh aniang, MNF ah a lut daih mai a”, an ti a, a fin leh hun hi a awm em ang chu maw, 2018 chho velah te chuan helamah a rawn awm tawh mai thei a ni.

Pu Speaker, ka lawm e. Thil pakhat sawi lawk ka duh a, kan senior Pu Sangthuama a chhuak hlauh a, thu hma ang deuhin. Food security selection chungchang kha vawiin lamah chanchinbuah te ka hming alo lang a, i phalnain tlem han sawi thain ka hria a. Department hotu lam atangin lehkha ka hmu a, Food & Security a selection committee Rawtna nei turin an rawn ti a. Chu chu ka bial chhunga mi tu tu te emaw rawnin rawtna, DCSO ah kan thehlut ve mai a, ka letter head ka la hmang zui lehngal a, a dik lo ang tih ka hre chuang lova. DCSO in lehkha thawn chhuah a awm tih hre lovin Local Council hruaitute lehkha a lo pe bawk a, an inhriat tawn loh avangin, ka chesual chu a ni ta der mai a. inrawlh hrim hrim emaw tumna vang ni lovin lehkha kan dawn avanga rawtna siam kan ni a, a paw ka ti khawp mai a. Ama’rawhchu, ka rawt te kha party mi an ni lova vengchhung mi hrang hrang prominent citizen nih tling kan mi rawn te, an rawn propose hlawm a. A then chu kohhran upa te, zirtirtu pension, Pastor tih te an ni a. A mimal mal pawh en ula, party a inziak lutte an ni lo tih min hriatsak ka duh, inrawlh hrim hrim duh vanga ti kan nilo tih min hriatsak ka duh a. Lehkha inmil loin lehkha 2 a lokal a, inhre tawn si loin kan lo inbawk thuah a, paw ka ti khawp mai. Kan tum loh deuhin thil kan tipalh a ni tih kha hmasa-ah hian ka sawi duh a ni.

Pu Speaker, kan demand sawi turah hian budget lam kha chu luh chillh a, sawi neuh neuh ka tum lova. Demand tha tak kan minister-te zingah pawh kan chhuan ber berte zinga mi 2 demand kan sawi dawn a, a lawmawm khawpin ka hria a. Thui tak ka sawi lovang a, hun kan ngah lo bawkin ka hria.

Excise-ah luh hmasak ka duh a. A lawmawm ka ti a, kan ramah zu kan control a, kan hneh lo em em a ni tih House hmasaah nasa takin kan sawi tawh a. Zu thalo kan in avangin mihring nunna kan hloh nasa a, kan Excise Minister zahawm tak pawn a sawi tawh thin a, kan duh vang nilovin miin zu chhia an in nasa lutuk ang tih kan hlauh avangin sawrkarin loh theih lohna vang zawkin zu a zuar ni hian ka hria a. Kan ram hian hma a sawnin ka hria a, kan thalai zu in thin mite pawh hian hma an sawnin ka hria a.

Nichin khan kan ngaithla tawh a, khulam bial, Rangvamual kal tlang thin Pu Rinthanga kan member zahawm tak pawn a sawi a, “zu kan zawrh hnu chuan khawlaia zu in hmuh tur an awm tawh lo a, kan changkang ve sawtin ka hria a, hei hi a lawmawm ka ti a” a ti a. A bik takin kan rules hi a thain ka hria a. Excise-in a rules an rawn siam chhuah kha, zurui khawlaia an

man te hna an thawhtira hmun an phiah tir te, bawhlhlahw an thenfai tir thin te kha a tha em em in ka hria a. Ka hriat leh danin khatianga thian ho khawlaia an hrem thin damdawi in te leh market te tifa tura an tih thinte khan an hreh em em mai thin an ti a, kha kha a tha ka ti a, an in loh phah anga, khawlai te a thianghlim phah ang a, kan tih fo zel thain ka hria a.

Tin, zu in leh in lo hriatna breathe analyzer hi kan leklam nasat lehzual a thain ka hria a, hei hi an hlau hle a ni. Guwahati sumo counter neitu pakhatin a sawi chu, ‘Police an lo kal a, an ham chi ang hi an ham tir a, tun hmaa driver ring tak tak a tawng lung lung ang chi kha an reh vek tawh, a tha tak tak a ni,’ a ti a, chu chu tuna a hmel kan hmuh dan a ni a, a lawmawm hlein ka hria a, tan lak lehzual sauh sauh kan ngai a ni.

Tin, Home Department hian hmuh theihin hma kan sawn a ni tih hi a hriat a. Term hmasa, sawrkar hmasa lamah te kha chuan kan hria a, he House zahawm takah pawh No Confidence Motion move a ni a, Aizawl khaw chhungah leh Mizoram chhung hmun hrang hrangah Hel tawmbuk a tam zia te leh bazaar-ah te khawi lai laiah emaw an zalen zia an sawi tawh thin a. Tin, chanchinbu luahtu tam tak pawh a ni thin a ni a. Tunah chuan kan Home Minister zahawm takin term khat chuang an chelh a, hma an lak hnu hian khatiang zawng zawng kha a reh a, sawi tur a awm tawh lo a, Aizawl khawchhung kan ralmuang em em tawh a ni. Chuvang chuan, kan Home minister zahawm tak hmalakna avangin vawiinah chuan mipuite hi kan zalenin kan thla a muang khawpin ka hria, a hmalaknaah lawmthu ka sawi duh a.

Amaherawhchu, Pu Piana khan a rawn sawi tawh a, secret service ho tana pawisa dah hi chu a beitham deuhin ka hria a. Anni hi an pawimawh em em a, CID kan tih hi, ka hmelhriat ve hlawm a, thiante pawh ka nei ve a, telephone bill-ah ringawt pawh hian an hmang hnem em em mai a ni. Hmun hrang hrangah tute emaw biak ngai an nei a, thil hriat duh chi hrang hrang, information collect na, an telephone bill ringawt pawh hi a sang tham a ni. Chuvangin an hlawh ringawt hian a daih lo a, misual umin hmun hrang hrangah rei tak tak an cham chang a awm a, chutiang chuan hun an hmang thin a. Chuvangin helamah hian pawisa hi a dah tam deuh hlek theih em, anni hi kan inngahna tak tak te an ni si a, tlema kan thuum that deuh hlek hi a tha awm mang e, tih rawtna ka’n siam duh a ni.

Tin, Agriculture-ah hma kan sawn dan hi nichin khan an sawi tawh a. Mihring hmasawn zelah lei lehna atana ran chhawr te alo hrehawm a, ran an lo khawngaihthlak bakah an nunna te a lo tawi thin a, mihring kut ngawta lei han leh te a lo harsa a, buh tam zawk thar alo harsa bawk nen, chuvangin kan Agriculture Minister zahawm tak ten remhre takin power tiller, leilet neitute hnenah a tlawmin an han lei tir a, tunah chuan Subsidy-a an pek ringawt pawh hi tam tham tak a ni. Mizoram hmun kil hrang hrangah an pechhuak vek tawhin ka hria a. Tunah chuan leilet te pawh mihring hah lutuk lovin, hlawk zawk leh sawt zawk bawk siin khawl hmangin an letin an siam zung zung thei tawh a ni a. Heng hmel han hmuh ringawt te hi a nuam a, kan ram tan hmasawna tling a ni. Chuvangin kan minister-te hi an fakawm ka ti a.

A dawt lehah chuan Demand No.17-na, Food and Civil Supply minister zahawmtak hi a hmalakna a ropui khawp maia, a ngaihtuahna hi a seng nasa hle a ni tih a hriat a. Vawikhat pheih chu a thusawi han sawi chhawn ka duh chu, “ka mumangah pawh hian buhfai ka hmu a ni,” a ti a, a fakawm thlawtin ka hria a, a ngaihtuahna hi a seng nasa a ni tih a chiang a ni. Mega block a awm dawn an ti a, i veilama miten an han sawi thaih a, alo hlauhawm ve reng bawk nen, a changtu dinhmuna han din chuan an sawi thaih ang kha a thleng tak tak ang tih kha a hlauhawm bawk si, a ngaihtuahna a seng nasa hle a ni. Khang zawng zawng kha Mizoram tan tha takin a sutlang thei a, harsatna lo thleng thei tur ni a ngaih zawng zawng pawh min thlen tir lo thei a, a lawmawm hlein ka hria a, hetiang minister kan nei hi a lawmawm takzet a ni.

Ration card diklo a tam thin zia kan hria a, population aiin nuai hnih dawn ten ration card hi a tam thin a ni tih kan hria a, chu chuanin Mizoram State sum min hloh tir nasa em em a, digitization hmangin an siam rem a, tunah chuanin ration card lem ni a lang tam tak an paih a, ration card pawh dik leh fel takin a kal niin ka hria a. Hengte hi a lawmawm ka ti a, a hmalakna hi a chhuanawm ka ti takzet a ni.

Tin, vawiina kan minister-in a lak hma kha chuan FCI kan dawr thin a, an niin an duh zah zah buhfai kg an chhiar ti ila kan uar lutuk lovin ka ringa, ani hian rem hre takin local market ami an leia, FCI dawr lovin helaia keimahni ram chhunga kan tharte an leia, chu vek chu ration-ah min han sem tir leh a, hengte hi a remhriat thlak ka ti a. A hmaa kan lei ai tlem mah kha kan lei awm mang e aw, ka ti a, chuti chung chuan mipui hi kan hnianghnar em em a. Buhfai a awm lo tih a awmlo a, local market a hetiang an tih atang hian hnianghnar zawk in buhfai kan dawng thei a ni. A rem hriatna hi a lawmawm ka ti a, ka fak duh a ni.

Demand No 42 na, Transport ah khanin (Speaker : I hun i hmang zo a nia aw) Pu Speaker, khawngaihin minute hnih khat lek. Fakna tur tam tak a awm a, kan sawrkar tan pawisa tam tak an huilut a ni tih kan hria a, Vairengte-ah te check gate fel tak an nei a khungah te pawh khuan chhiah tam tak an lalut a ni. Rawtna ka neih duh chu, hei taxi permit emaw, bus permit emaw Auto rickshaw permit emaw an pek hian a form-ah sawrkar hnathawk tan dil awih a nilo tih a chuang a. Chutah an fill up-ah chuan sawrkar hnathawk in awm em? Awm lo, tih kha a diltu chuan kan fill up dan ni mai tur a ni, dil awih loh a nih avangin. An chhungkuaah hian sawrkar hnathawk hi an awmlo tak tak em tih hi kan pek tur te hnenah kan finfiah hmasak a tulin ka hria a. A chhan chu Session hmasaah pawh khan ka sawi tawh a. Taxi nei te, bus nei te, autorickshaw nei te pawh hi sawrkar hnathawk an tam riau a ni. Sawrkar hnathawk lo, a mamawh zawk leh dawmchhuah ngaite hi permit nei pha loah hian an awm fo thin a, chumi tihrehna tur chuan helai hi fimkhur deuh zawkin kalpui a thain ka hria.

A tawp berah chuan Pu Speaker, demand no.43- na Tourism Department hian an approach an thlak niin ka hria a, a lawmawm a. Tunhma chuan kan hria a khaw tam takah Tourist Lodge kan sa a, luah si lovin building tha tak tak a awm a, heng hi privatise zawnga an kalpui hi a

lawmawmin ka hria a. Chutih rual chuan mipuiin kan tlawhpawh theih, kan chhawr tangkai theih tur intihhlamna zawng hian tourism department hi a kal thei em? Heti zawng hian kal ta ila mipui hian kan chhawr zawk awm mange, department pawh hian a hlawkpui zawk awm mange tih ka sawi duh a ni. Pu Speaker, hun min pek belh a ka lawm khawp mai.

Kan Minister zahawm tak takte Pu R.Lalzirliana leh Pu John Rotluanglana te demand hi pass ni se, ka rawn thlawp e. Ka lawm e.

SPEAKER : Pu Ruatkima hi a phar hmasa a ni awm e. Mahni hun kha vawn dik tum ila, tin, kan speed tlemin titha ila.

Pu LALRUATKIMA : Pu Speaker, kan pel zeuh zeuh a kei hi sawi tur ngah mi ka ni a, min hrethiam hram leh la a thain ka hria a, ka'n ngen lawk che u a.

Pu Speaker, vawiinah hian demand no.7-na Excise & Narcotics atang hian bul ka'n tan ang a. Zu kan zuar a, zu tha in avangin kan thatpui na hmuh tur kha an rawn hmu teuh mai a, mahse kan police boral zat chanchinbu atang a kan hmuh te han en kha chuan kan that pui lo tih a lang a. State pawn ah kan sum leh pai tam tak a luang a, MLPC Act kan tih kha tukluih, barh luih dan ni te pawh hian tun hnu ah hian ka ngaituah na ah a awm ta rum rum mai a. Chuvang chuan kan inenlet hi a ngai khawp mai a. Dan kha excise siam a ni lo va, a siamtute keimahni tho kan nih laiin a lekkawh kawngah pawh thahnem kan ngaih a ngai a, theihtawp kan chhuah a ngai a. Chulayah chuan Liquor Card kha kan issue a, quota kan siam a ni, amaherawhchu Pu Speaker, vawiinah hi chuan kan free sale ta ringawt mai a. Nimin lawkah ka zawh kual tir a ka driver leh ka PSO, vendor thenkhat chuan an lo free sale ringawt mai a ni. A dik lo hian ka hria a, dan chuan quota a siam a, card hmang a lei tur tih a ni bawk a, khalai kha chu kan Minister zahawm tak hian ngaihtuahnaah min lo neih sak se a thain ka hria a.

Tin, Excise & Narcotics-ah hian RTI Act hmangin zawh theih kan nilo te an ti lehngal a, chutiang khawpa superior department chu an ni reng em ni? A fel lovin ka ring a, kan Act kha han en khan khalai khan a huam pawhin a lang lova.

Tin, Salary Head kan han tihah hian kan dah beitham khawp mai a, Police/Excise Force kha mi engemaw zat tunhnaiah hian kan lak belh dawn niin ka hria a, an la tifel chiah lova, a punna kha a tlem deuhin ka hria a. Tin, thuum chak an ngai khawp mai a, heti khawpa hmalakna tur an neih si hi chuan, warehouse-ah te nitin an duty ve a ngai si a, chuti a nih si chuan kan force hi kan tihchak hle a ngai dawn niin ka hria a, chu chu kan sawi duh a.

Tin, Home Department demand no.16-naah khan, nikum kum tawp kan kharna leh kum bul kan tanna kha a lungchhiat thlak khawp mai a, kan ram dinhmun chu kan hretlang vek a. Chuvang chuan Law & Order kawngah tan kan lak chhoh a ngai a, hma pawh kan sawn chho zel a.

Duh khawp awm lo mah se tunah hi chuan kan demand atanga han langah hi chuan City Surveillance Project te pawh kha kan han ti a, a enkawluina tur pawisa sum kan dah kha hmuh leh tur pawh kha a awm si lova, kan zo tawh nge kha project kha tih kha ka ngaihtuahnaah chuan a awm a.

Tin, Non-Plan leh Plan Salary te kha han en khan nikum ai khan kan hlawh atana kan dah kha a pung chuang mang hauh lo mai a, chungte chu enge ni a awmzia aw tih te kha ka ngaihtuahnaah chuan a awm a.

Tin, Prison bikah khan District jail te, Sub-jail te tunah hian sak zawh tawh tam tak kan nei a, amaherawhchu kan la function lo a ni. Enge a chhan chiah ka hre lova, chuvang chuan kan central jail te leh jail hrang hrang te a tawt a, chuvang chuan heng kan district jail te, subjail te kan han tih kan neih ang ang te hi thum that a, tihchangtlun ni thuai se a thain ka ring a.

Tin, kan ram a ralmuang kan ti a, a lawmawm khawp mai a. Chutih lai chuan hel kan nei a, hmanni lawkah kan MLA zahawm tak tak te helho hmaah banphar ngai hial khawpin an awm kha a zahthlak in ka hria a. Chuvang chuan kan police fel tak tak ten state pawn lama mite an han man te pawh kha a lawmawm a. Chutih rual chuan kan state chungah ngei te pawh Kolasib-ah te hmanni lawkah an man a, chungte chu an chhuah leh ta mai nge ni an chanchin kha kan hre zui leh ta lova, chuvang chuan tan kan lak leh zual a ngai a. Chutih lai chuan a thawktute incentive emaw, award kan tih ang chi, he House zahawm takah ka sawi tawh ang khan Ex-gratia pek chungchangah te pawh khan kan Finance lam te pawh kha uikawm lutuk lo se a tha awm mange aw tih kha ka ngaihtuahnaah chuan a awm tel baw k a.

Tin, chutih lai chuan Lunglei police station kha sak that turin April ni 13, 2010-a kan Home Minister zahawm tak va kal khan ngaihtuahna pawh a hman thu leh 13th Finance Commission pawn cheng nuai 216 zet mai sanction ni tawhin ka lo hria a. Chuvang chuan saw a building saw kan hmuh angin a hlui, a tawl tawh viau mai a. Chuvang chuan a rang lama hma lak theih ni se tih kha ka ngaihtuahnaah chuan a awm tel baw k a.

Tin, MLA thenkhatte Escort Party hruaina tura motor han hire mai kha chu a zahthlak mange aw ka lo ti ve a, tiang state pakhat ve riang ruangah. Khatiang area a kal tur kha chu Pu Speaker, pahnih chiah kan nei a ni. Khatiang motor kha chu i provide ang u, a zahthlak a ni. Hei kan unstarred question no.11-na ah Police department hian motor 672 kan nei a, anni escort party kalna tura City Rental Car atanga hire kha chu tunhnuah chuan awm tawh lo sela a that ka ring a, chung te chu kan Home Minister zahawm tak pawh ka ngen duh a.

Tin, heta kan demand a rawn lang Tuikuk Repatriation hi kan resolution-ah khan kan han telh a mahse kan ballot-ah 5-naah a awm daih mai a. Hei kan hre tlang vek a, ramin kan vei tlang a, rawn kir duh ngang lote ni 7 April, 2014-a Election Commission pawn ngaihtuahna a hman

leh sawrkar pawhin thutlukna kan lo siam tawh ang khan heng hi chu Mizoram Electoral Roll a paih tur a kan tan tlan te hi a tul lehzualin ka hria a. An rawn kir duh miau loh chuan an awmna hmunah electoral roll-ah an awm ve mai kha an pawm ve mai a tul hlein ka hria a ni.

Tin, demand no.31-na Agriculture. Agriculture hi hei kan ram inngahna, ei leh bara kan inngahna an ni a. Chutah pawh chuan kan Flagship Programme NLUP, Nodal Department an nih angin an pawimawh takzetin ka hria a. Chutah chuan Lawngtlai East bialtu MLA zahawm tak khan vawkte posi hrang hranga thlalakte kha alo awm reng a nih chuan khang ang chi te kha chu enfiah a, ngaihtuahna hman te kha chu a tha awm mange aw; heti tak a vawkte posi hrang hranga thla kan lak a khatiang a sum siam nan emaw enge maw tih nan kan hmang a nih kha chuan a fel dawn lovin ka hria a.

Tin, Economic Survey 2014-2105 nikum a miah khan WRC Potential Area hi hectare 74644 kan nei a. Chutah chuan leileta siam chu 15620 hectare a ni a, a percentage chuan 20.93% chauh tunah hian kan la hmang tangkai a ni. Chuvang chuan la develop loh hectare 59024 la awm niin a lang a, hengte hi kan ei leh bar zawinna kawngah te, kan intodelhna tura develop hlan a nghakhlehawm khawp mai a, tan kan lak tlan zel a tul takzetin ka hria a.

Tin, demand no 38-na Rural Development-ah khan ka'n kal leh anga. Ni 100 inhlawhnaah starred question-ah khan 400 chuang la pek chhuah loh awm ni khan a lang a, Zoram mipuite buh kan thar chho a, amaherawhchu kut hnathawk tlangram lo neih bansan zel kan nih avang hianin kan inngahna kha inngahna tlak a nih loh tulh tulh avang khanin, inhlawhna a vang si a, hei hi release hran theih ni se chuan a tha awm mang e aw tih kha ka ngaihtuahnaah chuan a awm a ni.

Tin, material component reng reng department a an thawk vek zel mai hi a thalo, RD Staff ten an thawk ringawt zel mai a tih thu kha Serlui bialtu MLA zahawm tak khan a sawi a, hun hmasa lamah khanin a awmzia leh helaiah khan induhsakna a awm thei a ni tihte pawh ka lo sawi lang tawh a. Kha i ding lama mite pawh an lungawilo a ni, Pu Speaker, hei hi enfiah a, material component a a kal hmang tura hi chu ruahmanna fel zawk kan neih hi a tul khawpin ka hria a.

Tin midangin an sawi lem loh Model Village kan han ti a, MLA zahawm tak tak ten Model Village kan adopt vek a ni. Chutah chuan a hmalatu tur pawh RD hi an nih avangin, anni hianin ruahmanna an rawn siam zel a, chak takin heng kan thlan khaw hrang hrangten hmasawna an neih ve a, an chan ve theih hi kan duhthusam a ni a, chak lehzuala hma an lak a tulin ka hria a.

Tin, demand No. 17, Food, Civil Supply and Consumer Affairs-ah khan NSF hman tan tur thu kan hria a, Village Level Selection Committee thlan danah khan kan member zahawm tak tak ten an sawi tawh a, khatah khan thil fel tawklo awm nite pawh khan a lang a. Hei kan han sawi khawm a, khati ringawt a kan kalpui chuanin Act a nihna angin kan thatpui tur angin kan

thatpuilo thei bawk si a. Chuvang chuan a tul a nih phawt chuan kan Minister hi ngen ila, ani hi chuan ngaihtuahna a hmanga, nimin lamah pawh Kolasib District leh Aizawl West DCSO te hnenah pawh a siam danglam tir a, kan lawm khawp mai a, a dang te pawh hi authority village ten uluk taka an ngaihtuah kha a tha ber zel turah kan ngaih avangin, tukin lama kan ngaihtuahna pakhatat phei chuan a demand hi kan pawmpuilo mai dawn em ni kan ti rum rum a. Mahse a rawn wind up-naah fel takin a rawn ti turah kan ngai a, kan lo ngaichang ang a.

Tin buhfaiah kan intodelh kan han tih rual khan Kudam ruak a awmlo an ti a. Thenhlum Kudam kha kawng chhiat avangin a ruak hiau mai a, chutah chuan Changpui hi an mangang khawp a. Pu Speaker, thil mak deuh mai ka sawi duh chu JCB in buhfai zuk thiar a mawle, a rapthlak khawp mai a. Chu JCB chu MZ-06/4510 hmangin Buarpui Kudam ami an thiar a, hei hi chu kawng chhiat vangte pawh a ni ang a, amaherawhchu, tan kan lak tlan a ngaih zia tilangtuah hmanh ila, khang kha ka'n sawi tel duh a.

Tin, Transport Department kha Directorate an rawn insawn thlak hunah Building tharah hian Thingtlang Sumo kan hnawhchuah kan hnawhchhuah tuna vakvai deuh ti mai ang, khulam thlanglam kal tur ho leiminna hmunah an awm bawk si. Saw lam pang Zemabawk ho leiminin a tibuai bawk si a, khatiangte kha a ni a, engemaw zat chu khilai hmun Chaltlangah khian kan accommodate theih kan ring a. Chungte chu kan Minister-in ngaihtuahna min hmanpui se a tha awm mang e aw ka'n ti a.

Tin, Tourism Department hi a pawimawh khawp mai a, nimin lawkah Anthurium Festival kan hmanh a, hlimhlawp te, huau huau te kan mamawh a ni. Traffic nasa takin a zam pah a ni, chu chuan a entir chu kan tuipui kan phurpui a ni. Amaherawhchu a result erawh chu a zana thil tleng hrang hrangte han thlir let erawh kha chuan hrehawm tihna chin ka nei a.

Tin, MTDA atangin hmalakna tur tam tak kan nei bawk a, heng hian Tourism Industry a tichangtlung ngei ang a, tin, Tourist Lodge privatise turin kan ruahman a, tender kan chhuah a, kan re-tender leh mai kha engnge ni a awmzia ni ang, ngaihtuahna a kal thui khawp mai. Tin Vanzau Tourist Centre, Chalfilhtlang ami pawh kha kan hawn thuai ka'n beisei a. Tin Economic survey report atang khan nikum chhung khan khualzin 501901 zet mai kan han nei te pawh kha a lawmawm takzet zetin ka hria a. Tourism Industry hi State te keini ang Hill Station a awm te ang hi chuan kan sum hnar lian tak tur ni te pawhin a lang a. Chuvang chuan hei hi kan hmasawna tur leh kan State sum lakluh tithatu tur a nih avang hian helam kawngah pawh hian ngaihtuahna kan pek len chhoh zel hi a tul takmeuh meuhin ka hria a. Kan Minister te pawn tan han la lehzual sela tih kha ka'n sawi ve leh duh a ni a. Ka lawm e.

*Speech not corrected.

SPEAKER : Le, Pu Sangkunga

Pu T. SANGKUNGA : Pu Speaker, chhiat tawh avangin tlai ka rawn dil a, hei hun kan dil leh a, min phalsak avangin ka lawm e. A hmasa berin demand no. 17-na Food and Civil Supplies kha ka'n sawi ang a. Kan Minister chak takin heti khawpa fur rei leh Rel kawng siam chung pawha buhfai hnianghnar tak mai leh tuna Food Security an implement chung pawh a, chhung tin maiin buhfai tlawm a subsidy a leina tur min siamsak avang hian fak tlak niin ka hria a.

A dawt lehah chuan Warehouse man to tak tak, sazu luh theihlohnan a bang rangva te kan ti a. Concrete chhah pui pui, heti zozai a chhah leh quarter, a bula concrete saka ti uai uai mai hi, 'Amah fak mai loh zawng' tih hi kan sak tur niin ka hria a. Opposition in khati khawpa an ngaihtuah pawhin kawngchhiatna kudam pakhat a ruak tih loh chu ruak reng reng an hrelo mai kha an lawmthu zawk ni tein ka hria a, lawmawm ka tia.

A dawt lehah chuan Transport Department hi ropui ka ti a, rei tak ka awm tawhna a ni a, Bus kan han run ve te hian a hlawk theilo reng reng. Khawiah mah Sorkarin an run vaklo, chuvangin khalam titem a miin an mamawh thutna leh a pilril zual a mamawh zual private te kal duh lohnaa han kal zeuh a tax tha tak heti zah an han la ta hi ropui ka ti a, kan ram pawisa harsatna an chhawk hle dawnin ka hria a. Transport Department Demand No.42 han sawi hian ka rilruah a lo lang a.

A dawt lehah chuan, Tourism Department hi, kum 7 ka awm tawhna a ni a. Tourist Lodge tam tak kan sak hian central-in 10% state sorkar ina a tum tur a tih hi pakhatmah kan pe lo a ni. Kan sawi bo zel thei a. Tourist Lodge a tam a, hei, kan Minister chak takin tunah phei chuan ka bialah pahnih, Khuangleng-ah leh Vaphai-ah min sak sak tur hi a chungah ka lawm em em mai a. Khilai thil hlui, Pipu sulhnu en turte thlenna kan mamawh a, tam tak mi chhawk dawnin ka hria a. Amaherawhchu, ka han sawi duh chu, ka awm lai pawha ka sawi a ni a, a thlen man hi Circuit House let 4 a rate hi a sang a, Kolasib-ah te khuan thingpui in man a hma a tlawm pangai an tih kha chuan Block staff zawng zawngte khan chhunah te an va in a, a rate kha ka hnial hle chung pawhin ka hnial hneh si lova, a let 4 vela kan han tihto khan an in ngai reng reng tawhlo, a reh reng mai a, khu, kan khar lo chauh a ni. Chuvangin a rate tihhniam hi, kawng siam leh mihausa contractor luah tur chi a nih loh chuan a hlaa mite rate hi ennawn tha hlein ka hria. Chu chu kan Minister-in min han hriatpui se.

A dawt lehah chuan Rural Development hi, keini khawchhak lamte chuan NEC Road khawthlanga wawi tam a crore 100 tel an hmuh lai hian keini khawchhak chuan a hming chiah hi kan la hria a. NLCPR tih te DoNER, World Bank, Asian Bank ti a hmuntin an laih lai hian keini chuan a hming hi Chanchinbu-a kan hmuh zawng hi keini khawchhak chuan kan hria a ni mai a. Chuvangin kan vui nasa a ni, keini khawchhak ho hi chu Estimate Committee-a kan sawi apiangin, in lo sanction leh tawh a ni maw kan ti reng mai a, kan kalna apiangah.

BADP-ah kan Minister zahawm takin min han tuamhlawm ve hram thin, kan Ministry awm hma BADP lo chhuah tirh phei chuan khawchhak lam khian kan chang miah lova khawthlang bawk kha a bialtu Rural Development changtu khan a vur zo vek a, khatiang kha tunah chuan engemaw chen kan chang ve ta hi kan lawm a. Amaherawhchu, kan bial In kang te, leimin te kan puih vena a tawp ta vang vang hi chu Pu Speaker, rilruah thun leh selangin Finance te, Planning lam te pawhin ka ti khawp mai.

Demand No. 16-na Home Department hi han sawi leh ila. Hmanah English news pakhat ka chhiarah chuan India ram Independence tirha pui an tih chu Sardar Valabhai Patel Home Minister ropui tak, statesmanship ropui Raja Independent 200 chuang awm sipai chak tak tak nen a zawm zung zung mai a, ropui an ti a, Nehru-a khan India ram huikhawm dan a lo thiam bawk si a, Prime Minister leh Home Minister India-in a neih fuh zia an rawn ziahna hi ka chhiar a, tuna kan dinhmun chiah hi a niin ka hria.

Kan House Leader hian mi huikhawm a thiam a kan Home Minister hi Sardar Valabhai Patel-a ang deuh khan a chak a, a huaisen em em mai a, a ropui a statesmanship hi. Tunhma kha chuan mi an han ruk hian engzat takin tlan leh ang maw tih kha mi rilrua lo lut hmasa ber a ni, tunah chuan a rutute chu an rethei mai mai dawn mange aw, tih hi mi rilrua lo lut a ni ringawt mai a ni. A pe han ti mahse tuman an ring tawh lo reng reng, a pe teuh lo em mai tuna Home Minister hian a ti tlat mai a ni. Mipui rilru, an sukthlak leh thlamuanna her danglam bawih thei Home Minister kan nei hrim hrim hi a Demand sawi dawnah hian ka fak duh a. Kan zavai hian mi fak hi kan hreh a, an thih hnuah hian kan fak vak a, an damlai hian fak mai tur niin ka hria a, keipawh min fak tur chuan ka damlai hian min fak rawh u ka ti mai a. Chutiang deuh hlek chuanin a damlaiin kan Home Minister pawh hi fak ila thain ka hria a.

Tin, Police reng reng hi biak an nuam a ni, Aizawl-a ka lo luh tirhin Hualngohmun khuua kan hlawh zawng zawng ka nau lehkha zirna pawh ka chawm ang ka tih kha Independence Day 1972 khan min ruk sak vek mai a, ka ipte-a ka ah hi. Pu Remsiam, S.P. hnenah ka han report chu min hau hrep mai zawka i ipte-ah hetiang te engatinge i ah min ti a Police hnenah va report rawh a ti a, ka va report-a ka leiba tlem ka thing a, ka nei leh tawh a, chungah chuan police khan nitin ka va in report khan thingpui in-na min dil ziah a ni, neih tawh loh nak a laiin. Tunah erawh hi chuan police hi an polite in an tha hi ka ti em em mai a, police hmelte an danglam rawih mai leh YMA kan duty changa an rawn that dan te ngaihtuah hian lu berin a zir hi chuan thil hi a fel kuar mai a ni, tih hi ka ngaihtuah a, fak loh theih niin ka hre lova.

Tin, a dawt lehah chuan Demand No. 31-na Agriculture Department hi ka sawi duh a. Eng ang pawhin sawi thin mah ila ka rilrua lo awm chu, kan thingtlang lo neih hi a tlahniam em tih hi ka rilrua lo awm hmasa a ni a. Tunah hian NLUP kan tih atang hian

50.81% in a zahve aia tamin thingtlang lo neih ram hi a zim a ni, chuvangin hetah hian ka fak a, buh thar hi 9.56% in a pung thung si a, hei tluka thil ropui hi tunlai environmentalist te zingah chuan a awm thei dawn em ni, ka ti a.

Tin, a dawt lehah chuan Leilet WRC kan member zahawm tak Pu Lalruatkima rawn sawi chiah kha. Mizoram-ah hian Leilet tur a tam lutuk a ni, NLUP sum a kan han let tak tak mai chu, a hmaa kum tam tak British hunlai atanga phaizawl lo awm tawh Pathian min pekah khan District Council-a an leh zawng zawng kha 2010 hmalamah khan, tuna NLUP kum 5 lek kan han tih chhung hian Leilet hi 50.61% in a zau a ni. Chuvangin, kum 5 dang min pek leh chuan kan member zahawm tak sawi ang kha a thleng tep ang, chuvangin kum 5 dang min pe leh teh u mipui hian, in Leilet kha a changkang khawp ang.

P.C. hunlai a ka hriat thin chu Punjab lo nei mite hlawkna chu Leilet-a an Bawng chhawr ho kha khawla an thlak vang a ni an ti a, ropui kan ti em em mai a. Tuna kan Agriculture Minister hian khang Bawng leh Lawi kan biala thi te kha, kan bialah a pul nasa a, min han sem tak tak mai a, man lo ni em lovin Power Tiller lian hi 1300 tunhnai te hian kum 5 chhungin Agriculture atangin min sem sak a, Mini Tiller hi 460 min sem sak a, hetiang anih chuan Punjab hi kan awh rei ka ring miahlo, Punjab leh Haryana buh ei hi chu, pa hi an mu zawi nun mai e, an ti a. Chuvangin, helaia kan buh thar ngat mai Champhai Leilet buh ei thin hi chu ching te hi an rai zung zung mai a ni. Bible thu ang kha a ni a, chuvangin kan hriseinate pawh hi hetiang lama kan Leilet hi a lo pun tak tak chuanin, hriseinaah te, ching te chuan nau no an pawm thuai ang tih kha ka rindan a ni a. Chuvangin, kan Agriculture Minister hi a chanah chak hlein ka hria a.

Tin, NLUP hi sawi loh theih a ni lova, ka hrechiangin ka hria a Apex Meeting-ah zawng zawng khan Secretary ka nih laiin ka tel fai vek, vawikhat mah ka thulh lo. Chuta an report thin chu kan plan fund bakah planning commission ah chu chu kan zuk hmu a, cabinet sub-committee-ah a lut tawh a tih te kha an report reng a, a tawpah hian hei an rawn sanction ta e tiin crore 200 chuang zet zet hi alo thleng reng mai a. Chuvangin, plan fund pangngai anih loh zia hi official ka nih lai te khan ka sawi nasa em em a ni. Tuna plan fund pangngai ni a an sawi chhen mai hi dik ka ti thei lova, kan plan a rawn belh nasat zia mai chu SCA leh ACA ang a min rawn pek kha a ni a, Kohhran tinah Pathian ram hi a pung zawt zawt mai a ni, hei hi chu zep tur a nilo reng reng.

Ka bialah phei chuan Kohhran Upa pakhatin pulpit-ah ka sawi ringawt kan Pathian Ram pung lutuk hi kan en a, NLUP kan lak apianga pung a ni e, a ti a. Chuvangin, Missionary nuai khat tir tur chuan NLUP tirei ila a ni mai, chu chu kan awmdan tur atana ka duh a ni a.

Tin, hemi a bonus kan hmuh leh chu RKVY a ni a, Agriculture atang ringawt pawhin RKVY hi a behbawmah hian ka hriatsual loh chuan crore 400 chuang kan hmu a ni, crore 400 te chu ru ra tak a ni, NLUP-a kan la dahthat 400 vel kha tam an ti lutuk i veilama miten an sawichhuak reng mai a tun kan session chhung pawhin. Chuvangin NLUP-a Agriculture leh allied service a kan hman hnem avang ringawt khan RKVY kan hmu teuh mai a, ka bialah te pawh ka pu hian barbed wire (SPEAKER : I hun i hmangzo tawh a nia) sawiduh an awm tawh lo bawk a, a hnuhnung ber ka ni a, Pu Speaker, tlemte min han pekbelh la.

He rama kan pute thil tha tih hi sawi hi a chakawm em a, tlem kha min pekbelh la midang pawh hi i pekbelh deuh theuhvin ka hria a, a sawi hnuhnung ber pawlte kan lo ni bawk a. Hetiang zel a hma kan sawn chuan ropui em em loh hi chu hmabak kan neilo reng reng, chu chu ka hmuhdan a ni a.

Tin, Oil Palm-ah hian a tiak kan sem ringawt pawh hi Agriculture-ah hianin 3379000 a tiak kan sem tawh a, family 10843 te hian eizawna pui bera hmang turin tunah hian an inruahman a. Hetianga family chawm theihna a han siam ringawt mai te hi eng sorkar mah hian a la ti lova, kan sorkar leh loh phei chuan a awm pawh a awm leh tawh ka ring lova. Oil Palm hnah, a te-ah hian oxygen a chhuak tam tlangpui a, oxygen a thaw chhuak nasa em em a ni Oil Palm hian, a oil hi a tha em em a, a hrisel bakah. Hetianga eizawna tha, hrisel kan sorkar-in a uar vak mai te hi lawmawm ka ti a.

Tin, Demand No. 7-na Excise-ah khan nichina an sawi kha ka'n hrih duh chu, tuna an zu zawrh chinah hian thihna hman a la awmlo reng reng, hetiang hunrei loah zu tha in an thi ngailo. A thi te hi chu Rangvamual leh Phunchawng vela zu chhe in, pum lo puar tawh, thi a luak luak ho kha a ni mai tuna thi chu, thihna hman hi a la awmlo reng reng. Chuvangin Kross ah an khengbet a nih ngawt loh chuan zu tha in tan avanga thi pakhatmah an la awm lovang tih hi he khawvel hian hria se, tih hi ka ngaihda a ni a.

Hmana Police thi te kha an zu in tanna chhut ula, hei kan Police hotute an awm a chhinchhiah mahse kum 10 chuang a in tawh tih deuh hli an ni. Chuvangin, an zu chhe in kha an thihpui ta a. Hmana thi tawh kha a number an zia a, an thi ngei bawk si a. Chuvangin, Rangvamual leh Phunchawng a motora milianrawn hmuah a, Bike leh Motor zozai leh Hmeichhe ruak dawn dawn, Mipa tlan kung kung reh ta duak mai te khu chu sawiduh sela chuan pulpit atanga sawitham a ni a hei hi chu. Hetianga rui awmkhawm an reh ta duak mai te hi a nilo zawngin kan sawi mai mai a ni.

Chuvangin ka sawi tum miah loh, ka ziah tel miah loh Excise kha tun atang khan pencil in ka lo thaibelh a. A chhan chu zu check pawlah kan awm rei avangin.

Police leh Excise ka dem thu nilo se, felfai tak tak an awm laiin in rei fe fe hi an tam em mai, an la thi dawn chauhin ka hria. Khangte kha zu chhe in vang a ni tih kha ka'n sawi duh a. Tuna zu tha hi chu lo awm tawh se, an thau kung ang a, an chak ngawtin ka ring. Chu chu ka sawi tum loh, ka han ziah belh a ni a.

Speaker, helam hian min rawn melh nasa tawh si a, darkar khat hun min pe se ka lo ti vang vang na a, lo duhtawh mai ila Pu Speaker, ka lawm khawp mai a. Hei kan Demand hrang hrang kan Minister 2 rawn putluh te hi a ropui a, a tha em mai a, lawm takin i pass tlang teh ang u tih kha ka rawn sawi ve a ni e. Ka lawm e.

*Speech not corrected

SPEAKER : Ngawi rawh aw, sawi leh tur an laklawh loh nan hei dar 4 a ri mai dawn a, kan kal chho zel ang chu, zawh hram i tum ang u aw. Awle, Pu T.T. Zothansanga.

Pu T.T. ZOTHANSANGA : Pu Speaker, ka lawm e. Kan thianpa pakhat engnge i hlauh ber ka ti a, thusawi tur ka nih chuan Pu Sangkunga zawha sawi ka hlau ber a ti a. A thai belhah ringawt pawh ngaihnawm thamin kan ngaithla a ni. Pu Speaker, nimin khan kan Deputy Speaker khan mahni chan loh kha a sawi ve theih tho e a tih avang khan inthlahrung lo takin hei ka rawn ding ve a ni a.

Demand No. 31-na Agriculture-ah khan ka'n kal hmasa ang a. Hei kan department hmalakna hi a ropui ka ti a, Hectare 5668 zetin hma kan han sawn a. Hemi leilet an han siam belh avang hian ropui ka ti a. Tin, tlangram lo pawh Hectare singhnih zet an reduce thei mai hi hmasawna pawimawh tak niin ka hria. 2014-2015-ah ringawt pawh khan Power Tiller 410 an sem a ni a, Mini kha 28 an sem bawh a. Hei, kan hretheuh anga Champhai khi Mizorama Wet Rice Cultivation lian bera kan ngaih a ni a, Lo kan nei thin a, amaherawhchu, tunah Ranin tlatna hmun an nei tawh lova. Horticulture te a pawimawh si a, chuvangin, kan Ran-te kan tihlum zo tawh a, a then an lo pul bawh nen.

Keini bialah khian Tractor leh Power Tiller hi a pawimawh em em a ni tih kha ka'n sawiduh a. Hetia kan mamawh tak mai kan Minister zahawmtakin a pawimawh zia hria a min han pe thin hi kan lawm a. Chutihruala ka sawiduh chu, Mizoram Map-ah MLA bial zawng zawng pawh han en ila, ka bial kha a lian ber pawl a ni a. Tah khian Lo neihna tur pawn Area hmunpui tak kan nei a, kan beisei ang hi chu kan la ni chiah biklo a ni.

Hei Tuisa phai, Tui mai, Laili phai, Tiau phai, Zilhri phai, Tuipui phai, Phaithlang, Tuitho phai, Vawng-zawl, a kan ngah lutuk ringawt mai a ni phai khi. Chutah pawh chuan Champhai zawl kan chan pawh khi ka la sawi zo lo a. Khatiang khawpa

Mizorama Buh chinna hmun nei tha kha kan ni a. Amaherawhchu, kalkawng khi kan tum anga kan la neih thatloh avangin, khatiang kha tlawhpawh loh ram ang khan a la awm a. Tunah pawh khian Buh kan seng dawn tawh a, kan buh sengna hmunah hian motor a la kal theih loh avangin hmun tam takah khawchhak sakawr khi kan inngahna a ni. Chuvang chuan, kan Minister zahawm takin min hriatpui tura ka duh chu, zalen taka motor nena kan feh ve theih tawh nan khilai link road khi priority-ah min neih sak turin ka han beisei a ni.

Tin, tractor kha hiring centre ang khan an rawn ti bawk a. Hei hi kan mamawh khawp mai a, khilai tlang khaw tin deuhthaw khian kan mamawh a, mahse kan mamawhna hi kan la sawi ngam lo. A chhan chu, kan in/khua atanga kan mamawhna hmun tak a la kalpawh theihloh vang hlawm khian, he hiring centre ang a tractor kan mamawh pawh hi kan la sawi ngam chiah lo a ni. Kan dam ang a, kan ti a nih chuan, Champhai lam hi a sawichhuaktu awm chhun Pu Sangkunga nen hian kan ni a, min duhsak bik pawh ngaiin ka ring. Khilai loneih reng reng khi keimahni vekin kan la nei a, tute emaw kuta a chanve la mai thin kan ni lova. Keimahniin hah takin kan nei a, kan tharchhuaka kan ei thin a ni, zopa lo neih takin. Khalai kha min lo hriat sak se ka duh a.

Sawi ang khan, Land development kan mamawh khawp mai a, development tur kawr ruam 10 chuang kan nei a. Khingah khian kan thar anih chuan, nichina Pu Ruatkima leh Pu Sangkunga tena an sawi, ram tam tak la siam theih kan tih a kha kan ramah khian engemawzat percent kha a la awm a ni tih kha min lo hriatsak sela ka duh a.

Link road Km 600 chuang zet mai kan laihah hian, ka bial chhungah hnuhma a tlem khawp mai tih kha kan sawiduh a. Tin, chutih ruala kan sawiduh chu NLUP Link Road leh hemi Agriculture-in a kawng an han laih hrim hrim a hi in in hretawn lo em aw ka ti a. Nikum hmasa khan khi tah ka bialah kawng an rawn lai a, chu chu laih ngai vak loa kan ngaih kha laih turin an rawn ti a. Chu chu kan han zawt a, DAO khan a lo hre reng renglo mai a. Chuvangin, NLUP leh Agriculture pawh kha thawhhona tha deuh chu in neih a that ka ring.

Tin, tun hunah hian Fur pui avangin leimin leh kawngchhia kan ngah khawp mai a. Chu chu kan DAO pawhin application a dawn hnem ber a ni. Link Road nilo, pawisa khatiang anga rawn thehchhuah tur kha Agriculture atang hian a awm em tih kha min rawn reflect sak se ka duh a ni tih kha ka'n sawi duh a.

Tin, Home chungchangah khan sawi duh ka neih chu, hei tunah Aizawl-ah kan rawn awm ve ta a, Parliamentary Secretary angin. Sawlaih sawn kan term hmasa khan kan hotuten Minister Quarter tur Khatla tlangah sawn 3 an sa a. Kan Minister-te hi Aizawl lama awm deuh vek an lo nih avangin, tuman an luah loh avangin Pu Mahima leh Pu K.S. a te nen remchang takin kan luah ta a. Sawlai hmun saw a kawng a te khawp mai a, kan han luahtirh pawn kan han sawiho thin a. A kawng saw hei,

department ram a ni a, engtik hunah emaw chuan la len ho a, tihzauh la dil tur a ni kan han ti a. Chutihrualin Khatla Biak In chhak bik phei saw chu a poh nasa khawp mai a sawlai kawi saw. Feet 6, feet 10 dawn lai mai a han slice pawp mai a chakawm khawp mai a. Tunah sawilaiah Police Building sak a ni dawn a, chulai poh lai tak maiah pawh chuan Ban hi an rawn phun dawn ta mai a. Sawlai te saw kan Minister zahawmtak hian a siamthat theih hunlai, Ban pawh an la phun hma a ni a, min lo ensak a, a kawng zauh saw chu kan duh ber a ni a. kawng zauh em em kan theilo a nih pawhin a ban phun dan saw tihdanglam thain ka hria. Feet 30 zeta sang a ni a, nakin hnu-a thil hlauhawm thei tak tur niin ka hria a.

Kan sawi tel duh chu, sawlaiah sawn Mizorama College tha berte zinga mi Johnson College saw a awm bawk si a, kalkawngah sawn kan kal hleitheilo a ni. VIP hmun a ni kumkhua tawh dawnin ka ring a, sawtia Quarter 3 zet a awm takah chuan, saw saw kan department lam hotute pawh khan ram kha lo ren lovin, kan Minister-te nen lo sawiho a, tlema han tihzauh den den dan emaw, sawlaia an building sak thar tur emaw pawh saw, han sawn deuhhleik dan awm sela ka duh a, Pu Zawma bial a ni a ka'n sawisak a nih chu.

Tin, Pu Speaker, thingtlang lam District Headquarters ho hian POL hi kan hmu tha lo a nih ka ring a, min zui thei lo khawp mai a, harsatna hi an nei deuh reng mai a. Kan motor-te pawh hi headquarter lama kan hotute hian a tha tha hi an rawn thleng zel anga sawi te pawh hi a awm a, hei hi tak tak nge ka hre lova. Engpawhnise, thingtlang lam hi thuam ve erawh hi chu kan ngai a ni tih kha ka'n sawi tel duh a ni.

Tin, hei ramri bialah kan awm a, Manipur leh Burma lamten kan bial kan inri deuh thuak thuak hlawm mai a. Khilai khi ganja leh drugs leh silai tawlhna hmunpui te a lo ni a, chuang chuan Vaikhawtlang emaw Selam velah te khian outpost hi min dahsak thei se ka duh khawp mai a. Hmun ralmuang lote zinga chhiar ve ve an ni a. Zepnak emaw Burma Vanzau atang khian Aizawl atang tein an han kal a ganja te hi an han phur ru thin a, a khaten an lo man a, Aizawlah an rawn thleng phei a, Aizawlah court thlenpui a lo ngai a, hah tak takin Aizawlah evidence pe tur ringawtin an lo kal an lo kal a, a tawpah an kal peih lova case kha a tawp leh ringawt mai thin a. Khang te kha ka'n ngaihtuah a police awmna chi tak a ni ang tih ka ngaihtuah a. Kan Minister hian kha kha min lo chhinchhiahsak se ka duh bawk a. Vaikhawtlang emaw Selamah khian outpost hi kan mamawh hle a ni tih kha ka sawi duh a ni.

Tin, Champhaia kan police building tam zawk khi 1956 atanga 1958 inkara sak khi a tam mai a. Khi khi min thuam thatsak kan duh a, kan beisei a. A hmun a laili si a sorkar hmel pawh a tichhe ve reng reng, a wiring leh engemaw te chu buaithlak ve tak a ni. Khilai khi Champhai a lo kal hunah pawh a taka min tlawhsak theiha engemaw ti zawnga min thuamsak theih kha kan duh a, kan han beisei bawk a ni.

Tin, Champhai jail khi a hmun a te a, a tawt tawh avangin Zote leh Hmunhmeltha hmunah khian ram zau tak kan pe ve ve a. Tahchuan kan Minister zahawm tak pawh hian min ensak tawh a, engtikah nge building kan sak tan theih ang, tlumte thlir takin kan thlir a ni mai si a. Engtik hunah emaw chuan khilam ramte pawh khi a la pui ve ang tih hi kan ngaihtuah a. Chuvang chuan beisei taka kan thlira hi a taka a rawn chan hun tur hi a rawn sawi tel theih chuan kan lawm khawp ang tih kha ka sawi duh a. Chutihrualin eng department pawh department hrang hrang pawh kha development tur ang chi a nih kha chuan ka bialah Zote leh Hmunhmelthaah khian hmun kan la ngah a nia, a thlawna pek tur kan ngah a nia. Thenzawl leh Lengpui lam ringawt en lovin khilaiah khian thil tam tak kan ti ve thei a ni, hmun kan pe thei a ni tih kha ka sawi duh a ni.

Tin, Demand No. 7-na Excise chungchangah khan hmanni lawkah Constable 25 kan la a. Khatah khan min recommend rawh an rawn ti a, Bhavan list a awm em ni an rawn ti a. “Pu Ziran a copy a nei vek tawh thlan tur chu” te an rawn ti a, thlana hma hma khan. Hei hi chu tunhma atanga interview an lo neih tawhnaah Hnam Run khan list an lo neih thin vang kha a lo ni reng mai a. Mahse, kan vannei a, tun thlengin harsatna a awm lo, a reh deuh duk mai a. Kan pu hian a ti tha niin ka hria a. Sorkar hmasaah te phei kha chuan, tunhma kan sorkar ni lo, MNF sorkar lai te phei kha chuan police lakdan te khan sawi hi a’n hlawh em em khawp a, hei, chanchhinbuah te chuan advertisement lovin kan la a, dan dik takin kan la a ni te kha Minister-in a han ti a. A document te chu ka la nei a, in duh chuan ka pe thei che a nia.

Kan Opposition hotute hi an fel angreng a, tun kan Session-ah pawh hian “Opposition hi in chet nat tir mah mah a ni, nangni hi in ngawi vek ringawt mai a”, min ti a. Mahse, hun hmasa lama kan han tih ve deuh lah khan, “An tlem si a, in dim lo lutuk, chuvangin, dim hram hram rawh u”, an ti bawk si a. Assembly-a thusawi dan chin tawk pawh hi thiam har ka ti. Han beihlet vak dawnin an tlem si a, han ngawih reng dawna han tawrh chawrh chawrh kha a ni bik si lova. La e tang ngai lo ang maiin an sawi zung zung mai si a. Han beilet vak dawn ila anmahni chu an na dawn lo, khitah, House pawna mite kha a na tur kha an ni leh bawk si a. Helai hi chu a buaithlak ve a ni Pu Speaker. Han beih pawh hi ka inthlahrung deuh hlek a, chuvangin bei ni lovin an lo e tang ve tawh a ni tih hi chu sawi ve zeuh zeuh a ngai.

Demand No. 38-na, Excise kha ka la sawi zo lo deuh hlek a.... (SPEAKER : I la sawi zo lo maw? Lehlam.....) ka sawi zo tep a. Zu chungchang kha, kan tui tlang khawp mai a. Zu zawrh phalna hi Mizoramah hianin MNF-in an rawn tihchhuah a ni. anmahnin an rawn ti chhuak a, a han kal chho deuh ngar ngar a, an hun hnuhnung lamah pawh khan zawrh leh hi an duh tawh a....(interruption)....

Pu LALRUATKIMA : Pu Speaker, kha kha chu a diklovang a. MNF rawn chhuah hma thil kha a nih hmel tlat mai. Kan Dan kha han en ula, a Resolution puluttu, a Dan, a Act kha han enlet ila a ni chiah lo.

*Speech not corrected

Pu T.T. ZOTHANSANGA : A Act kha chu Prohibition a ni daih tawh a.

Pu LALRUATKIMA : Khalaiah khan a rawn zuartu, a pu chhuaktu an nih chu ka ring lo. Khalai kha chu kan House record-ah awm lo se a tha lo maw, khawngaih takin.

*Speech not corrected.

Pu K. SANGTHUAMA : Pu Speaker, ni e, thudik sawi a tha ang a. 1984-1985 chho, khamiah khan tunge sorkar tih kha chiang se, khata tanga lo kal kha a ni a. Chuvang chuanin, MNF-ina a zawrh thuah chuan MNF sorkar ni lovin Congress sorkar interim-ah khan zu zawrhna kha a kal chho ta a. Chuvang chuan, Congress ka nih lai a ni a, zu zawrh hun lai, permit kan pek kha. Chu chu a naupang deuh chuan an hre lo a ni maithei.

Pu T.T. ZOTHANSANGA : Pu Speaker, 1988 velah kha chuan “Kohhran hovin kan tawngtai thla tawp a”, tih te kha chu an neih ve kha mawle. Engpawhnisela, khalam kha ka sawi tum a ni lo a. An term tawp dawn lamah khan zawrh chu an duh a, mahse, “Zu hlir zu hlir in buaipui min ti palh ang e”, an ti ve tho a ni. Tunah hian ka ngaihtuahnaah chuan a permit hi Mizoram hian kan khel luai luai mai a, hetiang a permit hi kan khel luai luai takah chuan a permit hi tibo ta ila, duh leh online hian a duh duh hian la ta mai se a tha em aw tih hi ka ngaihtuahnaah hian a awm tawh a ni. A permit hi a kohhran lam atang pawhin kan ngaithei lo deuh niin a lang a, khalai kha ka rilruah a lo lut zawk a.

Tin, Demand No. 38-na Rural Development kha tawi tein ka sawi duh a. RD hi kan felfai tawh khawpin ka hria a. Tunhma te kha chuan BDO nih te kha a hlauhawmin ka hria a. Tuipang BDO te kha chu an zen nasa lutuk a, a bang tawp mai a, MCS officer kha, khatiang te kha kan ni a. Kan Minister pakhat pawh hianin Rural Development a chan dawn khan ka huphurhpui khawp mai a, a Minister hmasa kha lehkha a thiam nasa mai si a, kan pu hian a thlawp tha lo ang tih kha ka'n hlau khawp mai a. Mahse, tunah ani a rawn ni a, a fel duak mai a. A hun hmasaa mi bang tawp tawp ang kha an awm leh tawh lo a ni. Kan BDO te pawh an fihlim tawh khawpin ka hria a.

Tin, rangva sem te kha kan duh leh a, keini ang khua khilai Burma tlang hrut vel tan hi chuan rangva hi a hlu khawp mai a. Hei hi chu tih leh theih dan hram hram hi nei se kan duh a. Keiniah chuan serthlum te, sisu te phur khat kan va phur a, rangva pheh hnih a daih chuan rangva hawn mai thin kha kan ni. Chuvang chuan kan tan hian a hlu bik lutuk a. Nakinah rawn tih leh hram dan kha min ngaihtuhsak sela. Rangva inhnuaiia mumang neih te hi kan chak ve a nia. Chuvangin, kan Minister zahawm takin hetiang a rawn tih leh theih hun hi dingdihlipin kan thlir a ni tih kha ka han sawi a.

Kan Department lam kha chu sawi a rem si lova, engpawh ni se, Pu John-a hi a chak a ni tih erawh chu ka sawi duh a ni. A chak a ni. Vawiina kan Demand kan hotute pahnihin an rawn chhawpchuah hi lawm takin ka thlawp a ni. Ka lawm e.

SPEAKER : Pu Vanlalzawma.

Pu VANLALZAWMA : Pu Speaker, ka lawm e. Tuna kan ngaihthlak tawh ang deuh khan i veilama mite hi kan tlem deuh a, kan ti kan tia kan vai hian kan sawi kim leh vek thin a. A sawi lo bik han nih te pawh kan langsar duh riau a. Chuvangin, tawi tein ka'n sawi ve duh a. Kan ngaihthlak zawh chiah ang khan Champhai North bialtupa khan ka bial chungchang te min rawn sawi sak a, sawlai kawngpui zauh ngaih zia te, Kan Home Minister leh kan police officer-te awm laiin, a tul takzet a ni tih kha ka'n sawi duh a. Hei, kan Deputy Speaker zahawm tak ka bula thu pawh hian a rilruin min thlawpin ka hria, Bungkaw pa ve tho kha a ni a.

Kei pawh han sawisak ve deuh duh ka nei a, Serlui lampang kha. Thla hmasa khan, (Demand No. 16-ami, Home a ni tho) Vairengte kan tlawh a, tahchuan an sub-jail sak zawh deuh vek tawh kha min lo tlawhpui a. Khu khu a pawimawh khawp mai a, Vairengte chu kan hre vek a, a awmhmun pawimawh zia, case neuh neuh te pawh a tam a. Khuta case neite pawh Kolasib-ah an rawn phur chho vang vang a, jail-ah an dah a, tikhan an ti thin a lo ni a. Khu khu ngaihpawimawh a tha khawp mai a, ramri hrul tak tak a ni a. Tin, chhuak leh lut veivak an tam a ni, chi hrang hrang an tam bawk a. Khu sub-jail hluihlawn titih deuh mai khu kan Home Minister zahawm tak pawh hian ngaihtuahna thar hmangin tihchhoh leh a va tha em aw tih kha kan thu hmasa atan ka'n sawi duh a. A point te tein ka sawi ang a, rei tak sawina hun pawh a ni tawh lovin ka hria a.

Nichina kan member zahawm takin a sawi zawk, police battalion thenkhat zu zawrh tir tih kha kan ti tak tak a nih chuan a tih chi em aw ka ti a, hei hi kan ngaihtuah chian te pawh a thain ka hria a. A police battalion- te in a zu zawrh han tih kha thil inhmehlo tak mai a ni a. Corporation tam takte sum leh pai a harsaa kan zawrh tir pawhin thu dang ni ta sela, police zawrh tir lai tak kha ngaihtuah chian a ngai mang e ka'n ti ve.

Tin, kan hmeichhe awmchhun Pi Awmpuii khan ka sawi duh deuh pakhat a rawn sawi tawh naa ka rawn sawi ve leh hram duh Traffic police chungchang hi ka ngaihtuah ve thin a, an zaidam mange aw te ka thin a. Achhan chu, engemaw nikhuua mahniin motor han khalth ve a Tuikhuatlang vel atanga Chanmari han tlan thlen chuan hlauhawm tak hi ka hmu hman deuh ziah mai a pahnih khat chu. A then chu taxi te, a then two wheeler te an ni a, traffic police nileng a duty tan chuan hauh tur hi an tam duh awm mange ka ti a. Nem tak hian an ti reng thei mai a, amaherawhchu, an nem lutuk deuh em aw ! kan traffic police lam pawh hi ka ti thin.

Chuvang chuan, hei, nizan lam a mi, news-ah ka lo hmu a, Nagaland atangin Aizawl Traffic Management zir turin an lo thawk tih te kha ka lo hria a, a lawmawm khawp mai a. Traffic

an manage tha khawp mai a. Amaherawhchu, nichina Tuichang bialtuin a sawi zawk ang khan inrinni hian a buai ve thei khawp mai a, keipawh inrinnia chhuah ve ching ka ni a, traffic police tlem vang a ni e an ti a. Traffic hi a jam deuh ngei ngei a, holiday dangah hi chuan a ni vak lova. Hei hi kan Home Minister zahawm tak pawh hian ngaipawimawh leh zual ta se tih kha ka'n sawi leh duh a.

Khami kan sawirual khan transport kha a inkawp deuh reuh dan a awm a ni, motor leh traffic kha a inkawp avangin, chu chu han sawi kai nghal ta ila. A mak ka tih chu engati nge maw ni Mizoram (Aizawl) velah hian two wheeler khalh ho hi an hmanhmawh em em reng mai chu aw te hi ka ti a, hma a mi zawng zawng hi lehpelh an tum ta emaw tih mai tur hi a ni a. Hengte pawh hi kan zirtir tawklo a niang a tih te pawh rilruah a awm a. Zirtir nate pe tha ta ila, license an lak dawn a pek mai piahlah hian.

Mizo kan ni a, kan driver te an tlawmngai thei em em mai a. Tumkhat Truck Driver Association-in an programme a min sawm tumin ka ti a in tlawmngaih ziate ka hria a, amaherawhchu, famkimlo lai a awm, mi motor lo chhia se darkar khat dawn dawn pawh in siampui peih. Amaherawhchu, lo din zeuhva pakhat han pass mai tur te hi ding zawk nih kha in hreh a, chutihrualin, back hleka 10 ft lek pawh back a pakhat kal mai theihna tur te hi rei deuh inhnial nan te kan hmang a, kan tlawmngaih dan te pawh hi enchian a ngai a ni. Midang tanpui a, darkar khat pawh ding mai thei kha, second 2/1 pawh tlinglo lo din zeuha mi han tlan tir mai theih, han back hleka traffic tibuai lo mai tur te hi kan ti hleithei thin lova, hetiangte hi kan zir a ngai a ni ka ti ve thin a.

Chuvang chuan, a bik takin kan transport vehicle khalhtu ang te, hei sumo te a lo tam tawh a tin, taxi te pawh a tam a. Heng lirthei khahtu te leh two wheeler khalhtute thleng hian zirtirna tha deuh hi pek dan a awm em aw. A chhan chu, Mizo rilruah chuan khati zawng a thiam taka kan inzirtir chuan kan tlawmngai thei lutuk, darkar khat pawh thiante puin kan ding mai thei. Khami a nih lai si khan kan hmel lanna ber pawimawh a ni a. Tan lak keh zual dan a awm em? Tunhma deuh kha chuan, tunhnaiteah hian ka hre ta lova, Vanapa Hall-ah te hian taxi pute kohkhawm chiam chiam te kha a awmin ka hria a. Chu chu Home Department lam tih tur nge Transport Department lam tih tur ka hrethiam chiah lova. Kha kha ka'n sawi kai leh ni sela.

Tin, khami sawi mek lai khan, Transport chungchangah khan, hei Model Village kan tihah hian Baktawng ka thlang ve a, an harsatna ka hriatthiampui em em mai a awm a. Sumo-in an lo kal thin a, kan hre vek a Baktawng chu, belte an chung a, tukverh frame te an siam a, thutthleng te an siam a, heng zawng zawng Aizawl-arawn hralh tur hian transport vehicle dang hi a awm reng reng lo mai a, sumo te an hmang lo theilo a ni. Hengah te pawh hian hriatthiamna neih te hi a va tha em, a bik takin, anni chauh lo pawh Mizoram hmun hrang hrang atangin chawhmeh neih ang ang han hralh tur te pawh hi sumo-ah te kan load loh chuan load-na tur dang hi a lo awm reng reng lo mai a. A motor tan a hlauhawm lutuk a nih siloh chuan hengah te pawh hian, a dan chipchiar ka hre

lo nachungin Transport Department lam te pawh hian relax theih deuh a ni em, chu chuan Mizote economy a khawih pha tlat a ni, kan transport system hian. Sumo a an ken mai theih chuan chuan man leh phurh man em em awmlo ten tlawm deuh ten a lo kal thei a. Hengte pawh hi ngaihtuah a tha mange, kan Dan hman lai ka hre chiah lo nachungin.

Sumo hi transport vehicle a nilo tih chu kan hre reng a, passenger phur tur a nih rualin, passenger te bungrua leh ilo an ken theih kha chuan a lo awlsam em em bawk si a. Khangte kha vawiinah hian ngaihpawimawh a tha mange, kan ram tan, a tu a te tan pawh, kan kut hnathawktute tan hian a pawimawh si a tih kha Pu Speaker, ka sawi lang leh lawk duha.

Tin, Pollution Control pawh hi Transport nen hian a inzawm leh thei ta a ni. Hman deuh khan kan Committee-te pawhin kan sawipui thuk thuk tawh a. Pollution Control-in Motor zawng zawng check an tihna chhan te leh khulam atanga an rawn tih chiamna chhan hi kan hre vekin ka ring a. Boruak thianghlim a tihchhiat nasat lutuk avang te leh Delhi-ah te boruak a bawlhhlawh lutuk avang te a tih a ni a. Hengte pawh hi keini ramah te hi chuan awlsam te a tihdan a awm lawm ni?

Entirnan, Chaltlang kawngchho ah te sawn kar khatah vawi 2 lo ding se kan traffic te emaw, Zion Street ah te sawn lo ding se motor kha lo note nghauh nghauh mai se, nikhatah 10 note tur pawh a awm vak ka ringlo, a khu chhuak nasa lutuk ho hi. A nawlpuia check tih te hi mifel kan tibuai nasa dawn lutuk, motor tha neite kan tibuai nasa dawn lutuk. Check ngailo kha kan tibuai nasa dawn lutuk, a check ngai kha tlemte a nih laiin. Khati zawng khan hmalak ni ta se. Supreme Court-in a duh ber pawh boruak thianghlim kan neihna tur kha a ni mai a, tikhan a tih mai theih in ka ring a Mizoram hian. Chungte pawh chu Home Department lam leh Transport Department lam te pawh khan lo ngaihtuah ta sela thain ka ring a.

Chutihlai chuan, Home Department lamah hian a tha lam hlin an sawi nasa lutuk a, ngaihtuahna hmanna atan History te ka zir ve thin a, history a lo lang tur thil paw em em mai hi a awmin ka hria a vawiinah hian. Kan hre vek a India ram chu democracy, inthlang ram kan ni a, hel pawl an zalen lo kan tih mek laiin, hel pawl avanga VC kan inthlanglo reng mai te hi chu nakinah chuan a zahthlak ngawt ang, history subject ah an la rawn zir ang a, sum leh pai a harsa tih te chu thudang deuh a ni ang. Mahse, hel pawl avanga VC 30 dawn kan la inthlang lo reng mai te hi chu vawiinah hian sawichhuah ve hrim hrim te pawh hi a tul a. Tin, term hmasaah khan rei fe kan inthlang hleitheih tawhlo bawk a, khangah khan tu emaw kan va dem ngawt thei lova, hengte hi kan ram hmel tibaltu tur a ni.

Dik tak chuan ka sawi ang khan democracy-ah chuan inthlan a pawimawh lutuk. Mizoram buai lai pawn ka hriatsual loh chuan inthlan theih loh em hi kan nei lo em ni aw ka ti a. Assam te pawh tunhmain an buai vak thin, AASU Movement vanglai te pawn, vote zaa sawm pawh tling manglo tla tur te pawn an inthlang hram a, chutiang chuan an lo kal hram a. Chhattisgarh te

pawh kan hria Naxal avangin an buai em em tih kan hria mahse inthlan hi chu an tibuai ngai lo. He kan ram kan chhuan em emah hian kan history a lo lang tur te pawh hi vawiinah hian han sawichhuah hrim hrim te pawh a tulin ka hria a. A chhan chu hel pawlthe avangin VC kan in thlang thei lo, a paw khawp mai, hei hi kan Home Minister pawhin a hre thovin ka ring a, chu chu kan sawi lang leh hram duh a.

Tin, Excise chungchangah hian tawitein ka'n sawi leh duh chu, MLPC Bill kan pass lai bawr chho vel tak khan, kan hre vekin ka ring a, hun rei tak zu lo zuar tawh state pakhat Kerala chuan total prohibition kha a rawn vawrh chhuak ve leh zauh thung a, tunah hian engtiang chiahin nge an awm ka hre ta lova. Khami tuma an Minister pakhatin a sawi an tih hi vawiinah pawh hian ngaihtuahna hmanna atan ka duh a, heti hian zu kan zuar a, kan phur viau a, kan fak mawi thiam viau a, enga pawh ni rawh se, kha lai kha ka va sawi zui tum a ni lo.

Kerala-te chu kan hre vek a, India ram state a tourist ngah ber state te zing ami a ni, mahse, total prohibition kha an han rawt tlat mai a ni, ka hriatsual loh chuan Congress sawkar tho niin ka hria a. Khami chungchanga an Minister pakhat sawi ka hriat, chanchinbu atanga lo lang kha chu, kumtin crore 7000 chuang tax-ah an hmu a ni, zu atang khan. Mahse, a sawi kha enge ni? Hei ai hian zu related a kan pawisa sen hi, damlohna avanga, zu-related a kan damdawi sen hi a tam daih zawk, churang chuan total prohibition hi kan propose a ni a tih kha a ni. Vawiinah hian keini pawhin i hre tel ang u ka ti duh a ni, a chhan chu, tha em em ang a han sawi vakte pawh kha, a sawite pawh a nuam phian mai thei a, mahse, khati zawng te pawh khan mi in an lo ngaihtuah tawh a ni tih kha hria ila a thain ka ring a.

Sawitur tam tak a awm a, Department zawng zawng ka sawi ve lovanga, kan thianten an sawi tawh a. Hetianga hun tha deuh mai, Pu Speaker, min pek avangin ka lawm takzet a ni.

SPEAKER : Awle, sawitur kan awm tawh lo turah ka ngai a, a hnuah in rawn ding leh mai thin si a. In awm tawh lo niah ngai ila. Tunah hian kan sawihona kha han khaikhawmin a demand hrang hrang, a Department enkawlna tura pawisa ruahmante House pass rawn dil nghal turin kan Minister zahawm tak Pu R. Lalzirliana i sawm ang.

Pu R. LALZIRLIANA, MINISTER : Pu Speaker, hei hun tha tak, vawiinah sawihona tuang tak kan nei a, kan Department hi MLA zahawm tak tak, member 17-in, min sawipui a. Chungah chuan ka Department tana thahnem an ngaih zia leh sum leh paite a tam tawh lo a ni an tihte kan ngaihlathlangpui a, a lawmawm khawpin ka hria a. Kan Opposition hotute pawh hi an puitling khawpin ka hria a, kan sawrkar leh Department te chungah thahnem an ngai a, lawmthu kan hrilh duh a. Chutiang anih lai chuan, an thu rawn sawi kha, Pu Speaker, eng eng emaw chhinchhiah ngaite a awm a, chungte chu kei ai hian ka Department hotute, helaiah hian ngaihlathu an awm vek a, MLA zahawm tak tak ten in thusawi kha an lo chhinchhiah vek a,

chutiang chuan nakinah keima react aiin a taka an rawn react kha a pawimawh zawkin ka ring a. Chuvangin, in thusawi kha a mal te te in han react dawn ila, a sei lutuk dawn a, kan react vak lo a nih pawhin min lo hrethiam turin ka ngen che u a.

A hmasa berin Rural Development Department-ah hian han bung ta nghal ila. He laiah hlawh bat te, hlawh pek theih loh tihte, thla 9/10 tihte kha kan sawi a, kha kha thudik a ni a. Amaherawhchu, tunah hian hlawh pek theih loh kan nei tawh lova. Hmanniah state level committee kan thu khawm a, khatah khanin kan pawisa neih ang ang hi, hnathawktute chu hlawh hmu tlak an ni, hlawh hmu tur an ni, kan tih avangin kan pe vek tawh a. Tin, MGNREGA-a Finance Department in min release tur engemaw zat, nuai 400 vel, nei awm a kan han sawi te pawh kha, tunah chuan kan Finance Department hian, kan sawi tawh angin, min ngai pawimawh em em a. Mipui chan, fur lai a ni a, inhlawhna dang a awm lova, heng inhlawhna tur hian kan theihtawkin kan bei ve dawn a ni an tih avangin min released vek tawh a, engmah ba a awm tawh lo a ni tih kha kan sawi duh a.

Tin, Rural Development Department hi keimahni state atang chuan tam tak budget-ah awm lo mah sela, central lam atanga sum tam tak kan hmuh thin avang leh eng eng emaw, central lamin min rawn tumsak thin, central project hi kan ngah em em a ni tih erawh kha chu kan sawi duh a.

IWMP tihah te pawh hian, kan budget-ah hian nuai 3835 dah a ni a, amaherawhchu, kan annual action plan-ah erawh chuan nuai 8740 lai dah a ni a. Hemi hi kan budget-a kan dah ang a lo lan lohna chhan hi chu SMS tur hi min dah tel sak rih lo niin a lang a. Chutiang chuanin, IWMP-te hi Centrally Sponsored Scheme a ni a, hmana IRDP kan ti emaw ni, khatiang ang kha, hming hnan hnan hian an rawn thlak thin a, chutiang chu a ni a. Hengah hianin back log engemaw zat chu kan nei a, SMS-ah hian. Amaherawhchu, kan Finance Department ten an hre vek a, Planning pawhin a hria a, chuvangin, vawiinah hian sawi chhuah kher a tulin ka hre lova.

Tichuan, 2015-2016 a MGNREGS atana pawisa kan earmarked hi chu nuai 22,462 a ni a, a tam tham khawp mai a. Amaherawhchu, nikum lam ai khan tunah chuan central sawrkar pawh an inbun nghet ta deuh bawk a, nuai 13,903 min rawn released tawh a ni, a lawmawm kan ti khawp mai a. Heng atang hian insiamrem chhoh ve te pawh kan han tum dawn a ni a. Tichuanin, central-in min rawn release tawh piah lamah leh a vaia kan la mamawh tur hi chu, SMS-ah hian nuai 317.394 a ni tih kha kan sawi tho ang a. Tin, IAY hi central share atangin nuai 908, nikum atan khan hman a ni a, earmarked a ni a, chutah chuan nuai 453.838 min rawn release tawh a, helaiah hian State-ina kan lo tum ve tur nuai 50 vel hi chu la awm a awm a ni. Tichuanin hei eng eng emaw hi R.D. atang hianin kan thawk nasa ve khawp mai a, E.Lungdar Mini Sport Complex atan kuminah hian Central lam atangin min retain sak chu nuai 435 dawn min retain sak a, chuta, nuai 173 lai chu tunah hian Pu Speaker, min rawn released sak tawh a. Hun reiloteah kan thawk thei maiin ka ring a.

Tin, Vairengte Market te pawh hi kan sawi thin a, nuai 387/388 dawnlai hi estimate a nih lain nuai 139 hi minrawn released sak tawh a, PWD ah kan hlan a, Tender te pawh an ko tawhin ka hria a, tunah hian thawk tan tura beisei a ni a.

Tichuanin DRDA lamah te kan mamawh em em thingtlanga kan zen deuh berte an ni a. Heng atang pawh hian hna tam tak kan hotuten an thawk a. Tin, SIRD te pawh hi tunah hian Durtlangah kan Revenue Minister bialah khian In ropui tak mai a complex-in kan sa a, hei hi kan zo a, kan luah thei dawn dawnin kan hria a. Eng eng emaw han chul hnum tur a awm a, Central pawhina kan sum min batsak reng pawh kha hmanni lawkah khan crore 10 dawn lai kha minrawn released sak tawh a. Contractor hnenah pawh hian sum engemaw zat chu an pe thei tawhin ka ring a ni. Tichuan, SIRD ah hian Central lam atanga sum hmu deuh vek kan ni a. Tunah hian nuai 25 emaw chu kan budget-ah hian dah a ni ve a ni tih kha ka'n sawi duh mai a.

Tichuan Administration for Rural Development Programme (ARDP) kan tihah hian kum 2015-16 tan nuai 110 budget-ah hian min dahsak a, tiang chuanin hei direction and administration-ah hianin 2015-16 atan nuai 70.646 dah a ni a. Eng eng emaw hming hran hran hi a tam a, block level administration-ah hian kumin atan nuai 2,25,59,000 dah a ni a. Hei tunah pawh YMA khawmpui turah te khanin eng eng emaw anrawn sawi a, khung laia an Hall repair nan te khan helaiah hian a tel a, nuai 7 emaw chu dah tel a ni tih kha ka'n sawi tel duh a.

Tin, Backward Region Grant Fund (BRGF) kan tih hi kum kalta khan nuai 2439.99 hmuh a ni a, chu chu Lawngtlai leh Saiha District atan a ni a. Kumin chhoah hian nuai 2812 kan han dah a, amaherawhchu Central-in a tihtawp de-linked scheme-ah khan a tel avangin hei hi kan hmu thei dawn ta lova, a pawikan ti khawp mai a. BADP ah te hian International border R.D. Block 16 ah hei hi hman thin a ni a. Nikumah khanin nuai 3515.55 dah a ni a, hmuh a ni a. Chu chu tunah hian kan hmang dawn mek a ni.

Tichuan Aloevera hi tunah hianin Baktawngah te an ching a, tin, tunah hianin Chhanchhuahna khawpui Darlawn R.D. Block hnuaia miah hianin tihchhoh ve tawh a ni a, hemi tihna tur hian nuai 446.6 hi estimate a ni a. Tunah hianin 40% vel zawh a ni tawh a, tichuan hei hi keimahni budget-ah hianin ₹ 17,78,000 lai hmundang ami thawhna turin dah a ni nghe nghe a ni.

Pu Speaker, ka hritlan deuh avangin rei tak ka sawi lo ang a, kan senior Pu Sangthuama'n nichinah khan 'A tawi lam deuhin sawi teh a' a ti a. Amah hi a ril a tam deuha a lo va chhuak ta nge ka hre lova. Tiang chuan R.D. ah chuan tawkan mai sela.

Agriculture Department lamah hianin tawitein ka'n sawi leh anga. Kum 2014-15 ah khan nichinah khan kan ngaitthla tam tawh khawp a. Heng hi chu sawi nawn pawh ngai lo tur

hialah kan ngai a. W.R.C. ah hian hectare 15,620 kan thawk a, tin, tun hunah hi chuan hectare 16,866 lai kan lo achieve ta a, kan lo thawk thei ta a, hei hi hectare 1246 laiin hma kan sawn a ni. Kan WRC tihna hi kan zauh thei a ni tih kha kan ngaihthlak tawh kha.

Tichuan tlangram lo neihah hian nikum hmasa lamah khanin hectare 2569, nikum hmasa lamah khan hectare 20,064 kan nei a, chumi chu kan NLUP te leh thil dang avangin huan lo ram nghet nei an tam tawh avangin hectare 2569 laiin tunah chuan tlangram lo neih kan bansan tawh a, kan nei tlem tawh a. Amaherawhchu, chutiang a nih lai chuan kan thar hi tlangram lo neihah pawh a tam zawk ta tlat mai a, a hma ai khan a lawmawm kan ti khawp mai a. A chhan chu kan Agriculture Scientist te an thiamna te kuthnathawktute hnenah hrilhin campaign an nei ngun a, damdawi leh thil dang dang leitha te hmangin buh thar hlawk zawk si, nei zim zawk siin tunah hian kan thar chhuak ta a ni tih kha ka'n sawi duh a, a lawmawm kan ti khawp mai a.

Tin, kan buh thar chhuah 2014-15 ah khanin avaiin metric ton 60,679 a ni a, khami kum hma zawk 2013-2014 ah khanin kan Buh thar chu Matric tone 58994 a ni a, matric tone 1685 in hma kan sawn a, heng hi NLUP te kan han tih a, kuthnathawktute leh sorkar a tan avanga lo pung ta niin kan hria a kan lawm khawp mai a. Nichina kan ngaihthlak tawh ang khan Oil Palm te hi kan sorkar hmaa sorkar hmasa zawk MNF sorkarna hnuai atanga bul tan tawh kha a ni a, heng hi chhunzawm tlak a ni kan ti a kan chhunzawm ta zel a. Tunah hian Oil Palm china hmun hi hectare 2377 kan nei tawh a, tichuan, September 2015 thlenga kan thar chhuah chu matric ton 6981 zet kan thar chhuak ta a. Hei Kg-ah ₹ 5.50 in lei sak an ni a, a pawisa a chhut chuan 347 lakhs chuang zet an lo lei thei ta a ni. Hei hi kan Chief Minister zahawm takin India ram Northeast a a hmasa ber atan Oil Pam Mill hi Kolasib-ah min hawnsak tawh bawk a ni.

Tin, RKVY lamah hianin hma kan sawn nasa khawp a, hma kan sawn nasatna erawh hi chu kumdangah pawh khan State dangin an hmu tho va, kan lo hmuh tam ve theih lohna chhan chu pawisa kan ngah lova, kan NLUP pawisa te helama dah hian RKVY ah hian nasa takin kan Budget a lo pung a, kan thenawm state zawng zawng Assam tih lohah chuan keini hi a hmu tha lawr lak kan ni a. Nichina kan ngaihthlak tawh ang khan crore 435.825 lai mai kan lo dawng chho ta a ni, a vaia kan han hmuh pheih hi chu, a lawmawm kan ti khawp mai. Agriculture a kan hotute thahnemngaihna vang a ni a. RKVY atang hian Agriculture Link Road kilometer 30 lai mai kan lo lai zo tawh nghe nghe a ni.

Tin, RKVY atang bawk hian Buh china tur WRC hectare 374.55 lai mai laih zawh sakin a lo awm tawh a ni. Kan lei laih zauvah a sawitute khan an sawi tawh nangin Custom Hiring Centre hi hmun 40-ah kan dah tawh a, chungah chuan a Tractor te Power Tiller te leh Leilehna hmanrua te a thlawnin kan pe vek a. Hei hi kan Leilet neituten an tangkaipui hle mai a, a lawm pawh an lawm a, anmahniin an manage a a hlawkna neiin a

POL te kha an lo lei chho ve ta a. Hetiang ang hi chhonzawm chhoh zel kan tuma, khawl hmang lo chuan kuthnathawktute manual labour ringawt hi chuan, tun hma pheii chuan Leilet neih chu thih hmana te an ti a, tunah erawh chuan chutiang chu ni ta lovin, khawl tha zawk central scheme atangin pek zel kan tum a.

Kuminah pawh kan ngaihthlak ang khan power tiller ringawt pawh hi kumin maiah kan sem kha tunah pawh an la la zo kher lo ang a 430, mini power tiller 72, power wider cutter kan tih mai 500, fu chhuanna thleng 320, motivator Tractor a vuah chi 22, Tui Pump khawl 739 leh Sprayer mi 1800 te hnenah hetiang zawng zawng hi subsidy-in kan sem thei a ni.

Tichuan Central Scheme RKVY leh MFSM atang hianin SIR an ti a, buh chin dan hlawk zawk leh tha zawk chutiang ang chuan tunah hian tih kan tum a, tlang ram buh chingtute pawh a awm thei ang anga tanpui tumin kan Department chuan hma a la mek a ni. RKVY leh SMAM kan tih atang hian nasa zawkin hnathawh tum a ni a, kumina kan sem ang bawh khanin Custom Hiring Center thar te engemaw zat kan din leh ang a, tichuan power tiller te, water pump set te, Tractor set, Tractor hi kuminah khan mimal hnenah kan pe thei lova, hei hi Leilet nei zau an thar let sawm (10) thar thei tur ten power tiller ringawt hi chuan kan kham khawp tawk lo a ni an ti a, Tractor te pawh hi mimal hnena subsidy a pek theih dan tur kan ngaihtuah a ni a.

Tin, Buh te pawh hi a phunna khawl te pawh hi a lo awm zel a, a sengna khawl te a lo awm zel a chungte chu tunah hian engemaw zat kan nei tawh a, tun kum kal mekah hianin Lonei-tute hnenah pek chhuah tam leh zual kan tum nghe nghe a ni.

Tichuan Leilet neitute tanpuina pawisa bakah Buh chi te a venhimna tur chungte chu kuminah hian ruahman mek a ni a. Tin, Chana te, Be lam te thar chhuah tam theihna turin NFSM scheme atang hian kan buatsaih mek a. Tichuan NFSM on oil seed and oil palm hnuaiah hian kuminah hian hectre 4970 lai Oil Palm chin nan siam leh kan tum bawh a ni. RKVY kan tih hi Mizoram tan kuminah hian vbc 38.78 ruahman a ni a, hetiang hian vbc 19 & 39 lakhs hi Central Sorkarin min rawn released tawh bawh a. Tin, National Mission Oil Seed and Oil Palm-ah hian Oil Palm chin leh enkawl zuina turin nuai 2550 ruahman a ni a. Hei hi Government of India-in nuai 454 zet chu First Installment atan min rawn pechhuak tawh bawh a ni.

National Mission for Sustainable Agriculture NMSA kan tihah hian 'rain fed area' development-na atan nuai 600 ruahman a ni a. Tunah hian nuai 150 chu first installment-ah kan hmu tawh bawh a ni.

Tichuan National Food Security Mission hnuai hian Mizoram tan nuai 365.50 ruahmanah nuai 153 leh sing 2 sang 5 chu central sorkarin minrawn released tawh bawk a ni.

National Mission for Agriculture extension and Technology tih hnuai hian scheme 2 kan nei a. Sub-Mission on Agriculture Mechanization (SMAM) kan tih leh Sub-Mission on Agriculture Extension (SAME) kan tih hi tunah hian kalpui mek a ni a. SMAM-ah hi chuan central share cheng nuai 203, a vaiin minrawn released tawh nghe nghe a. Tin, SAME-ah hian nuai 386.96 zet hi ruahman a ni bawk a ni. Chu chu Agriculture lamah hian lo tawh leh mai ta sela.

Home Department-ah hian sawi tur a tam khawp mai a, amaherawhchu, chipchiarin kan kal lo ang a. A sawitu zawng zawng khan kan Home Department-te duhsakna lam hawi khan inrawn sawi vek avangin a lawmawm kan ti a. “Pawisa a tlem a ni e, security chungchang atan te a tlem a ni e”, in ti a. Heng hi a dik chiah a. Amaherawhchu, heng SS fund atangte hi chuan kan duh ang hi sorkarah kan thlen a, heng hi min pelo ngai chuang lova. Chuvang chuan tunah hian a token ang leka dah niah kan ngai a ni.

Kan police-te hi a battalion chuan kan awm duah tawh a, amaherawhchu, vacant post hi kan ngah khawp mai a. MRP kan tih atanga Inspector thleng hian post create sa vek tuna fill up loh hi 566 kan nei a, tin, Armed Branch lamah hian 1401 kan nei bawk a ni. Chutiang ang chuan battalion khat aia tam hi vacant post kan nei tawh a, lak belh kan han dil thin a, engemaw hlekah tunah hian thuneitu anga inngai hi kan tam tawh khawp a. Chutiang angte leh eng eng emaw harsatna leh buaina ‘Law & Order’ chungchangah hian police an awm loh chuan kan che thei der lo a ni lehnghal a, hengte hi chu han lak ve hi kan chak khawp mai a. Amaherawhchu, sum harsatna avangin kan la la thei lo deuh rih a ni.

Tun kum kal chho mekah hian Law & Order chungchangah hian harsatna lutuk kan nei vakin kan hre lova, kan lawm khawp a. Inthahnate hi chu khawvel a nih chhung hi chuan Kristian ramah si te kan han ti a, a awm chho zel dawn tho a ni, tih hi kan hriat a pawimawh a. Chung angah te chuan inthahna te, pawngsual avanga intihlumna awm thin te hi kan hria a. Chung ang chu a titu hi tunah hian hriat loh awm lovin kan man chho deuh zel a. Kan police-te viak thatna avangin leh police leh khawtlang inkarah tanhona tha tak a awm avangin pawikhawihute hi kan man deuh zel a. Kidnap-te kan han ti a, chungte pawh chu hman deuhah pawh khan a awm a. Chungte chu himdam takin reiloteah kan police-te operation neih avanginrawn chhuah leh an ni a, kan lawm khawp mai a.

Nichinah khan Opposition Group Leader khan “Democracy rama inthlan theih loh hi a pawia ni”, a ti a. Keini pawn pawia kan ti khawp mai a, thudik deuh mai a rawn sawi a. HPCD-tena an rikrapna avang leh an vaunain khilai an area-ah hian V/C 31 lai inthlan theih lohna kan nei a. A thlangtute khan inthlan theih loh a ni tih kha sorkar atanga puanna a awm chuang lova, thlang turin an inbuatsaih vek a. Amaherawhchu, thlang duh/vote thlak duh pakhatmah an awm loh leh

candidate-ah pawh awm duh an awm si loh avang khan thil harsa ve deuh mai chu a ni tih kha min hriatpui turin ka sawi duh a.

Tin, Committee of Government Assurance member 3 te, kan MLA te an zinna Kani bul/Zokhawthiang bula ambush an ni kha pawl kan ti khawp mai a, vanduaithlak kan ti a. Kan ram hi 'Hel' awm thinna ram a ni a. Chungte pawh chu lo kir tawhin tunah nundan pangngaiin kan nung tawh a. Zalen, remna leh muanna ram kan tih laia khatiang ang ambush kan tawh kha kan MLA-te hial an lo kap duh kha pawl kan ti khawp mai a. Chumi avang chuan police-te hian operation an nei ngar ngar a. Kan thuneihna piah lam deuh vekah hian operation neih ngai a ni a.

Chuvangin kan state thenawmten hetiang tihrem kawngah hian min co-operate bawh si lova, a humtu zawkte an lo nih thin avangin pawl kan ti a. Chutiang ang ni chung chuan helaia ambush-naa a Ring Leader ber te zinga mi police atanga tlanbo, silai pahnih lai ru chhuaka tlanbo H.C. Malsawmkima hi kah hlum ve a ni tawh a. Tin, midang hmanni lawkah khan kan man a, Army Chief te leh an Finance Secretary te leh an body guard te kan man a kan police ten, kan ram piah lamah an man a Silchar lamah te. Tin, Hmarkhawlian-ah te hian hmanni lawk ah khan helaia min kaptute zinga mite kha an lut a ni tih kan hotuten an dawng a. Kan State piah lam daih a ni a, amaherawhchu kan police te helaiah hian kal vang vangin an zu hual a. Chungah chuan Self-style Sergeant Lalchualova te, hei hi Lungthulian khua, Manipur a ni a. Self-style private Reuben Lalromawia te leh H. Lallawmkhupa te hi zu man an ni a. Helaia Reuben-a an tih hi Zokhawthiang lambunna a tel bawh kha ama inpuannaah hriat chhuah zui zel a ni a. Tin, Self-style Sergeant Lalchualova pawh hi Khawlian BOP kahna a tel a ni tih amah pawh a inpuang nghe nghe tawh a ni.

Kan police te hi, nichinah kan han sawi a. Kan ram hi golden triangle kawng nen a inhnaih em em avangin ruihhlo leh silai (gun running) te a tam khawp mai a. Hengah hian kan police-te hian kum kal ta chung khan, (tun kan hman chung zawng hian) silai 70 an man a, a mu 1,8128 an man tel bawh a.

Tin, kan hotute khan CCTV, CCTNS tih ang chi te kha an rawn sawi chhuak a, hengah hian he CCTNS hi project kal lai mek a ni a. National Crime Record Bureau phei chuan an tehnaah hian India rama hma la tha ber niin min puang nghe nghe a, a lawmawm kan ti khawp mai a. Tichuan Aizawl City Surveillance Project kan tih hi project 2/3, a phase 2/3 a then a ni a. 2013 – 2015 ah khan sum nuai 397.5 kan hmu a, hei hi tunah hi chuan a phase-I chu hmanni lawk khan ni 25.5.2015 khan a control room te hawn a ni a, a tha khawp mai a. Tunah chuan thlakna hmun kha tun aia a project phase II/III te kan han zawh hunah phei chuan Aizawl khawpui tan hian Law & Order thilah te, Traffic thilah te a pawimawh dawn hle a ni tih kha han en ve pawh khan a hriat theih mai a.

Tin, IR Battalion hi Assam-ah 2012 a an kal kha an la awm reng a. IR Battalion hi India sorkarin an duh duha an rawn hawh theih tura din a nih avangin a buaithlak khawp a. Helaia mi pawh hi thenkhat ten la chhuak tawh ula an han tih pawh hian khulai khu hel area ni a ngaih si tuna kan deploy chhung hian harsatna hel lamah an la tawh lova. Chuvangin hmun dangah te hian an tirh leh zawk kan hlau va helaia awm reng hi ala tha zawk e a kan ti rih a, khulaiah khuan kan dah rih a ni.

Tin, kan police zingah hian post ruak a tam lai tak hian promotion hmu an tam khawp mai a, tun kum chhung maiah pawh hian 851 laiin promotion an hmu a, kan lawmpui khawp mai a. MPS Junior Grade hi mi 10 lak thar a ni bawk a. Tin, hmanni deuh khan Delhi police turhmeichhia 10 leh mipa 10 kan la a. Tunah hian training te an nei mek turah ka'n ngai a ni.

Tichuan kan Police Officer te hi nikum khan President Police Medal for Distinguish Service mi pahnih hnenah pek a ni a. Police Medal for Meritorious Service hi Police Officer 6 hnenah pek an ni a, Governors' Gold Medal hi Police Officer 2 hnenah hlan a ni bawk a, kan lawmpui khawp a.

Tichuan Protection of Children from Sexual Offence Act, 2012 kan hman hnu hian naupang chungah hleihlenna hi a awm nual a, 198 lai case nei an awm a. Chuta 192 chu man an ni tawh a, under trial in an awm mek a. Pali hi convict an ni tawh a, tin, pahnih erawh chu evidence a tha tawh lova ni an tih avangin Magistrate ten an lo chhuah zalen rih a ni.

Kan budget kha kan hotute khan in dukkhawp loh zia min han sawipui a, sawi ve kher hi a ngai em aw ka ti a, amaherawhchu, tlem te ka'n sawi ang a. Hei kum 10 chhungin Police Department Budget hi a pun belh loh hrim hrim a, midang pawh a ni maithei a. Tunah hian kan Salary Head-ah erawh chuan a pun belh a ngai thung a, a loh theih lova, a thawktute hlauh te a lo pung a khatiang ang a nih zel avang khan a pun belh a. Law & Order problem hi kan ngah telh telh a, amaherawhchu kan Budget hi a tlem telh telh niin kan hria a. Awmdan pawh hi thiam a har duh khawp mai a, kan police te an pawimawh si a.

Tiang chuan travelling expenses-ah hian 2010-11 ah khan nuai 634 kan hmuh laiin, kuminah hian nuai 254 chauh an ni leh ta nghal a. A buaithlak khawp mai a, heng hi engtinngan kan in manage ang, kan hotute kan la dil belh zel turah kan ngai a. Motor Vehicle (MV) lamah hian 2010-11 ah khan nuai 250 kan hmuh laiin kum 4 hnuah nuai 350 zat chu kan han hmu ve chu a ni a. POL-ah te khan engtin nge an tih dawn, motor teah engtin nge an tih dawn tih te kan hotuten in rawn sawi kha thudik tak a ni a.

Tunah hian kan motor siamna bill hi nuai 124 leh singruk kan ba a. Workshop-ah pawh hian kan Police motor chhia te hi luhna an hriat loh chang a awm tan tawh nghe nghe a ni, kan bat rei thin em avangin. Heng kan pachhiatzia hi helaiah hian kan sawilang ve mai mai duh a ni. MPF hnuai sum kan hmuh thin te, Finance Commission, NLCPR hnuai kan hmuh thin te leh khang dang te kha tunah hi chuan hmuh a har ta angreng khawp mai a. Chutiang anga kan awm hram hram lai chuan 3rd IR Battalion, Thingkah-ah tunah hian bul kan han tan tan a. A kawngte kan lai tan a, furpui a lo thlen avangin an chhonzawm thei lo a. An chhonzawm leh thuai turah kan ngai a.

Finance Commission atang hian kuminah khan 63 lai kan sa tha ve a. Champhai lamah te kan Police te awmna in chhiat ziate an sawi a, a dik a, hmannah keipawh ka kal a. Outpost te pawh hi dik tak chuan kan zin pawh hian kan Police te hi ka ngaihtuah lo a ni lo va. Mahse an awmna chhe lutuk te han hmuh hian tih theih kan nei chuang si lo va. Ka kal hreh a, ka kal ngam lo ringawt mai thin a ni. Hei HPC'D' hel area te an in a chhe lutuk a, chungte pawh chu kan hotute hnenah hian crore tam pawh a ni lo ang a, hengah hi chuan min han tihsak hram teh u a kan tih lain, vawiin thleng chuan min tihsak thei chuang lo a. Khing laia Law & Order kengkawhtute, kan Police te pawh hi ka zah hle thin a ni kei hi chuan.

Tiang chuan MPF hnuai in 13 kan sa bawk a. 2015-16 ah hian Civil Works atan MPF scheme-ah sum dah a ni lo va. Finance Commission-ah Police Housing-ah hian sum kan hmuh thinna pawh kha tihtawp a ni tawh bawk a. Kan budget-ah hian building sakna tur ruahman a awm bawk lo va, engtin nge ni kan kal zel ang tih hi ngaihtuah tham a awm a. Kan department, Home Department hi an tam em em si a. Kan SP hmunah te, Battalion hmunah te, a huhoa an awm loh chuan Law & Order, engemaw emergency lo awm thutah mahni ina an awm a, in luah a an awm vek chuan inkohkhawm te a har a. A tuartu chu mipui kan ni leh mai thin si a ni tih kha kan hotute hian an hriain ka hria a.

Tin, Home Department atang hian minority te tanpuina turin Infrastructure Development-in Minority Institute an ti a. Chumi hnuai chuan Private School te, (kan khawih awm loh tak hi a nodal department-ah kan tang a) tunah hian Private School 57 lai sak thatna tur pawisa nuai 1442 lai kan nei a. Chuta nuai 1011 chu Central sorkar HRD hian minrawn release tawh a. Tichuan 26 sak zawh tawh a ni a, school 31 lai tunah hian sak mek kan nei bawk a ni.

Forensic Science Laboratory hi kan Manifesto 2008 atanga kan lo sawi tawh ang khan tunah hi chuan Police Department atangin lakhran niin Directorate puitlingah kan lo hlangkai ve ta a. Hei hi thil chhinchhiah tlak tak, misual hnuchhuina atan niin kan hria a. Chutiang a nih lai chuan department te tak te si hi Digital India Week, 2015 denchhen a sorkar department hrang hrang 114 website tehnaah khan pahnhna kan han hauh phanghal mai hi a thawktute kan fak khawp mai a. He Forensic Science Laboratory atang hian DNA khawl hian case kaihnhawih thil hi a enfiah thin a. Chutichuan pawikhawhtute hi a finfiah zung zung theih ta a dik takin, a lawmawm

kan ti a. Kumin chhung mai pawh hian DNA Laboratory hi a official taka hawn kan tum nghe nghe a ni. Tichuan, kan hotu Finance lam ten min lo hriatpui tur chu DNA Laboratory senso hi a sang khawp mai a. Kum khatah nuai 20 lai a ngaih dawn avangin kan Finance Minister zahawm takte hian min lo hriatpui atan ka'n sawi duh a. Forensic Science Laboratory a din tan tirh atanga vawiin thleng hian kutzia 5500 chuang computerized tawh a ni a. Chungah chuan pawh khawihna reng reng hi Forensic Science thiamna tel lo chuan tunah hi chuan kan khawih ta meuh lo a ni tih kha ka sawi tel duh a.

Fire & Emergency Service Department-ah hian hman deuh khan kan han kal zung zung a. Tunah hi chuan tlemin kan than a thu deuh a. Ministry of Home Affairs, Disaster Management Division atangin nuai 200 tunah hian kan hmu a. Heng thil te hi lei tum a ni a, Advance Rescue Tender-3, Educational Van-2, Wireless communication equipments 20 lai lei kan tum bawh a ni. Hetiang hian kangmei a chhuah hlekin kan hotuten, khawtlangin Fire Service Department kan mamawh a. Chung a thlen zung zung theih nan chuan Motor te leh Bike te, Motor lian te tunah hian kan nei tawh a. Vanduaina a lo awm pawh hian kan thleng hma thei viau tawh a ni tih kha kan sawi duh a. Chutiang a nih lai chuan sawlai Ngaizelah Fisheries leh AH & Vety hmunte min pe a. Amaherawhchu, kan PWD lamah a sakna tur pawisa-te kan han hlan a. PWD lamin sawlaiah khan sak a rem love an rawn tih leh si avangin tunah hian kan tlawlh leh ta rih a. Hmundangah sak nan kan hmang ta a ni.

Sainik Welfare Re-settlement Department hi kan hria a, nichin lamah te pawh kan ngaithla tawh a. Chhingchhipah khian Sainik Sikul crore 100 leh nuai 64 laiin din tum a ni a. NLCPR leh DoNER lam atangin nuai 3373.35 min pe tawh a, hei hi a contractor Hindustan Private Limited, Government of India, New Delhi hnenah kan pe tawh a. Tin, 13th Finance Commission atangin nuai 2500 kan hmu leh a. Contractor hnenah hei pawh hi hlan tawh a ni a. Pawisa kan pek hnem ang hu hian ka duh ang chuan hna an thawk chak hranpa lo a ni. Tichuan Ministry of DoNER hnuaiah bawh hian NLCPR hnuaiah bawh nuai 893.66 leh Finance Commission atangin nuai 2000 hmuh belh leh tur a ni a. Hengte hi chuanin kan zo thuai turah kan beisei a ni.

Mizoram Home Guards hi tlemte han sawi ve ila. Hei, Volunteer 586 kan han tirh chhuahte hi hmun 80 ah duty-na an nei a. Hei hi an va duty-na tena pawisa an rawn chhunkhawm ve an hlawh chhuah hi ₹ 93, 53,566/- lai hmuh let leh an nei a ni. Tichuan kan Home Guards Volunteers pahnih Hav. Thangmawia leh Lalzidinga, Surgeon te hian Civil Defence Meritorious Service chawimawina an dawng ve a, kan lawmpui khawp mai a.

Tin, Home Guard hmun CTI-ah khian Excise Department te, Prison Department te, Transport Department te leh Forest Department te hi hunbi nei takin khilalah khian training-na pek ve thin an ni.

Tichuan Prison Department hi tunah hian Jail hawn theih mai tur eng eng emaw la tih zawh loh deuh hlek te kan neih avangin Serchhip Jail leh Mamit Jail hi hawn theih mai tur leh a hnathawktu tur pawh lak zawh vek tawh an ni a. Nichina kan hotuten Vairengte Sub-Jail an tih te leh thil dangte pawh kha kan hria a. Heng hi kan lo ngaihtuah chhunzawm zel dawn a ni.

Tichuan, a tawp ber atan chuan Excise & Narcotic Department...

Pu LALRINLIANA SAILO : Pu Speaker, khawngaihin Home kha a kalsan dawnin ka hria a. A tih theih mai kan ngaihpawimawh si kha ho deuh tur ang a ni a. Hemi traffic hi an thawk tha em em a, kan hmu a kan fak a. Amaherawhchu, Inrinniah hian nichin pawh recess room-ah kan han chawl kha kan sawi deuh vek mai a ni, Inrinniah hi chuan traffic a jam thei lutuk a tih kha chu tunah hian a sawi theih mai lawm mawni le? Khalai kha tlem lo en leh deuh hlek se, an thawk tha tho tho mai a, Inrinniah te khan tih kha ka'n ngen teh ang.

*Speech not corrected.

Pu R. LALZIRLIANA, MINISTER : Pu Speaker, kan Traffic Police te hi an hah khawp mai a, nileng deuhthawa han dina han vai han vai mai, an tihsual palh a mi insut tir ni thei khatiang kha an ni a. Holiday te a lo ni ve a, tlem chuan an lo inthlahdah deuh te pawh a ni mai thei a. Inrinni hian ka bazaar thin a ti deuh vek kha an ni a, kei pawh Inrinni hi chuan ka bazar loh hi chuan ka thin hi a ur tep mai a. Tute bazar emaw anga nupuite zui duan duan te phei chu ka ni lem lova, ka hruai ve ngai lo. Zing dar 5-ah hian ka bazar a, traffic hi a thawl em em mai a. Chuvangin, a bazar thinte kha chu zing dar 5-ah te khan han tho ve ula. Dar 8 dar 9 velah te in han bazaar ta thin a niang a. Kan lo enzui ang a, Police lam hotute an awm a. Tlema in bazaar hun chhung emaw te kha chu han tihthawl dan kha chu a awm mahna.

Excise & Narcotic Department hi department tetakte a ni a, amaherawhchu, kan hming a lar khawp mai a tun lai hian. A thawktu pawh hi kan tam lo va, kan vaiin 509 emaw chauh kan ni a. Hmannia 25 an lak belhte kha chu hetah hian an tello turah ka'n ngai deuh a. District ruk laiah hian kan han insemdarh ve bawk si a. Tin, Lawngtlai phei kha chu hemi MLCP Act hi an la hman ve loh avangin sawlaih phei saw chuan dah a tul em ka hre lova. Hmun te phei chu kan nei a, kan tih theih a, hemi dan te an hmang ve duh a Zu te an zuar ve duh a nih chuan kan pe thei tho vang a.

Tin, Police -ina Zu an zuar hi chu tihawmlah tak a ni kan tih kha a awm viau mai thei a. Amaherawhchu, Sipaite pawh hian zu an nei a, pioneer te pawh hian an nei a. Tin, CRPF te pawh hian zu an nei vek a, mipui dangina an lei tura kan tih a ni lova. Hei hi anmahni huang chhungah in duh ve tho an ni si a. Khatiang a tha deuhhleka

anmahnin an lo lei mai theihna tur atan khan, pawn va chhuah lova mahni ina an in theih maina tur kha kan rilruah chuan a awm a. Hmanni lawk khan 1st Bn. kan zawrh tirna hmunah hian ka'n tlawh zawk a, eng ang ang te nge maw in neih le ka'n ti a, a man to ₹ 4000 man ang chi kha chu, a tir atang khan case khat kan la a, lei duh pawh an awm mang lova kan la nei reng case khat pawh kha, paruk lai chu kan la nei an ti a.

Tin, zurui in tam phah em Police duty-ah hian ka ti a. Hman ai khan zurui kan tlem zawk a, tin, helaiiah pheih chuan kan discipline a that phah zawk a ni, an ti ve a. R.V. lama zu in hawng, duty ngai si, hmanhmawh deuha zu in si, khatiang ang ho kha anmahniin muangchangin an lo in ve thei tawh a, rui lem lovin an insiam ve thei ta mai em ni aw kan ti a, tha kan lo ti viau mai a keini chuan.

Tichuan, hemi MLPC Act kan hman hnuah hian mi 1660 man an ni tawh a. Nichinah khan kan MLA zahawm tak Pu Thanliana khan engnge ni 'an zuar bawk sia, an man bawk sia, ka hrethiam lo a ni' a tih kha a dik chiah a. Amaherawhchu, Prohibition & Control Bill a nih avangin control tur chuan man an ngai bawk si a zurui kha. Tin, dan lova lo zuar te kha man an ngai bawk si a ni tih kha ka'n sawi duh a. MLPC Rules, 2014 kan hman hnuah hianin, nichina an sawi ang khanin kawtlai a zurui an tam phah lovin kan hria a, man pawh an pun belh chuang lova.

Kan vanneihna em em chu he Rules kan han hmang a, kan han zuar chhuak a, mi tam takin zanah hmeichhia pawn chhuah an ngam tawh lo ang a, zan inkhawm te pawh hi kan ti hleithei tawh lovang an tih lai khan, a hun a lo thleng a, Pathian hi a tha ka ti a, Kelkang hlimna kha khaw tinah, Biakin tinah zung a rawn kai a, thlarau lam hlimnain kan khat ta zawk a. Chungah chuan a hlim rui kan hriat te kha chu khawlai a au vak vak te, Biakin a vak hun hun te leh bingbilet te kha an lo ni ta zawk a. Chutiang ang chuanin rui kan lo tlem phah ta zawk em ni aw, kan ti a kan lawm hle a ni. Pathian chungah pawh hian kan lawm khawp mai a. Zu zawrh ringawtah hi chuan a thikthu hi a chhe lutuk lo a ni mai awm mange tihte pawh hi min ngaihtuah tir rum rum zawk a ni.

MLPC Rules, 2014 hnuaiah hian Bonded Ware-house, licence nei pathum an awm a, retail vendor licence nei 32 an awm bawk a. Tin, Bonded Ware-house neitute hi nuainga an licence fee a ni a, vendor licence te hi singnga a ni thung a ni. Tiang chuan MLPC Act hnuaiah hian zu leh a kaihnawihia chhiah lak hi tun thleng hian (ni 30.9.2015 thleng khan) vaibelchhe sawmhni leh pali, nuai sawmriat pahnih, singriat leh sanghni zanga sawmkua pakua a ni a. Kan zawhnate kha a inang lo thluah anga, a chhan chu zawhna hmuh hma deuhte chhannaah khan a tlem deuh ang a, hmuh tlai deuhah khan a tam deuh ang tih kan ring a. Tunah hianin kan sorkarin chhiah kumina chhunglut tura min beisei chu nuai zathum sawmriat pathum a ni a, kan khum nasa hle tawhin kan hria a, kan lawm viau a ni tih kha ka'n sawi duh a ni.

Tiang khanin kan department chan kha chu kan sawi zo tawh (Pu LALRUATKIMA : Pu Speaker, khawngaihin, kumina an beisei kha crore 35 vel niin ka hria a, chuanin vendor, free sale kha phal loh a ni ta a kan Rules-ah khan. Khalai kha khawngaihin kan Minister zahawm tak khan min enzui-sak sela, a Liquor Card nei lovin duh duha vendor hnena duh zat zat ang an la kha dan bawhchhiatna a ni telin ka hria a, chu chu ka'n ngen tel duh a ni) Ni e, a dik, naupangte leh khatiang ang licence nei lote an lo pek kha dan lo a ni a, hei hi kan hotuten a zuartute hnenah ngun zawkin, thianghlim taka ti tura hrilh tur a ni ang a.

Kan Police Department-te hi, department upa lam a lo ni tawh a. Kohhran tan-te, khawtlang tan-te hian hmun tinah hianin kan hmun hi an awt a, min dil thin a, a pek pawh hi kan pe tam tawh khawp mai a. Sawlai Khatla Biakin panna kawng kual pawh saw an ngaimawh khawp mai a, Kohhran lama kan Puithiamte leh kan Upate tum hnih tum thum an lo kal a. Amaherawhchu, saw lo saw helaiah hian hmun kan nei bik silova, kan tih theih loh thuin kan lo chhang tawh nghe nghe a. Sawlai kawng kual lai tak chu, engnge ni ka hre lova, a ente pawh kan lo en ang a. Amaherawhchu, helai han sut heka in sak theih loh turte a nih chuanin kan buai deuh hle chuan ka ring a, en chu kan lo enzui ang e.

Pu Speaker, ka department chan :-

Demand No.7 Excise & Narcotics Department	₹ 29,02,46,000
Demand No. 16 Home (including Prison & Sainik)	₹ 5,96,03,49,000
Demand No. 31 Agriculture	₹ 2,10,76,14,000
Demand No. 38 Rural Development Department	₹ 3,83,08,33,000
Total :	₹ 12,18,90,42,000.00

He House zahawm tak hian min pass pui turin ka rawn ngen e.

SPEAKER : Aw le, kan Minister zahawm tak Pu R.Lalzirliana chuan a department chan pali (4) –

Demand No.7 Excise & Narcotics Department	₹ 29,02,46,000
Demand No. 16 Home (including Prison & Sainik)	₹ 5,96,03,49,000
Demand No. 31 Agriculture	₹ 2,10,76,14,000
Demand No. 38 Rural Development Department	₹ 3,83,08,33,000
Total :	₹ 12,18,90,42,000.00

chu he House-a pass turin a dil a, pass remti zawngin remti ti ru le, remti lo kan awm em? Kan awm lo.

Tichuan, kan Minister zahawm tak, Pu.R.Lalzirliana Department chan pali (4) a pawisa hman tur belhkhawm, a za vaiin ₹ 12,18,90,42,000.00 chu House in lungrua takin a pass a ni.

Pu. R. LALZIRLIANA : Pu Speaker, ka lawm e.

SPEAKER : Tunah chuan kan Minister zahawm tak, Pu John Rotluangliana kan sawm ang a, sawihona kha han tlip se, han khaikhawm se, sawifiah ngaite sawifiah hnuah pass rawn dil nghal tawh mai se a tha ang e.

Pu JOHN ROTLUANGLIANA, MINISTER : Pu Speaker, ka lawm e. Ka bula thu kan Minister zahawm tak hian ka sawi chin turte pawh min tuk deuh thlap tawh a, Minute 20 ah chuan zo la, vawt te pawh ka ti deuh a nia a ti a, sawi rei lo turah inngai ila.

Hei, member zahawm tak tak ten an rawn sawi nual hlawm a kan Department chan te, amaherawhchu sawi ve miah loh pakhat an neih hi ka rawn sawi hmasa ber teh ang. Legal Metrology Department hi kan member pakhatmahin min sawipui lova, he department hi a bik takin mipui chhantu consumer protection department an ni a. Hei hi a pawimawh em em a, sumdawngte bukna leh tehna dik lo hman te check-tu an ni a. Tin, mipuiin kan ration lak zawng zawng, Godown atanga chhuak te, kan bukna te an rawn check a. Tin, retailer te pawh an check a, Petrol leh Diesel lo thleng te an chhunluh hma pawhin an Tank lorry atangin an check a, an chhun luh hnuah pawh an check a, chutiang ang chuan theih tawp an chhuah a. Chumi piahah cement a tha em? Hmanah pawh problem kan neih kha Mizoramah, cement char thei lo tihte kha a awm kha. Chutiang thleng chuan kan Legal Metrology Department te hian an veng a, cement an test a, rod te pawh chutiangin an en dik a, bazarah packet a lo siam sa, a KG-a lo buk sa te a awm a, hengte pawh an check a, MRP inbel aia sang a hralhte pawh kha an check a ni a.

Tin, gas pawh hi tunhma deuh khan a buk tlinglo an tia, complaint a nasa em em a, khangte pawh kha kan Legal Metrology te hian an check a, an veng a. Amaherawhchu, kan Mizo zia hi thil han nghah theihna kan nei lo deuh a, gas kan check tir lai khan Inrinni ah an check a, khami ni khan kan Minister pakhat khan mi rawn phone a, “Hei, Gas hi an buk a, an lak tur an buk zel si a, mipuiin an nghak nasa lutuk a, chuvangin a buk loh theih mai lawm ni? an ti” a rawn ti a. ni “Ngawi rawh, hei mipuiin an complaint a, buk a tling lo an tia, kan department ten an check a nih kha” ka ti a. “A, buk loh pawn kan la duh tho an ti” a ti a, a buaithlak khawp a ni. Chutiang karah chuan kan Legal Metrology te hian hma an la a ni.

Tin, tunah phei chuan imported illegal foreign Cigarette kan tih, uangthuang deuha an sawi phei chuan ‘Bawngkai Cigarette’ an tih ho zawng zawngte pawh kha tunah chuan an man a, khatiang phalna nei loa sumdawngte kha. Chutiang chuan Legal Metrology Staff te hian theihtawpin hma an la a. Chumi piahlahmah he Department hi tihchangtlun zel kan tum a. Aizawla an Directorate i ti mai ang, a la hrang chiah lo na a, an Office pui ber tur atan pawh hian Building sakna tur ₹ 1,00,00,000 kan nei sa a. Tin, Saiha-ah leh Lawngtlai-ah Legal Metrology District Office sakna turin ₹ 50,00,000 ve ve kan nei bawk a. Tin, Serchhip-ah leh Mamit ah Office sakna tur ₹ 25,00,000 ve ve kan nei bawk a ni. Reiloteah hna kan tan theih kan beisei a, chutiang chuan he

Legal Metrology Department hi a inruahman chho a ni tih kha Pu Speaker, kan member ten sawi chiah lo mahse ka han sawi hmasa duh a ni.

Awle, Pu Speaker, Food, Civil Supplies & Consumer Affairs-ah hian kan member zahawm tak tak 13 laiin an sawi a. Lawmthu sawinate kan ngaithla a, fakna te pawh kan ngaithla a, a lawmawm ka ti a. A bik takin Supply Department-a kan staff te kan secretary te, kan officer te leh staff zawng zawngte tunlai chuan an hah em em mai a. A bik takin hemi Food Security Act kan kalpuina turah hian meeting pawh kan nei ngun, Zadeng tlawm tur an sawi ang mai hian kan meeting reng ringawt mai a ni. A then te phei chuan zan khaw tairek thleng thlengin an thawk a, inrinniah pawh office te an kal a, theihtawpin he Supply Department hian hna a thawk a ni.

Nichinah khan kan member zahawm tak kan senior member Pu K.Sangthuama te leh kan opposition lamte pawh khan an rawn sawi chhuah Food Security Act chungchang a beneficiaries thlangtu tur selection committee chungchang an rawn sawi kha, hei hi kan Dan rules-ah DCSO kha chairman a ni ang tih a ni a. Tichuan, vice chairman kha Local Council Chairman emaw VCP emaw vice-chairman an ni ang tih a ni a. Tin, Local Council member zawng zawng kha member an ni ang a, khami area chhunga inspector te leh store-keeper te, tin, prominent citizen 2 ruat an ni ang a, DCSO kha a ruattu tura sorkarin a ruat a ni a. A rules-ah khan, sorkarin a ruat ang tih a ni a, chumi ang chuan an district chhunga an chairman DCSO te an ruat tura tih a ni a. Tichuan, Secretary pawh an khua a lehkathiam deuh kha secretary-ah ruat an ni ang a, Assistant Secretary atan VC emaw Local Council emaw Secretary te kha hman an ni ang tih a ni a.

Tichuan, heti laiah hianin kan DCSO thenkhat ten engemaw tihsual palh an nei a, anmahnin an ruat turah khan VC te hnenah prominent citizen 2 leh secretary ruat turin lehkha an lo va pe palh a, kha kha kan opposition lamte khan an rawn vei deuh a. Amaherawhchu, keimahni party Congress ho pawh kha an rawn lawm chuang lova. A awmzia chu an Local Council te emaw VC te emaw kha party nei vek an ni a. Annin an rawn ruat chuan a bias dawnin an hria a ni. Chuvangin, prominent citizen kha a ruk takin kan YMA te, kan MUP te leh kan MHIP lam NGO lamte pawh rawnin kan DCSO te khan an lo ruat turah kan ngaih lai khan khati khanin an lo theh mai kha a pawh kan ti a, kan DCSO te pawh tunah hian lo hold vek turin kan ti a. Pathian zarah kan dam ang a, hemi Session kan zawh hunah hian kalpui chhoh dan tur kan ngaihtuah ho leh dawn a ni.

Tin, Pu Speaker, ka sawi duh chu he Food Security Act-in a cover chin tur hi chu a beneficiaries tur hi a dawng tur dik takin an dawng tur a ni tih hi kan sorkarin kan policy a ni. Hetah hian party induhsakna pakhatmah a awm tur a ni lo tih hi ka sawi a ni a. Ni 29th October ah khan kan storekeeper zawng zawng leh inspector te, DCSO te leh kan staff zawng zawng Food Security Act-a thawktu zawng zawngte leh thawk tura kan ruat thar, kan lak thar Technical Assistant zawng zawngte training neih a ni a. (SPEAKER : Nikum October i tihna em ni, ni 29th October kha nikum maw?) September ka tihna, ka tihpalh a ni Pu Speaker. Khatah pawh khan

Chanmari Veng YMA hall-ah programme neih a ni a. Chutah pawh chuan Pu Speaker, thusawina ka va neihnaah pawh uar taka ka sawi chu kan staff te zawng zawng leh thawktute pawhin fair takin party induhsakna awm miah lovin a dawng tur leh a dawng tlak dik takin an dawng tur a ni tih hi ka sawi a.

Tin, chumi rualin October ni 1 ah khan Press Conference kan neihnaah pawh khan hei hi uar takin ka sawi a ni. Chuvang chuan, kan ramah Food Security Act kan hmanna turah hian mi dik tak a dawng tlak dik takin an dawng tur a ni tih hi Pu Speaker, kan sorkarin kan duh dan a ni tih kha vawiinah hian kan sawichiang nawn leh duh a ni.

Tichuan, hei kan member zahawm tak Pi Vanlalawmpuii'n a rawn sawi Biate-ah godown a ruak tih chungchang te kha hman deuhah khan an rawn sawi a. Pathian khawngaihna zarah hei nichina kan member-ten an sawi ang khan mega block lai pawhin harsatna tawh lovin tluang takin kan kal a, khawi godown mah hi a ruak lova, khitalai a ruak an rawn tih pawh kha need base a pek an nih vang a ni. Kan thianpa fiamthu thawh thiamin a fiamthu ka hre chhuak a, vanram ka kai zah chhan ber hi chu leithuam dah a, vanthuam a inthuam hma khati lai saruak kha Mari ten min bihthla palh ang a tih kha ka hria a. Chutiang deuh chuanin Biate Kudam pawh kha tun kar quota kha mipuiin an la a, kar leh quota ala thleng silo a, khati lai kudam ruak lai tak kha kan opposition lamin an lo la palh a ni.

Tin, chumi rual chuan Pu Speaker ka sawi duh chu, khatia kan kudam a ruah lai tak khan kan mipuite fairel bel a khah lai tak a ni, an ration an lak vek avangin. Chuvang chuan, kudam ruak hi tunah hian kan neilo a. Nichinah khanin kan member zahawm tak Pu Ruatkima khan thahnemngai takin, a rawn sawi, 'Thenhlumah JCB in buhfai an thiar a ni,' an tih kha tihtak takin kan bei a, kawng a chhiat pawhin JCB talin kan thiar a ni, Pu Speaker. Chutiang chuan theihtawpin kan staff te leh kan officer te, kan hnathawktuten an ti tak tak a.

Tin heti laia POL man te an dah tlem lutuk a tih te pawh kha kan member zahawmtak Pu Beichhua pawh khan a rawn sawi a, heng hi chu a token angin an rawn dah a ni mai a, kan dil belh zel a min pe zel a vawikhat mah kan la nghei ngailo a ni tih kha kan sawilang duh bawk a ni.

Tichuan Pu Speaker, kan sawi ngun tawh a, hemi National Food Security Act chungchang hi vawiinah Zoram mipuite hnenah he House zahawm tak kaltlanga ka sawi leh duh chu mi nuai 7 leh sang 6296 chauhin he Food Security hi an hman dawn tawh avangin Zokhaw lamah chuan 81.88% chauhin an la tawh dawn a. Tin, khawpui lamah chuan 48.60% chauhin Food Security hi an la tawh dawn a ni. Nichina kan member zahawm tak ten an sawi ang khan thla khatah 5 kgs, kg-ah ₹ 3 in an la dawn. Amaherawhchu an kham dawn lo a kan hriat avangin tunah 8 kgs-ah pawh harsatna kan nei a, kan sawrkar hian 3 kgs hi kg-ah ₹ 15 in i pek belh leh mai ang u, tiin ruahhmanna a siam a. Tichuan Food Security enjoy tur reng reng, Food Security-in a huam tur

ho hian an ration lak hunah hian rate pahnih an nei dawn a, chu chu 5 kgs, kg ah ₹ 3 in, 3 kgs – kg ah ₹ 15 in a vaiin ₹ 60 in ration an la thei tawh dawn a ni.

Tin, food security-ah hian naupang leh puitling tih a awm tawh dawn lo a, a inzat vek tawh dawn a ni, tichuan heta a cover ve loh ho zawng zawng mipui mi mir pawh hi kan sawrkar chak tak hian tunah hian ration an lak pangngai ang hian lak chhunzawm ni rawh se, tiin ruahmanna an siam a.

Tin, tunah hian Pu Speaker, kan member Pu Rinawma te khan an rawn sawi chu, tunah hian buhfai excess issue a tam lutuk a an ti a, a dik a ni. Tuna kan Food Security kan luh hma a, tuna kan kal meknaah pawh hian VIP quota te kan titawp a, special permit zawng zawng kan titawp a, chuvangchuan buhfai kha tlem surplus a lo awm ta a. Engpawhnisela, hetia mega block te a awm dawn si te chuan kan mipuite hi kan ven hlek a ngai a nih hi kan ti a, chu chuan kan veng a. Tin, chumi piah lamah chuan kar khat zelah buhfai hi thingtlangah chuan pek an ni. A chang chuan thla khatah hian kar nga awm chang te a awm thin avangin khang kha an ration kha tlema excess a kan issue a ngai a.

Tin, kan population hi a fluctuate a, a changin an rawn pem a, a changin an pem chhuak bawk si a. Chuvang chuan tlemin kan han phalrai deuh hlek a, amaherawhchu chuti chung chuan tunhma a FCI atanga buhfai normal quota kan lak baka economic cause a kan lei thin, quintal sing 8 thla tin kan lei thin erawh kha chu kan lo tihnam ta a, thla 5 chhung chu quintal sing 4 chauh kan lei tawh a ni. Quintal sing 8 kan lei hian cheng vaibelchhe sawm hnih leh nuai sawmruk sen a ni a, quintal sing 4 kan lei hian vaibelchhe sawm leh nuai sawmthum chauh a ni ta a, tichuan thla 5 chhungin vaibelchhe sawm leh nuai sawmthum kan lo hum zel takah chuan vaibelchhe 50 (sawm nga), vaibelchhe 60 (sawm ruk) chuang zet kan lo hum thei ta a ni. Tichuan tunah hian food security a kan luh chuan Pu Speaker, tuna kan expenditure pangngaiyah chuan vaibelchhe 1134298.75 hi thla tin a kan expenditure a ni a. Tuna food security a kan luh a, kg-ah ₹ 3 a kan lei a, kg-ah ₹ 3 a kan hralh bawk chuan kan lo tlahniam dawn ta a.

Tin, ration card zawng zawng kan lo computerize a kan digitize tak vek avangin bogus ration card kha tam tak a awm ta lo a, chuvang chuan, kan requirement pawh alo tla hniam ta a. Food Security a kan net expenditure tur chu thla khatah vaibelchhe 6,51,72,844 alo ni tawh anga, thla tin vaibelchhe 48,25,730 kan save thei tawh dawn a ni. Chutiang chuan he Food Security Act hi a tirah kan huphurh tehlu nen tunah chuan kan sawrkar tan pawh a lo tha zawk dawn ta a, pawisa tam tak kan lo save tawh dawn a ni.

Tin, hei tunah hianin NABARD atangte pawhin Godown te kan sa a, staff quarter te kan sa a, tin tun kan budget-ah khan in lo hmu anga, godown pawh 28 lai sak leh tur kan nei bawk a nih kha. Tin, hei khutilaiah khan kan member zahawm tak ten an han sawi FCI godown Tanhril ami kha sawn thuai thuai kan duh a, amaherawhchu kan godown a nilo a, FCI godown a ni a, an

insawna tur atan pawh ram pawh kan offer a, keimahni department ram te pawh kan offer a, tin mimal ramte pawh kan offer a anmahni pawhin an rawn en tawh a, amaherawhchu thu tlukna fel fai tak an la siam lo a.

Chutiangin hemi LPG bottling plant kan tihte, tin, hemi fuel diesel te leh petrol te han dahkhawmna tur storage depot te pawh hi kan mamawh tiin kan thlen a, IOC lamte pawhin an rawn en a, a hmunah te pawh kan officer ten an hruai a mahse, vawiin thleng chuan final decision an la siam chiah lo a ni.

Nichina ka sawi ang khan Pu Speaker, Gas chungchangah khan, kan member zahawm tak Pi Vanlalawmpuii chiah khan a rawn sawi a. Gas hi vawinah hian kan hnianghnar chu kan ti hauh lova, amaherawhchu kan hnianghnar lo chung chung pawhin kan harsatna zualpui kha chu zia-awmin ka hria a. Kan memberte pawh khan an rawn sawichhuah ka beisei deuh a, tuman an sawi lem lova, gas tlema kan awlsamna hi. Nakinah eng emaw vangte pawhin a lo harsa leh thei a, kan han harsa leh ang a, fakselnaah te khan hawrawppuiin min rawn kap leh awm si a. (PU K. SANGTHUAMA : Pu Speaker, a awlsam deuh hlek avangin an sawisel lo deuh zawk a ni ang e. A lawmawm lamah kan ngai ang). Nia, a lawmawm lamah kan ngai ang a, a awlsam deuh vanga an sawilo a nih pheih kha chuan a lawmawm khawp mai. Sawi dawn chuan sawi tur a tam. Kan thian pa'n vawt a ti tawh bawk si a, khati lai kha kan duh tawk ang a.

Hetah, Transport lamah hianin, Pu Speaker, tawite han sawi leh ka duh chu, member 14 laiin an rawn sawi a. A hnung bera rawn sawitu Pu Zawma khan, Sumo-ah bungruate hi a phurh thei lawm maw ni le a tih kha. Sumo hi chu passengers phur an ni a, passengers leh an luggage te phur tur a ni a, kan inngaihnnatthiam viau a tunah pawh hian an phur sang thin khawp mai. Engpawhnise, kan ngaihnpawimawh ber chu passengers safety hi a ni. Khang zawng zawng kha kan inngaihnnatthiam chuan kan pawng rang leh lutuk thin bawk si a, chu chu kan inveng ve bawk a ni tih kha min lo hriatsak ula.

Kan member zahawm tak Pu Sangthuama rawn sawi, Sumo parking chungchang hi, kan kut a ni ta lova, AMC kut a ni a. Counter hi chu, engpawhnise a ticket hralhna a ni mai a, a hralhna lam kha chu. Kan department lam STA in an thlang ang a, counter kha chu, ticket pek chhuahna mai tur a ni a. Thlawhna ticket pawh Aizawlah kan book a, thlawk tur chuan Lengpui pan vang vang a ngai tho a ni. Chutiangin Rail te pawh...

Pu K. SANGTHUAMA : Pu Speaker, kha kha chu a inanglo deuh a, i sawi kha chu. Zing karah te harsatna awm miah lovin an awm thei a, dar 7 Am ah chuan motor a tawt khat khawp mai a, mi khawngaihthlak zia leh mipui tana awlsam zawk, sum chungchangah pawh harsa te te an lo ni a, chu chu ka han sawichhan a ni.

Pu JOHN ROTLUANGLIANA, MINISTER : Engpawhnise, Pu Speaker, Sumo stand kha, AMC kut a ni e, Pu Speaker. Tichuan, kan member zahawm tak Pu Chalrosanga zawhna, Lunglei-Aizawl Bus hi a tlan theih lawm maw ni le, a tih kha, hmannah pawh ka office-ah a lo leng tawh a. Tunah hian Silchar-ah Bus lian vaklo A/C Bus tha tak kan tlan tir a, passenger hi an tam lo riau thin mai a, kan lo ngaihtuah nawn dawn nia. Kal tur an tam phawt chuan sawti lamah tlan tir zawk ila, (Pu CHALROSANGA RALTE: Pu Speaker, a lawmawm khawp mai).

Tin, kan member zahawm tak Dr. K. Beichhua'n a rawn sawi, High Security Plate Transport motor-in an vuah lo, tih kha, a dik a ni. High Security Plate hi heti lai Mizoramah hman a nih hma khan Transport-ah hian motor register a lo awm nual tawh a, khang ho kha 2012 ah High Security Plate hi hman chauh a nih avangin, a hlui ho kha chu kan vuah lemlo. Tin, private-ah pawh hian kan insist lemlo a hlui kha chu. Mahse, a thar tuna an rawn hman chin ang angah hi chuan tih vek tur a ni a, a hlui kha chu kan tilui lemlo a, an duh chuan an ti thei tho ang chu.

Tin, kan member zahawm tak Pu Lalrinliana Sailo khan a ngaipawimawh a, hei lehkha nen min rawn pe thla leh a, Aizawl-Kolkata Bus direct service kha. A tha khawp mai a, hei hi hmannah kan Joint R.C. Kolkata nen khuan kan sawi dun a, ani khu tunhmain kan Joint Director, Operation Transport lamah a lo ni a. Tripura ho hian direct in Kolkata lamah Bus tlantir an tum tiin kan sawi dun a. An tlan tawh mai dawn emaw kan tih laiin tlein hei a hnuk hla leh deuh hlek a, chanchintharah khan kan lo hmu ang a.

Khumi Tripura atanga lokal Agartala atanga chhuak tur zawk hi, keini Mizoram atangin a zu hman theih lawm ni, tiin kan sawiho tawh a, kan Secretary te nen pawh. Keiniin direct-a kal ve tur hian, Bus pakhat a full tur hian, kan inhmu lo thin ang tih te pawh a hlauhawm a. Chuvang chuan Agartala atanga Kolkata direct kal tur an awm chuan, chu Agartala Bus man tur chuan ruahmanna siam ve ila, tih kha Pu Speaker, kan lo sawi tawh a. Engpawhnise, anni pawh an tlan bik lova, han tlan phawt sela, kan la ngaihtuah chhunzawm turah ngai ila a tha awm e.

Tin, Pu Lalthanliana, kan member zahawm takin a rawn sawi, POL chungchanga nuai 120 chauh an rawn dah a tih kha, a dik a. Nichina Supply lamah kan sawi tawh ang deuh khan, heng hi chu a token ang chauh a ni mai a kan tih kha kan dil a, min pe leh zel a, kan mamawh tlem thut vang pawh a ni chuang love. Hnathawh tlem vang em ni kha an ti deuh a, kan hnathawh tlem vang lam a ni lova, hei hi chu a kawngka han hawngtu mai a ni a, a bak hi chu Finance lam pawhin min pek belh zel thin e.

Tin Green Bus tih chungchang kha AMC khanin lo tih an tum mai a, kha kha kan STA danin a phal loh a nih avangin AMC lama kan hotute nen pawh joint meeting kan nei a. Hei hi chu lo tilo rih turin kan ti a, chuvang chuan tih a ni ta lo a ni. Hei hi keimahni STA in a hranpain kan la ngaihtuah ang a, a hranpaa permit pawh pek ngai tur chi a ni. Tunah hian STA hi mumal takin kan thu tawh a Pu Speaker, thla thum danah STA hi an thu zat zat tawh a, tichuan Bus permit

a ni emaw, sumo a ni emaw, Taxi a ni emaw, Auto rickshaw a ni emaw chungte pawh chu vawilekhatah pe teuh teuh tawh lovin, kan STA member te pawhin ren takin an pe a. Amaherawhchu a thut lam an uar a, tin, STA hi khatianga permit pe ngawr ngawr tur kha an ni lova, danin a phut tam tak tih tur nei an ni. Aizawl khawpui chhungah hi chuan STA hian Taxi permit pek an nei tawh ngai lova, hei hi kan Sorkar policy a ni a, tunah rih hi chuan Local Taxi Aizawl khawpuiah chuan pek tawh loh ni se tih kha kan la kengkawh reng a.

Chumi rual chuan kan STA ina permit kan pek thar tur chu tourist bus hi i pe teh ang u kan ti a. Tun tumah hian 20 pek turin Pu Speaker kan ruahman a ni. A chhan chu khawmpui te eng eng emaw kan ngah em em a, YMA khawmpui te, MZP, MSU, Hmeichhe khawmpui te leh Presbytery kohhran khawmpui tam tak a awm a. Chu chuan City Bus tam tak a pawthek a, Kelkang kal naah te pawh kha motor tam, City Bus tam tak an kal bo thin a, khawpuiah harsatna a awm thin avangin khangho kha khawpui pawnah chhuak tawh lovin tourist bus kan siam ang a, chungho te chu an hire tawh ang a. Tichuan 20 hi a la tlem deuh a nih pawhin a tul ang zelin Pu Speaker kan la ngaihtuah leh dawn a ni.

Tichuan kan department hian theihtawp an chhuah a, nichin a an sawi tak ang khan leh hmannia zawhna kan chhan ang khan nikumah ringawt pawh khan vaibelchhe 21 chuang revenue kan chhung a nih kha. Tunah hianin hei road tax te leh passengers and goods tax te hi internet hmanga e-payment tihna turin ruahmanna kan siam a, hei hi reiloteah kan hawn theih kan beisei bawk a ni.

Tin, Chaltlangah hian petrol pump kan nei a, khi khi consumer pump an ti a, mipui hnena hralh chhuah ve theih loh a ni. Chuvang chuan, khi khi retail outlet-ah min convert sak rawh u tiin IOC hotute hnenah kan dil a. Department khan a sumdawn mai theih loh avang khanin Mizoram Road Transport Society kan din a, chu chu registration kan tifel vek tawh a. Chumi kaltlang chuan reiloteah khi pawh khi retail outlet-ah min convert sak theih kan beisei a ni.

Transport department hi a lehlamah chuan mipui tana thawk kan ni a, public service kan ni a, kan bus te hi a hlawklo, a nihna takah chuan sumo ho tlan duh lohnaah te a ni kan tlan ni. Kawng chhiat chungchang hi chu naktuk lamah kan la khel dawn a sawi tel lo ila. Chutiang chuan kawng chhe chung chung hnuaiah pawh an service a, theih tawp an chhuah a, kan Driver-te, kan Conductor te hi an hah em em a, theihtawpin an tang ve a. Kan bus te hi a hlui tawh a, a thar leina tur kan nei bawk si lova kan inchei reng a, kan insiam reng a, kan innawr liam reng a, chutiang chuanin Pu Speaker, he Transport Department hian theihtawpin hma a la ve a ni tih kha ka'n sawi duh a ni.

Tichuan a tawp berah chuan Tourism Department hi Pu Speaker, kan infrastructure lampang phe chu Central Sorkarin a rawn delink zingah khan a tel ve a, engtin tak kal zel ang i maw. Engpawhnisela, kan hotute an awm a, theihtawp kan chhuah zel ang a, kan member zahawm

tak 13 laiin min rawn sawipui a. Kan member-ten an sawi ang khan privatization kan ti a, tourist lodge te mimal hnenah te pek ni se kan ti a, kan tender a. Amaherawhchu, kan tender thenkhatte kha engati nge in retender leh tihte pawh kha Pu Thanliana te pawh khan an rawn sawi a. Kan retender lehna chhan hi an chhang sang lutuk a, revenue lakluhte kan han en vek khan an misused ang tih kan hlau a, a dik lovah, a hman lohna turah an hmang ang tih kan hlau a, an ngam sang lutuk a ni.

Kan naupan laiin kan veng thenawmah pa pakhat hian motor chhe deuh mai hi an nei a, khalh pawh an khalh ngai tawh lo a, an kawtah a ding reng a. Miin leiah an dil a, a neitupa khan “Engzahin nge in ngam?”, a ti a. An ngam sang lutuk a, a khai, a thatna riau in hria aniang, lei leh lo mai rawh u a ti tlat mai a. Chutiang deuh chu kan ni awm e. Anni pawh an ngam sang lutuk a kan ringhlel a ni. Tin, anmahni background kan han en khan khatiang ang ti thei tur khan kan ngai lova. Tin, chutih rual rual chuan khatih laia kan tender hmasa zawkah khan Tourist Lodge tinah khan zu zawrh theih dawn a an hriat tlat avang khan an rawn phur em em mai a. Chiang taka kan han en hnuah heng hi chu a tihchi love, i re-tender leh ang u, an revenue chhun te nen en kawpin a hnuai lampang hniam zawng siam ila, a sang zawng pawh hi i siam ang u kan ti ta zawk a ni, chu chu Law-ah pawh kan vet thlap a ni. Anih loh chuan duh duhin an chhan vak mai chuan kan ram mi ni chiahlo te pawh khan an rawn chhang vak mai dawnin kan hria a, tute emaw hming hawh khan. Chutiang chuan kan invenna vang zawk a ni e. Pu Speaker.

Engpawhnisela, khang kha kan tihchhonzawm zel a, kan tihchhonzawm zel dawn a, tunah hian Tourist Lodge hi kan ngah em em a, la luah loh pawh kan ngah a, a luah tawh sa pawh hi kan luah lum hlei thei lova. Tin, kan zoram mipuite pawh hian Tourist Lodge han tih hian official ho chauh thlen turah an ngai thin ka tih kha, tupawh pawisa nei apiang chu a thlen theih a ni tih hi Mizoram mipuite hian hria se tih hi ka sawi nawn leh duh a. Hmanah khan ka sawi tawh a, kan Tourist Lodge-te hi mi zawng zawng tan a ni tih hi kan hriat a pawimawh lehzualin ka hria.

Tichuan, hmanni a zawhna kan chhan ang khan infrastructure development for destination and circuit tih kha Ministry of Tourism Government of India-in a rawn tih thin kha a ni a, mahse tunah hian 2nd instalment kan hmuh theih loh avangin harsatna tlem kan tawh a. Tunah hian Swadesh Darshan tih Scheme hnuaiiah hian hengte hi min thunsak thei turah kan ngai a. Chumi hnuaiiah chuan tuna kan project kal mek te pawh hi 2nd instalment min pe lo a nih pawh hian kal theih turin Tourism Ministry lampangin min ruahmansak a.

Tin, Thenzawl-a mega circuit saw Swadesh Darshan hnuaiiah hian vaibelchhe 99 nuai 9992.54 lai sanction turin DPR, Ministry of Tourism-ah kan submit tawh a, anmahni pawhin engkim min ruahmansak a ni.

Tin, kan sawi tak ang khan trekking route te pawh kan siam. Chumi rualin aerosport hi kan tih nasat ang hu hian mipuite hian min hmehriatpui lovin ka hria a. Power hang-glider, air balloon leh para sailing kan tih te hi kan thalaite tam tak an training a, an phur em em a ni.

Tin, Hotel Management atan hian Shillong-ah leh Guwahati-ah keimahni Tourism Department kaltlang hian zirlaite kum tin kan thawn thla thin a. Aizawl-ah pawh hian Hotel Management Institution hi hawn ni sela tiin vaibelchhe 10 hmangin Central Sorkar atangin sak a ni a, tunhma a Bung Picnic Spot-ah khan. Kan sa zo vek tawh a, mahse thawktu tur hi state sorkar-in min la pe lova, min pe a nih chuan vaibelchhe 2 hi min release tur an la nei zui lehngal a ni. Chutiang chuan Pu Speaker, kan Department hian ruahmanna a siam chho a.

Hmanni lawkah Anthurium Festival kan nei a, Anthurium Festival hi kan sawi thin a, kan han nei zo chauh a, kan neih ni pawhin kan sawi a, kan Chief Guest te leh Officer zawng zawngten an sawi apiangin kan state sorkar pawisa ni lovin central atangin pawisa hmundanga hman awih miah loh, Anthurium Festival hman nan hian nuai 25 min pe a ni tih hi kan sawi lawm lawm a, kan hmang zo chauh a chanchinbu-ah an rawn ziaik leh a, fakselna-ah sum harsat nak alaiin festival an ti an rawn ti leh a. Chutiang chu a ni lo Pu Speaker, hmundang atana a hman theih chuan loh avanga hmang kan ni a, a then phei chuan Anthurium Festival te an tih Zamzo Festival an tih hma chu ka kal lovang, an ti a. Khati lam kha a ni lo Pu Speaker, a thlukah an buai mai mai niin ka hria.

Engvangin nge Anthurium Festival kan tih, Central Sorkar lam hian Festival tur hi India ram mai ni lo, Foreign atang te pawhin mi hip theihna tur atan Festival han phuahchawp teh u an ti a, kan pangpar neih, foreign-ah pawh kan thawnychhuah, foreigners te pawh kan hipna tur festival kan siam dawn a nih chuan foreign lama kan thawnychhuah ve Anthurium hi ni rawh se tiin kan rual u te khan an lo ti a, chu chu vawiin thlengin kan hmang zui zel a ni.

Amaherawhchu, hmun nghet kan neih loh avangin kan hmun neih chhun Reiek-ah khan kan ti a, kan len loh bakah kawngte a lo chhiat avangin kuminah khan Lengpui-ah kan han ti a, a hmun chu a thawl deuh a, mipui pawh min dawl deuh a. Engpawhnise, kum lehah pawh Anthurium Festival hi kalpui leh ni rawh se kan ti a. Chumi bakah kan Festival tho Thalfavang Kut te pawh kan ti a, khangte pawh kha nikum lamah khan Tuirial, Airfield hluihah khan kan buatsaih a, mipui an tam em em a, item hrang hrang intihhlamna te kan hmang a. Kuminah pawh hian December ni 10, 11, 12, hian Thalfavang Kut hman leh kan tum a, heta tan pawh hian Central Sorkar-in, pawisa cheng nuai 25 min pe a, kan indaihlo deuhhleik thin. Tun tumah khan company lamte pawhin min rawn sponsor ve a, tun

Thalfavang Kut-ah pheh hi chuan nasa leh zualin min sponsor-tu tur te pawh zawn ni se kan ti a.

Mi thenkhatten hetiang hlim hlawp siam ringawt a Kristian lo te an ti a, mahse mihringte kan hlim hi kan Pathian khian a phal tho ka ring tlat a ni. Chuvang chuan, theih tawpin kan thawk ang a. Hei ka thudawn dan a fuh nge fuh lo chu ka hre lova, Beer te kha an free sale ta mai a an ti. Khalai erawh kha chu MLPC Act kan nei a, tunhnuah chuan kalpui theih ni ta sela, a zuar tur ten zuar sela, khalai zu lo thlah zalen lutuk kha chu a remlo niin ka'n hre deuh a, chu chu min lo hriatsak se ka ngen duh a ni.

*Speech not corrected.

Pu JOHN ROTLUANGLIANA, MINISTER : Kan lo en dawn nia, engpawhnise, an hlim phah khawp mai. Pu Speaker, tuntumah pawh khan tumah rui lovin aw, hlim takin kan ti a, han rui lutuk pawh an awm lo, an hlim em em mai a. Chuvang chuan kan tih tur zawng zawng kan tih zawh hnuah khan, kan tih loh tur han tih hlekte pawh kha tih tur ber zawh tawh kha chuan a thiang ve tho ang a. Chuvangin Thalfavang Kut kan hman turah pawh hian hetilaia kan member zawng zawngte leh Zoram mipui lo kal duh phawt chu lo kal vek turin kan sawm nghal a ni e.

Awle, Pu Speaker, ka duhtawh tawh ang a. Engpawhnise, vawinah kan member zahawm tak tak ten thahnemngai takin ka department te min rawn sawipui a. Tin, fakna awka te, lawmthusawina te kan dawng a, an chungah kan lawm takzet zet a ni. Tichuan, Pu Speaker, Ka Demand No. 17-na Food, Civil Supplies & Consumer Affairs ₹ 2,81,69,30,000, Demand No. 42-na Transport Department ₹ 47,19,12,000, Demand No. 43-na Tourism Department ₹ 17,87,43,000 a vain ₹ 3,46,75,85,000.00 te hi he House zahawmtak hian min pass pui turin ka han sawm a ni e. Ka lawm e.

SPEAKER : Aw le, kan Minister zahawmtak Pu John Rotluangliana'n a Department chan 3, Demand No. 17- Food, Civil Supplies & Consumer Affairs, Demand No. 42 Transport Department, Demand No. 43 – Tourism Department, hemi 3 a hman tur pawisa a vaia belhkhawm ₹ 3,46,75,85,000 pass turin House a dil a. Pass remti zawngin 'remti' ti rawh u le. Remti lo kan awm em? Kan awm loh chuan Demand No. 17, 42, 43 a hman tur pawisa a vaia belhkhawm ₹ 3,46,75,85,000.00 chu lungrual takin he House hian a pass a ni. (Pu John Rotluangliana, Minister : Pu Speaker, ka lawm e).

Dar 4:00 P.M. kan pelh avanga thingpui kan pek theihloh ngaihdam dil tih nimina kan sawi kha, kan inngaitlawm lutuk a ni ang e, ngaihdam dil tur kan ni love tih hi House ka hrilh duh a. Tin, hetia kan awmrei chuan a department neitu a Minister-te khan in tur emaw, engemaw hi kumdangah chuan an ngaihtuah thin a ni tih kha hre tawh ila a tha ang e.

Awle, vawiina kan tih tur chu Pathian zarah tluang takin kan tizo thei ta a, a lawmawm hle a. Naktuk zing dar 10:30 a kalkhawm leh turin i haw ang u.

Sitting adjourned at 6:09 P.M.